

VATOTIWA ENKARHINI

WA MAKUMU



Avuxeni, vayingeseri. A hi vulavuleni na Hosi ya hina sweswi. Xikwembu lexikulu, Mutumbuluxi wa matilo na misava, Loyi a hi vekeleke nkarhi lowu emixweni lowu hi Matimba, wa ku dzunisiwa ka Wena. Nakona ingaku hina, Hosi, hi tinyiketela hi ku hetiseka etimbilwini ta hina eka ku rhandza ka Wena ka Matimba na ku tirha ka Moya lowo Kwetsima endzeni ka hina, ku humesela emahlweni leswi U lavaka leswaku hi swi tiva. Ku navela ka hina i kuva Vakreste vo antswa na vayimeri va Wena vo antswa. U nga hi nyika swona mixo lowu, loko hi ri karhi hi Ku yimerile, hi Vito ra Yesu Krete. Amen.

Tshamani ehansi. [Munhu un'wana a ku, “Ndzi susa swidukwani swa xikhongelo xana?”—Muhleri.] Ina.

² Hi tsakile swinene kuva kona nakambe mixo lowu, eka—eka ntirho wa Hosi leyikulu. Nakona ha tisola, hina, nakambe, kuva hi ngari na vutshamo bya vanhu, kambe ntsena hi na . . . Hi ta ringeta ku endla swo antswa kutlurisa leswi hi nga ta swikota, ehansi ka swiyimo.

³ Sweswi, votala va na swidukwani na swikombelo leswi tlhandlekiweke lahawani kuva swi khongeleriwa. Kutani ndzi swi veke etlhelole lerin'wana; ku nga ri leswaku ndzi le ku swi honiseni, kambe a ndzi ta swi khongelela endzhaku kaloko kotala ndzi . . . tani hi, na vusiku lebyi. Ndzi ta swi endla emixweni lowu, kutani nakambe vusiku lebyi, loko . . . Kutani ndzi ta khongela ni ku rindzela Moya wa Xikwembu eka ku horisa, nakona hilaha ndzi tsakelaka ku khongelela e—e swidukwani na swilo.

⁴ Kutani eka swikombelo swo hlawuleka, Billy u swi nyiketile, xin'wana ni xin'wana, eka mina. Ku ni kwalomu ka madzana manharhu, nakona ndzi, ndzi vuye ndzi sukela tikamara. Ma swi vona, ndzi le ku swi fikeleleleni ntsena hi ku hatlisa, nakona xin'wana na xin'wana, lexi ndzi nga xi fikelelaka. Nakona ndzi ta swi fikelela hi xihatla ntsena hilaha ndzi nga ta kota ha kona. A ndzi nge swi koti ku swi fikelela hinkwaswo. Ntsena ku fikelela endzeni, ndzi fanele ku kuma xin'we, ndzi ku, “Hosi, ku ngava *lexi*, kutani kuva *lexi* xana?” Ntsena kukotisa sweswo, hikuva swi tano, xin'wana na xin'wana, xi na xilaveko, swikombelo swa xiviri; swin'wana, ku nga ri ni ku kanakana, leswi hi faneleke ku vulavula swin'we hi swona. Nakona ndzi . . . Swintsongo, ma swi tiva, nkarhi wun'wana Moya lowo Kwetsima wu nga vula xokarhi lexi ndzi xi hlayeke, lexi tshamaka

embilwini ya mina; ndzi tlhelela endzhaku eka xona nakambe, kutani ndzi hlota kwalahaya kukondza ndzi xi kuma. Ehandle ka swona, u teka ntsena hi minkarhi.

⁵ Sweswi, hi lava ni ku vula leswi, emixweni lowu, ni ku xeweta lava va nga ehandle eka swiphemu leswin'wana swa tiko. Hi lava ku xeweta vanakulorhi emixweni lowu hi ndlela ya vuhlanganisi bya riqingho leri, eNew York City; Beaumont, Texas; Prescott, Arizona; Tucson, Arizona; San Jose, California; Connecticut; Gainesville, Georgia; na New Albany, Indiana; ku tsemekanya tiko. Ha mi xeweta hi Vito ra Hosi Yesu.

⁶ Emixweni lowu, eIndiana, i mixo lowunene. Hi vile na mpfula eka vusiku lebyi hundzeke leyi horiseke maxelo. Kutani hi le... Tabernakele yi tele hinkwayo, nakona un'wana na un'wana u rindzerile, hi ku langutela lokukulu, eka dyondzo ya xikolo xa Sonto. Kutani ndza tshembha leswaku rifuwo ra minkateko ya Xikwembu ri tava ehenhla ka n'wina lahaya ehandle.

⁷ Nakona hi le ku tshembheni, ku nga ri khale hilaha swi nga kotekaka, ku endla e—e ndlela leyi hi nga tava na yona, laha hi nga ta hlanguka kun'we hinkwerhu ka hina, kumbexani ehansi ka tende lerikulu, laha ndzi titwaka ndzi susumetiwa hi xiviri ku ya chumayela hi Swimbitani swa Nkombo leswo hetelela eBibeleni.

⁸ Swingaleswi sweswi, leswaku hi nga hlweli eka dyondzo leyikulu mixo lowu... Ndzi lavile Hosi, ndzi ri karhi ndzi ehleketa leswaku, “ndzi nga vula yini?” ndzi ri karhi ndzi switiva leswaku lexi xi ngava xi ri xikhongelo xa hina xo hetelela lexi hi nga tava hi vile na xona. Ku Vuya ka Hosi ku le kusuhi swinene!

⁹ Ndza swi vona, endzhaku ka ku bvumbha loku ku endliweke eCalifornia, ku na tiyindlu lahaya handle, na tindhawu, leti mbombomelaka hi mpimo wa makume nharhu wa tiinci hi awara, mapulanga ya le ku pandzelelekeni ni ku tshovekela endzeni. Nakona a va switivi leswaku swi endliwa hi yini. Hi le makun'wini. Makaya ya madzana ya magidi ya tidolara, ya mbombomela. Ndzi na tinhloko-mhaka letikulu ephepheni, swifaniso, leswi ndzi languteleke ku swi tisa vusiku bya namuntlha, tani hi leswi ndzi lavaka ku vulavula hi swin'wana eka sweswo vusiku bya namuntlha.

¹⁰ Nakona, manuku, vusiku bya namuntlha hi na xikhongelo xa vavabyi. Tanani hi ndzhengha lowu, ntlhanu, awara ya ntsevu, kumbe hambu wu ngava nkarhi muni. Hi ta sungula ka hari na nkarhi, ndza ringanisa, leswaku vanhu va ta famba ka hari na nkarhi, na ku amukela swikhadani swa n'wina swa xikhongelo. Nakona hi tava hi ri karhi hi khongelela vavabyi evusikwini bya namuntlha, loko Hosi yi swi rhandza.

¹¹ Sweswi, endzhaku ka ku ehleketa loku taleriweke hi ku khongela, “Xana ndzi fanele ku endla yini?” ndzi ri karhi ndzi

switiva leswaku siku rin'wana ndzi ta fanela ku tihlamulela eka leswi ndzi swi vulaka lahawani. . . Kutani ndzi kunguhatile, kumbe ndzi titwile ndzi susumetiwa hi Moya lowo Kwetsima ku vulavula hi vuprofeta emixweni lowu, tani hi ku hi tivisa. Wa vona? I nchumu lowu hi. . . Loko hi nga tivisiwanga, nakona swin'wana na swin'wana swi humelela hi minkarhi nyana, hi ta fanela ku switiva mayelana na leswi. Moya lowo Kwetsima wu hi nyikile swona, ku tsundzuxa vanhu hi leswi nga eku teni. Ma swi tiva, Bibeke yi vurile, leswaku, "Xikwembu a xi endli nchumu Xi nga sungulanga xi kombisa malandza ya Xona, va nga vaprofeta." Nakona—nakona hilaha Yesu a tsundzuxeka vanhu, hi leswi nga ta humelela; hilaha vaprofeta va tsundzuxeka vanhu, hi leswi nga ta humelela. Kutani swi fanerile eka hina sweswi, eka awara leyikulu leyi hi hanyaka eka yona, ku vona leswaku i nguva muni leyi hi hanyaka eka yona, ni leswi humelelaka, leswi nga ta humelela eka nguva leyi. Kutani yin'wana ya tidyondzo leti nga tolovelekangiki leyi kumbexani hi yi hlayeke kotala, swi werile embilwini ya mina ku—ku vulavula ni vanhu mayelana na yona emixweni lowu.

¹² Sweswi a hi pfuleni Tibibele ta hina eka Matewu kuavanyisa ka vu24, kutani hi hlaya xiphemu xa Rito. [Makwerhu Branham a basisa nkolo wa yena—Muhleri.] Ndzi khomeleni. Tani hi ndlela yo—yo kuma mongo wa tsalwa ra hina na dyondzo.

¹³ Sweswi, tsundzukani leswaku hi ya eku dyondziseni ka leswi tani hi klilasi ya Bibeke, hi ku nonoka. Kumani tipenisele ta n'wina na maphepha. Ndzi na Matsalwa yo tala lawa ya tsariweke ehansi lahawani, lawa—lawa mi nga kotaka ku ya tsala ehansi. Kutani mi ya emakaya ni ku ya hlaya, hikuva leswi swi tani hi dyondzo ya xikolo xa Sonto, leswaku hi ta tiva, na ku tshinyiwa na ku va lava lulameleke awara leyi hi hanyaka eka yona.

¹⁴ Eka Buku ya Mukwetsimi Matewu. [Makwerhu Branham a basisa nkolo wa yena—Muhleri.] Ndzi khomeleni. Ndzimana ya vu24. . . Kumbe, kuavanyisa ka vu24, swa antswa, hi sungula hi ndzimana ya vu15, ndzi navela ku hlaya xiphemu xa Rito ra Xona.

Kutani loko mi vona manyala ya ku herisiwa, lawa ya variweke hi muprofeta Daniel, ya yimile exivandleni xo kwetsima, (loyi a hlayaka, a vi na ku twisisa:)

Kutani lava nga eYudea a va balekeli etintshaveni:

Loyi a nga ehenhla ka yindlu—ehenhla ka yindlu a nga xikeli ehansi ku ya teka swa le ndlwini ya yena:

Ni loyi a nga emasin'wini a nga tshuki a tlhelela ekaya ku ya teka tingwu ta yena.

Va tava ni khombo lava nga ni vana, ni lava va an'wisaka enkarhini wolowo!

Kambe khongelani leswaku ku baleka ka n'wina ku ngavi hi xixika, hambu kuri hi siku ra sabata:

Hikuva enkarhini wolowo ku tava ni nhlomulo lowukulu, lowu nga si tshamaka wu va kona hi mpfuka ku tumbulukile misava ku fikela sweswi, ee, nakona wu ngaka wu nga tlheli wu va kona.

Loko ngi masiku lawa ya nga hungutiwanga, a ku nga tava na munhu ni un'we loyi a nga ta ponisiwa: kambe hikwalaho ka vahlawuriwa masiku yalawa ya ta hungutiwa.

Kutani loko munhu wihi kumbe wihi a ku ka n'wina, Vonani, Krete u lani, kumbe lahaya; mi nga tshuki mi pfumela.

Hikuva ku ta humelela lava tivulaka Krete hi vunwa, na vaprofa va mavunwa, nakona va ta endla masingita lamakulu ni swihlamariso; swonghasi lero, loko swi nga koteka, va ta hambukisa na vona vahlawuriwa.

Maswivona, ndzi rhangile ndzi mi byela.

Hikwalaho loko vaku ka n'wina, Vonani, u le mananga; mi nga yi kona: vonani, u le xivandleni xa le xihundleni; mi nga tshuki mi pfumela.

Hikuva kukotisa loko rihati ri huma evuxeni, kutani ri hatima ku ya fika evupela-dyambu; swi tava tano ni hi ku vuya ka Nwana wa munhu.

Hikuva laha ntsumbu wu nga kona, hilaha magama ya nga ta hlengeletana kona . . .

¹⁵ Sweswi, eka dyondzo, ndzi ta tsakela ku teka ndzimana ya vu24, ku tlhokovetsela eka ndzimana leyi eka dyondzo ya hina ya xikolo xa Sonto emixweni lowu. Kutani yingiselani hi vukheta loko ndzi ri karhi ndzi yi hlava, nakambe.

Hikuva ku ta humelela lava tivulaka Krete hi vunwa, ni vaprofa va mavunwa, nakona va ta endla masingita lamakulu ni swihlamariso; swonghasi lero, loko swi nga koteka, va ta hambukisa na vona vahlawuriwa.

¹⁶ Sweswi tani hi dyondzo emixweni lowu, kumbe tsalwa, kumbexani, ndzi lava ku teka: *Vatotiwa Enkarhini Wa Makumu*. Yaleyo i dyondzo leyi ndzi lavaka ku vulavula hi yona, kumbe tsalwa: *Vatotiwa Enkarhini Wa Makumu*.

¹⁷ Ndzi pfumela leswaku hi hanya enkarhini wa makumu. Ndzi ehleketa swinene leswaku un'wana ni un'wana . . . Muhlayi wa Matsalwa, kumbe hambu e—e mupfumeri, wa swi tiva leswaku sweswi hi le makumu ka matimu ya misava. A swi nga ha ta pfuna nchumu ku ya tsala, hikuva a ku ngavi na munhu loyi a nga ta ya hlava. Ya le makumu ka nkarhi. Kuri hi rini, a ndzi switivi. Kuri wu tava wu lehisile ku yini, hambu ku ri Tintsumi ta

Tilo a ti yi tivi minete kumbe awara ya kona. Kambe hi byeriwile hi Hosi Yesu, leswaku, loko swilo leswi hi swi vonaka sweswi swi sungula ku humelela, kutani hi tlakusa tinhloko ta hina hikuva ku kutsuriwa ka hina ku le kusuhi. Sweswi, xana “ku le kusuhi” swivula yini, a ndzi switivi. Swi nga vula . . .

¹⁸ Tani hilaha vativi va sayense va swi vuleke siku rin’wana, eka thelevhixini, va vulavula hi ku phemeka lokukulu ka magidi ya timayili emisaveni loku nga ta mbombomela. U vutisiwile xivutiso, “Ku nga mbombomela lahaya?” Yaleyo i Los Angeles, West Coast. Nakona votala va n’wina mi swi vonile hilaha va ku landzeleriseke hi rheyidara, ni ku hundza hi le henhla ka . . . ku phemeka ehansi ka San Jose, ku hundza hi ku tsemakanya eAlaska, ehandle ku hundza hi le Aleutian Islands, kwalomu ka madzana mambirhi ma timayili ehandle ku nghena elwandle, ni ku vuyela endzhaku ku nghena eSan Diego, ku rhendzeleka hi le ndzhaku ka Los Angeles, kutani ku boxeketa lahaya, xikhwama lexikulu.

Swingaleswi hinkwako ku ninginika ka misava loku hi veke na kona i vholikhenu leyi beke goji ro enta swinene, ku fana, na lahaya. A ndzi nge swikoti ku vula vito leri va—va thyeke rona. Hambi swi ri tano, loko sweswo swi ninginika, swi nyika ku ninginika ka misava loku hi veke na kona hi malembe eWest Coast. Sweswi ku pandzelelekile ku rhendzeleka hinkwako. Nakona vativi va sayense va teri, rin’we . . .

¹⁹ Wanuna u teri eka loyi un’wana, “Sweswo swi nga wela endzeni?”

A ku, “Ku nga ri ‘swi nga,’ kambe swi ta wela.”

A ku, “Kambe ku nga ri eka rixaka ra hina, kumbexani?”

A ku, “Eka ntlhanu wa timinetse leti landzelaka, kumbe ntlhanu wa malembe lawa ya landzelaka. A hi switivi ku ri rini.”

²⁰ Vhiki leri, ndzi rhumeriwile tinhloko-mhaka ephepheni, ta makaya lamakulu yo durha madzana ya magidi ya tidolara lama pandzekaka ni ku pandzeleleka, vanhu va ri ekuyeni ekule. Nakona a va switivi hilaha va nga swi yimisaka ha kona. A kuna ndlela ya ku swi yimisa. Wa vona, Xikwembu xi nga endla swin’wana na swin’wana leswi Xi swi lavaka, nakona a ku na loyi a nga Xi byelaka hilaha xi nga swi endlaka hakona.

²¹ Mi aka makaya, mi nga ha endla swilo swa sayense, nakona Xikwembu hi xona Mutumbuluxi wa sayense. Xana mi nga Xi yimisisa ku yini? Xi nga herisa misava mixo lowu hi tinhwala loko Xi swi lava. Xana ma swi lemuka, Xi nga vulavula kuva tinhwala ti va kona, nakona ti ngava eka makume mune wa timayili hi ku enta eka hafu ya awara ya nkarhi, wa vona, a ku na . . . ni ku dya vanhu kusuka ehansi. Hi xona Xikwembu. Xi endla ntsena hilaha Xi nga rhandzaka ha kona. Hi xona mufumi, eka xona N’winyi.

²² Sweswi, hi ku vona ku andza hinkwako loku ka vumbhoni, leswaku awara leyi hi hanyaka eka yona, ndzi ehleketa leswaku i nchumu wa kahle ku pfluxeta swilo leswi ni ku swi humesela ehandle, tani hi leswi Swilemo swi lemuriweke, ni ku kumisisa ntiyiso wa swilo leswi, tani hilaha Xikwembu xi veke loyi a tshembhekeke eka hina, hi tintswalo ta Xona, ku hi kombeta swilo leswi.

²³ Ndzi lava leswaku mi xiyisisa laha eka Matewu 24, Yesu u tirhisile rito ra “Vakreste,” V-a-k-r-e-s-t-e, “Vakreste.” Kungari Kreste, kambe “Vakreste,” evunyingini, kungari vun’we. “Vakreste.” Hikwalaho, rito *Kreste* ri vula “Mutotiwa.” Kutani loko kuri ku i “vatotiwa,” a ku ngavi un’we ntsena, kambe votala, vatotiwa, “lava totiweke.” Wa vona?

²⁴ Handle ka swona, loko A swi lavile ku swi olovisa leswaku hi xitalo kumbe swintsongo hi swi twisisa ku antswa, A ta ku, “Emasikwini ya makumu ku ta humelela va mavunwa, lava va nga na ntoto.” Sweswi, sweswo swi tikomba swi nga koteki, wa vona, marito ya “vatotiwa.” Kambe xiyisisani marito lawa ya landzelaka, “na vaprofeta va vunwa,” v-a-p-r-o-f-e-t-a, evunyingini.

²⁵ Sweswi, *loyi a totiweke*, hi, “loyi a nga na hungu.” Kutani ndlela yin’we ntsena leyi hungu ri nga humeseriwaka ehandle yi hi *loyi a totiweke*, nakona yaloye u tava muprofeta, mutotiwa. “Ku ta humelela va mavunwa, vadyondzisi lava totiweke.” Muprofeta u dyondzisa leswi hungu ra yena ri nga xiswona. Vadyondzisi lava va totiweke, kambe vanhu lava va totiweke ni ku dyondzisa ka vunwa. Lava va totiweke, “Vakreste,” evunyingini; “vaprofeta,” evunyingini. Kutani loku kuriku wu kona nchumu wo tani hi e—e Kreste, vun’we, kutani lava va ta fanela kuva “lava va totiweke,” leswaku vuprofeta bya vona eka leswi a va ri eku swi dyondziseni byi tava ku hambana, hikuva hi vona lava va nga na ntoto, vatotiwa.

²⁶ Sweswi, i dyondzo ya xikolo ya Sonto, hi lava ku—ku ringeta ku swi tisa leswi eka nkombiso wa xiviri, hi Matsalwa, kungari hi leswi vuriweke hi munhu un’wana mayelana na swona, kambe ku hlaya Matsalwa ntsena.

Mi nga ku, “Leswi swi nga endlekisa ku yini xana? Xana lava va totiweke . . . ? Xana a va ri vahi?”

²⁷ “Vakreste,” V-a-k-r-e-s-t-e, vatotiwa. “Vakreste, na vaprofeta va vunwa.” Lava va totiweke, kambe va ri vaprofeta va vunwa!

Yesu u vurile, leswaku, “Mpfula yi nela lavo lulama ni lavo hamboloka.”

²⁸ Sweswi, un’wana a ngaku eka mina, “Xana wa pfumela leswaku ntoto lowu nga eka vanhu valava i ntoto wa Moya lowo Kwetsima?” Ina, nkulukumba, Moya lowo Kwetsima wa xiviri

wa Xikwembu ehenhla ka munhu, nakona hambwi swi ri tano i va vunwa.

Sweswi yingisani swinene kutani mi vona leswi A swi vuleke. “Nakona va ta endla masingita na swihlamariso, swonghasi lero swi nga hambukisa na vona Vahlawuriwa loko swi nga koteka.” Kutani va totiwile hi Moya lowo Kwetsima wa xiviri. Ndza switiva leswaku leswi swi twakala tani hi vuphukuphuku, kambe hi ya eku tekeni ka nkarhi ni ku swi hlamuseta hi Rito, leswaku sweswo hakunene hi LESWI HOSI YI SWI VULAKA, i Ntiyiso.

²⁹ Sweswi a hi pfuleni Tibibele ta hina, minete ntsena, eka Matewu kuavanyisa ka vu5, kutani hi sungula hi—hi ndzimana ya vu45, ni ku vona sweswi loko hi ri karhi hi hlaya eka xinkadyana xintsongo eMatsalweni lawa. Kutani, endzhaku ka loko hi fikile lahawani, hikwalaho ka yini, hi ta mi nyika. . . Swingaleswi n’wina, loko hi tsandzeka ku ya hlaya hinkwawo ka wona, kutani mi kuma Tibibele ta n’wina; kutani—kutani na n’wina mi ta ya hlaya endzhaku kaloko hi fambile lahawani na n’wina mi ya emakaya, nakona—nakona mi hlaya leswi Bibeleyi swi vulaka mayelana na swona.

³⁰ Ku teka nkarhi wa hina sweswi, ku kuma e—e mhaka ya masungulo, hikuva ndzi le ku endleni ka xitatimende lexi hlamarisaka lahawani. Xana Moya lowo Kwetsima wu nga n’wi totisa ku yini mudyondzisi wa vunwa xana? Kambe sweswo hi leswi Yesu a vuleke leswaku swi ta humelela.

Sweswi, Matewu, kuavanyisa ka vu5, ndzimana ya vu45, a hi hlayeni sweswi. A hi yi kumeni, hi sungula e—e swintsongo endzhaku ka yona, ya vu44.

Kambe mina ndzi ri eka n’wina, Rhandzani lava va nga valala eka n’wina, mi katekisa lava va mi rhukanaka, mi endla leswinene eka lava va mi vengaka, . . . mi khongelela lava va mi tirhisaka ku nga ri hi ku tiyimisela, ni ku mi xanisa;

Leswaku mi hundzuka vana va Tata wa n’wina loyi a nge matilweni: hikuva u tuvukisa dyambu ra yena ehenhla ka lavo biha ni. . . lavo saseka, ni ku nisa mpfula ehenhla ka lavo lulama ni. . . lavo homboloka. (Mpfula yi nela lavo homboloka ni lavo lulama.)

³¹ Sweswi ku landzelerisa leswi, eka vuprofeta byin’wana mayelana na leswi, hi nga pfula sweswi eka Vaheveru kuavanyisa ka vu6, eka ndzimana leyi landzelaka yo landzelerisa leswi, laha Paul a vuyiselaka emiehleketweni nchumu lowu fanaka lowu vuriweke hi Yesu. Paul, wa vulavula sweswi. Loko ma ha yi hlota. . . Kutani n’wina mi nga le handle eka vuhaxi, tshinetani Tibibele ta n’wina ekusuhi na n’wina na xiphaphani, nakona mi languta eka leswi sweswi. Vaheveru, kuavanyisa ka vu6, Paul a tsalela Vaheveru, a va kombeta mindzhuti na swifananiso, a va

tisa kusuka ehansi ka Vuyuda kuya eka Vukreste, a va kombeta hilaha swilo hinkwaswo swa khale ntsena swiveke ndzhuti wa le mahlweni wa swilo leswi nga ta ta. Paul wa vulavula sweswi, Vaheveru 6.

Hikokwalaho a hi tshikeni tidyondzo ta masungulo ta rito ra Kreste (K-r-e-s-t-e, vun'we), hi kongoma eku hetisekani; hi nga tlheli hi veka nakambe masungulo ya ku hundzuka . . . mintirho leyi feke, ni ya ku pfumela eka Xikwembu.

Ni ya . . . dyondzo ya ku khuvula, ni ya ku tlhandleka ka mavoko, ni ya ku pfuka ka lava feke, ni ku avanyisa loku nga heriki.

Kambe hi ta endlisa sweswo, loko Xikwembu xi hi pfumelela.

Hikuva swi ngaka swi nga endleki leswaku lava nga voningiwa kan'we, ni ku nantswa ku ha ka le tilweni, lava avariweke Moya lowo Kwetsima,

Ndzi lava leswaku mi yingisela swintsongo. Xana mi swi lemukile, yaleyo i “nyiko,” nakona kungari “tinyiko;” lava averiweke “tinyiko ta le tilweni”? Kambe, “nyiko ya le tilweni,” vun'we; “Kreste,” vun'we; “nyiko,” vun'we.

. . . ku ha kale tilweni, ni . . . ku endlwa vaaveriwa va Moya lowo Kwetsima,

Lava engeteke va nantswa swa . . . rito ra Xikwembu, . . . (va nantswile yini?) . . . rito ra Xikwembu, ni matimba ya misava leyi nga ta ta,

Kutani loko va nga khugunyeka, swi ngaka swi nga endleki leswaku va tlhela va hundzuka; hikuva va engeta va tivambela Nwana wa Xikwembu, ni ku n'wi khomisa tingana.

Hikuva, (yingiselani) misava . . . yi nwa mati ya mpfula leyi yi nelaka, ku mirisa swimilani leswinene leswi pfunaka lava tirimelaka yona, yi kuma ku katekisiwa hi Xikwembu:

Kambe loko yi ri leyi humesaka mitwa . . . mahlwehlwe ya tshinyiwa, yi va yiri ekusuhi ni ku rhukaniwa; kutani yi ta hela hi ku tshwa.

³² Sweswi pimanisani sweswo ni Matewu 5:24 nakambe. Xiyisisani, Yesu u teri mpfula ni dyambu swi ta ehenhla ka misava, leswi Xikwembu xi swi rhumelaka ku ta lulamisa swakudya ni swilo swa vanhu va misava. Nakona mpfula yi rhumeriwela swakudya, swimilani. Kambe mfava, nhova, kuva swi ri esin'wini, swi kuma nchumu lowu fanaka. Mpfula yona leyi endlaka leswaku koroni yi kula i mpfula yin'we leyi endlaka leswaku nhova yi kula.

³³ Hilaha ndzi veke na dyondzo yo tano eka sweswo nkarhi wun'wana, loko ndzi ta hlangana na vanhu va Pentekosta ro sungula! Nakona a kuri dyondzo leyikulu eka mina. Ndzi vonile vavanuna vambirhi, un'we. . . A ndzi nga se tshama ndzi twa ku vulavula hi tindzimi. Un'we u vulavurile hi tindzimi, loyi un'wana a titolokela, ku nyiketaniisa xisweswo. Nakona a va vula ntiyiso, va ku, "Ku na votala lahawani lava faneleke ku hundzuka eka vusiku lebyi. Ku na vavasati na vavanuna, ha vumbirhi." Kutani vanhu a va yima ni kuya eka altari.

Ndzi ehleketa, "Hilaha swi kwetsimaka hakona!"

³⁴ Swingaleswi hi nyiko leyintsongo ya Moya lowo Kwetsima, ndzi vulavurile na vavanuna lavaya, ntsena, ma swi tiva ku hi ndlela yihi, hi ku kambisisa, ntsena hi ndlela leyintsongo ya ku kumisisa. Kutani un'we wa vona a ri Mukreste wa xiviri, nakona a ri nandza wa Krete wa ntiyiso, kutani loyi un'wana a ri mutikukumuxi. Nakona un'we wa vona, loyi a ri mutikukumuxi, a tshama na wansati wa nhloko ya ntima, a tsutsuma hinkwako ni wa misisi ya nsuku wo kwalala nakona a ri na vana na yena. Hi swona, a swi ri lahaya eka xivono; a swi nga tsan'weki. Kutani ndzi vulavurile na yena mayelana na swona. U ndzi langutile kutani a famba a rhendzeleka hi muako.

³⁵ Sweswi a ndzi nga ha twisisi nchumu, kunene-nene. A ndzi ehleketa leswaku ndzi yile eka tintsumi, swingaleswi ndzi tivutisile loko ndzi ngari exikarhi ka vajavulosi. Xana leswi swi nga endlekisa ku yini? A ndzi kotanga ku swi twisisa. Nakona eka malembe yo hlanya ndzi vekile mavoko ya mina ekule na swona, kufikela siku rin'wana laha. . .

George Smith, jaha leri fambaka na n'wana wa mina wa xisati, hi yile tolo, ehenhla endhawini ya xigayo xa khale laha ndzi yaka ku ya khongela kona.

Kutani endzhaku ko va lahaya masiku ma nga ri mangani, Moya lowo Kwetsima wu ndzi vuyiserile Tsalwa leri: "Hikuva mpfula yi nela misava hakanyingi ku yi ambexa hi swimilani, kambe mitwa na mahlwehlwe swi hanya hi yona mpfula leyi fanaka, kutani makumu ya swona i ku tshwa." Swi hanya hi xitirhisiwa xin'we lexi nyikaka vutomi xa Xikwembu. Kutani ndzi swi twisisile sweswo. "Hi. . ." Yesu u teri, "Hi mihandzu ya vona mi tava tiva."

³⁶ Sweswi, hikwalaho, ku thona ka mpfula ehenhla ka swimilani swa ntumbuluko wa misava, i xifananiso xa mpfula ya Ximoya leyi nyikaka Vutomi lebyi nga Heriki, yi thonela ehenhla ka Kereke, hikuva hi yi vitana mpfula ya xirimu na mpfula ya rihunga. Nakona i mpfula, leyi chululekaka ku huma eka Moya wa Xikwembu, ehenhla ka Kereke ya Xona.

³⁷ Xiyisisani, i nchumu lowu nga tolovelekangiki lahawani. Wa vona? Loko yona mbewu yi nghena ehansi, swi ngari na mhaka leswaku yi fikisile ku yini lahaya, xo sungula a yi

ri mitwa. Kambe lahaya koroni leyi yi ngheneke ehansi ka misava, na swimilani, xo sungula a swi ri swimilani. Kutani ku va ximilani xin'wana ni xin'wana xi titswala xona hi xoxe, minkarhi hinkwayo, swi kombisile leswaku a xiri eka masungulo ya xiviri.

³⁸ “Nakona va ta hambukisa Vahlawuriwa loko swi nga koteka,” hikuva va le ku kumeni ka mpfula leyi fanaka, minkateko leyi fanaka, va kombeta masingita lawa ya fanaka, swihlamariso leswi fanaka. Wa vona? “Va ta hambukisa, kumbe va nga hambukisa Vahlawuriwa loko swi nga koteka.” Sweswi, mutwa wu ngaka wu nga wisi ku tiputa kuva mutwa, hambu yi ri koroni yi ngaka yi nga wisi ku tiputa kuva koroni; hi leswi Mutumbuluxi wa xin'wana ni xin'wana a swi boheke emasunguleni. Yaloye i Muhlawuriwa. Mpfula leyi fanaka!

³⁹ Dyambu ri xa ni mixo ni ku hangalaka ku tsemakanya hi misava, tani hi leswi ri swi endleke emisaveni leyi ni le ka siku leri hi hanyaka eka rona. Kutani dyambu, dyambu leri fanaka leri humaka eVuxeni ka hari rona dyambu leri pelaka eVupela-dyambu. Nakona dyambu rero ri rhumeriwile ku ta vupfisa mbewu ehenhla ka misava, leyi mimiri ya hina yi endliweke kusuka kona.

⁴⁰ Hi hanya hi swilo leswi feke. Hi yona ndlela yi ri yoxe leyi hi nga hanyaka ha yona. Nakona loko kuruku nchumu wun'wana wu fanele ku fa masiku hinkwawo leswaku mi ta hanya, hi ntumbuluko, kutani xana a hi ntiyiso leswaku loko ya n'wina . . . Mimiru ya n'wina yi fanele ku hanya hi swilo leswi feke, eka vutomi bya ntumbuluko, swingaleswi mi fanele kuva na Swin'wana leswi nga ta fa, hi ximoya, ku ponisa vutomi bya n'wina bya ximoya. Kutani Xikwembu, xi hundzukile xibye, nyama, ni ku fa leswaku hi ta kota ku hanya. Ku hava kereke, a ku na nchumu wun'wana emisaveni lowu nga mi ponisaka handle ka Xikwembu. Hi wona nchumu wu ri woxe lowu va hanyaka hi wona.

⁴¹ Sweswi tsutsumisani Matsalwa. Yesu i Rito. “Ekusunguleni Rito a ri ri kona. Kutani Rito ri endliwile nyama ni ku aka exikarhi ka hina. Ekusunguleni Rito a ri ri kona, nakona Rito a ri ri na Xikwembu. Kutani Rito ri endliwile nyama, nakona Ri hanyile, ri tshama exikarhi ka hina.” “Nakona munhu a ngaka a nga hanyi hi vuswa ntsena,” eka swa xinyama, “kambe hi Rito rin'wana na rin'wana leri humaka enon'weni wa Xikwembu.” Swingaleswi, ma swi vona, hi hanya hi Rito, nakona rero i Xikwembu.

⁴² Sweswi dyambu riya hinkwako ni ku vupfisa mbewu. Sweswi, ri ngaka ri nga yi vupfisi hinkwayo xikan'we. Loko yi ri karhi yi ya emahlweni, yi kula, yi ya yi vupfa ku kondza yi va xifaki xo helela.

Swingaleswi swi tano, namuntlha, hi Kereke. Yi sungurile eka vuhlangi bya yona, endzhaku eka nguva ya munyama, laha a yi ri ehansi ka misava. Yi kurile sweswi kuva leyi vupfeke. Nakona ha swi vona sweswi, hi ku hetiseka, hilaha Xikwembu hi ntumbuluko eminkarhini hinkwayo . . .

⁴³ Mi ngaka mi nga wu kanganyisi ntumbuluko. Sweswo hi swona xiphiso namuntlha. Hi le ku hahiseni ka tibomo, nakona ehandle eka lwandle rero, ku ri handzula ni ku ri bulukerisela hinkwako hi tibomo ta athomiki. Mo va ntsena eku tshoveleleni ka vunyingi bya thyaka rero hi nkarhi hinkwawo, mi ri wisela endzeni ka rona. Mi tsemelela minsinya; mabubutsa ya ta mi teka. Mi endla damu hi nambu; ri ta khapakhapa.

Mi fanele ku kuma ndlela ya Xikwembu yo endla swilo kutani mi tshama eka yona. Hi endlile tidinominexini hi vanhu etikerekeni na mavandla; vonani leswi hi swi kumeke! Tshamani endleleni ya kona leyi nyikiweke hi Xikwembu.

⁴⁴ Kambe, ma swi vona, “U nisa mpfula,” ku tlhelela eka dyondzo ya hina, “ehenhla ka lavo lulama ni lavo hamboloka.” Yesu wa mi byela sweswi lahawani, eka Matewu 24, swi tava mfungo enkarhini wa makumu.

Sweswi, loko kuruku mfungo lowu wu ta tiviwa ntsena hi nkarhi wa makumu, kutani ku ta fanela kuva endzhaku ka ku lemuriwa ka Swilemo leswiyani. Wa vona? I mfungo wa makumu. Sweswo swi tava, loko swilo leswi swi humelela, ku tava kuri enkarhini wa makumu. Nakona wu tava wuri mfungo, sweswi, swingaleswi Vahlawuriwa va ngaka va nga pfilunganyeki eka swilo leswi. Ma swi vona? Kutani, swi fanele ku paluxiwa, swi vekiwa erivaleni.

⁴⁵ Xiyisisani, ha vumbirhi koroni na nhova swi hanya hi Ntoto wun’we wa le Tilweni. Ha vumbirhi swa tsaka hikwalaho ka Wona.

Ndzi tsundzuka leswi, ku kongomisa endzhaku eka nkarhi lowu ehenhla siku leriya eGreen’s Mill. Ndzi—ndzi vonile xivono xexo xi humelela. Kutani a kuri na misava yo tala, nakona hinkwayo a yi pfukuleriwe ehenhla. Kutani ku yile Muhaxi emahlweni, ku sungula. Ndzi lava ku veka sweswo emahlweni ka n’wina. Vonani leswi yaka emahlweni ku sungula, kutani leswi swi landzelaka. Nakona loko Wanuna loyi a ambaleke swo basa a humelerile emisaveni hinkwayo, a ri karhi a haxa mbewu, kutani endzhaku ka Yena ku tile wanuna, loyi a ambaleke swiambalo swa ntima, a languteka a ri eku ngungumeleni, a nyengeletela hi le ndzhaku ka Yena, a ri karhi a haxa nhova. Kutani loko leswi swi ri karhi swi humelela, swingaleswi ndzi vonile swirimiwa ha vumbirhi swi mila. Nakona loko swi ri karhi swi mila, xin’we akuri koroni kutani lexin’wana a kuri nhova.

Kutani hiloko ku fika dyandza, lero loko, swi languteka tani hiloko, ha vumbirhi bya swona a swi korhamisele tinhloko ta

swona ehansi swi ri karhi swi rilela mpfula. Kutani hiloko ku ta papa lerikulu ehenhla ka misava, nakona yi nile. Swingaleswi koroni yi pfukile ni ku vula leswaku, “A ku dzunisiwi Hosi! A ku dzunisiwi Hosi!” Nakona nhova yi pfukile ni ku huwelela, “A ku dzunisiwi Hosi! A ku dzunisiwi Hosi!” Mbuyelo wun’we. Ha vumbirhi ka swona swi ri ekufeni, ha vumbirhi ka swona swi ri kuyeni ekule. Kutani koroni yi pfuka ni ku khomiwa hi torha. Nakona hikwalaho kova kuri ensin’wini yin’we, ntanga wun’we, ndhawu yin’we, ehansi ka ncheleto wun’we, hi lahaya ku mirile koroni nakona hi lahaya ku mile mfava hi nchumu lowu fanaka. Xiyisisani, mati lawa ya fanaka ya ntoto ya humesa koroni, ya humesa nhova.

⁴⁶ Wona Moya lowu Kwetsima lowu totaka Kereke, lowu va nyikaka ku navela ka ku ponisa mimoya, lowu va nyikaka matimba ya ku endla mahlori, Wu wela ehenhla ka lavo homboloka ku fana ni lavo lulama. Wona Moya lowu fanaka! Sweswi, u ngaka u nga swi endli hi ndlela yin’wana kutani u twisisa Matewu 24:24. U teri, “Ku ta humelela Vakreste va mavunwa,” va vunwa, lava va totiweke. Va totiwile hi Nchumu wa xiviri, kambe va ri vaprofeta va vunwa bya Wona, vadyondzisi va vunwa bya Wona.

Xana i yini lexi nga endlaka leswaku wanuna a lava kuva mudyondzisi wa vunwa bya nchumu lowu nga Ntiyiso? Sweswi hi ta nghena ehansi eka mfungho wa xivandzana eka timinetse tintsongo, kutani mi ta swi vona leswaku i dinominexini. Wa vona? Vadyondzisi va mavunwa; va mavunwa, vatotiwa. Vakreste lava nga totiwa, kambe vadyondzisi va mavunwa. Hi yona ndlela yinwe leyi mi nga swi vonaka hakona.

⁴⁷ Ntsena kukotisa lahawani eka nkarhi wun’wana lowu hundzeke, ndzi swi tshahile leswi. Ndzi nga swi tshaha hikuva hi hlanganisiwile ku tsemakanya hi tiko. Siku rin’wana a ndzi ri eku vulavuleni na munghana wa mina, laha leswi swi nghanaka kona emixweni lowu, eArizona. Nakona a ri na—na purasi ra xilamula. Kutani a ri na nsinya lahayani lowu a wu ri mulamula lowu a wu tswala mabambalakuza, na swibomu, swinerekisi, tangelo. Nakona ndzi rivele leswaku a kuri tinxaka tingani ta mihandzu leyi a yi ri kwalahaya ensinyeni lowuya wun’we. Kutani ndzi ku eka—eka—eka wanuna, ndzi ku, “Wu njhani? I nsinya wa muxaka muni walowo?”

A ku, “Nsinya, wona hi woxe, i mulamula.”

Ndzi ku, “Hikokwalaho ka yini wuri na mabambalakuza eka wona? Hikokwalaho ka yini wuri na swibomu eka wona?”

A ku, “Swirhabyana swa yona swi namarhetiwile eka wona.”

Ndzi ku, “Ndza swi vona. Hi swona, sweswi,” ndzi ku, “sweswi, lembe leri taka loko nsinya walowo wu ta tswala yin’wana mihandzu,” leyi hinkwayo yi vupfaka hi nkarhi wun’we, ndzi ku, “swingaleswi wu ta tswala malamula

hinkwako. Loko wuri nsinya wa malamula ya navhele, wu ta tswala malamula ya navhele, a hi swona, nkulukumba?”

A ku, “Ee, nkulukumba. Xirhabyana xin’wana ni xin’wana lexi namarhetiweke xi ta tswala muxaka wa xona.”

Ndzi ku, “U vula leswaku xirhabyana xa xibomu xi ta tswala xibomu kwalahaya ensinyeni wa mulamula?”

A ku, “Ina, nkulukumba.”

“Xana bambalakuza ri ta tswala bambalakuza kwalahaya ensinyeni wa mulamula?”

A ku, “Ina, nkulukumba. Walowo i ntumbuluko wa rhavi leri namarhetiweke eka wona.”

Ndzi ku, “A ku dzunisiwi Xikwembu!”

A ku, “U vula yini xana?”

Ndzi ku, “Xivutiso xin’wana xo tatisa. Sweswi, xana nsinya walowo wa mulamula wa ha ta tlhela wu tswala malamula nakambe?”

A ku, “Loko wu humesa rhavi rin’wana.” Loko wu humesa rhavi rin’wana, kungari loko rin’wana ri namarhewile eka wona. Kambe, hinkwayo i mihandzu ya xilamula, nakona yi hanya hi vutomi bya xilamula lebyi nga eka nsinya walowo wa xilamula.

⁴⁸ Ndzi ku, “Hi sweswo! Methodist yi ta tswala Mamethodist, nkarhi hinkwawo. Baptist yi ta tswala Mabaptist, nkarhi hinkwawo. Khatholiki yi ta tswala Makhatholiki, nkarhi hinkwawo. Kambe Kereke ya Xikwembu lexi hanyaka yi ta humesa Krete kusukela erimintswini, Rito nkarhi hinkwawo, loko ri nga tlhela ri humesa rhavi ra rona N’winyi.”

⁴⁹ Sweswi, mi nga ri namarheta lahaya, ma vona. Bambalakuza rin’wana na rin’wana, xibomu, tangelo, xinerekisi, hambu yi ngava mihandzu ya xilamula muni, wun’wana na wun’wana wa yona wu nga hanya ensinyeni walowo; kambe wu tswala vumbhoni bya vunwa hi nsinya, wu ri karhi wu hanya ensinyeni. Ma swi vona xana? Yi hanya ni ku kula hi vutomi bya xiviri lebyi nga ensinyeni walowo.

Sweswi, hi yaleyo Matewu 24:24, ku hanya hi Vutomi lebyi fanaka, kambe a yi nga lulamanga, eku sunguleni. Yi tswala vumbhoni bya vunwa hi Nsinya walowo! I nsinya wa mulamula, hambu swi ri tano i nsinya wa xilamula. Nakona va ri, “Kereke leyi, dinominexini leyi yi byarhile rhekhodi ya Krete,” ni kuva na nkhubulo wa vunwa, vumbhoni bya vunwa bya Rito, va ringeta ku vula leswaku matimba ya Xikwembu a ya ri na vadyondzisiwa ntsena.

Yesu, hi Yexe, u teri, “Fambani emisaveni hinkwayo kutani mi chumayela Evhangelu eka rhavi rin’wana na rin’wana leri nga ta . . . nsinya lowu nga ta tswala, rhavi rin’wana na rin’wana

leri nga tava ensinyeni walowo. Kutani masingita lawa ya ta landzelela marhavi ya xiviri.” Kwihi? Ntsena loku wu ri Nsinya, ntsena loko Wu humesa marhavi, ku fika emakumu ka misava. “Hi Vito ra Mina va ta hlongola mademona; va ta vulavula hi tindzimi letintshwa; va khoma tinyoka; va nwa swilo leswi dlayaka; va thandleka mavoko ehenhla ka vavabyi nakona va ta hola.” Ma yi vona awara leyi hi hanyaka eka yona? Ma swi vona leswi Yesu a swi vuleke?

⁵⁰ Tsundzukani, leswi swi le nkarhini wa makumu, kungari le ndzhaku ehansi ka Wesley ni le ndzhaku lahaya. Sweswi, enkarhini wa makumu, leswi swi ta humelela.

Sweswi langutisani Matswalwa; Ya pfumeleleni ya vula vumbhoni. Yesu u teri, “Kambisisani Matsalwa, hikuva eka Wona mi ehleketa, kumbe ku pfumela, leswaku mi na Vutomi lebyi nga Heriki, nakona hi Wona Lawa ya vulaka vumbhoni bya Mina.” Hi marito yan’wana, loko nsinya lowu wu humesa rhavi... “Hi mina nsinya wa Vhinya, Nsinya; n’wina mi marhavi. Loyi a pfumelaka eka Mina, mintirho leyi Ndzi yi endlaka u ta yi endla na yena,” Mukwetsimi Yohana 14:12.

⁵¹ Sweswi, “Loyi a tshamaka eka Mina, loyi a...loyi a ri erimitswini ra Mina ekusunguleni.”

Xexo hi xona xivangelo Yesu a ri ha vumbirhi Rimintsu na Ximitswana xa Davida. U vile kona ku nga si va na Davida, eka Davida, na le ndzhaku ka Davida, ha vumbirhi Rimintsu na Ximitswana xa Davida; Nyeleti ya Mahlahle, Xiluva xa Saroni, Konwa ya Minkova, Alfa na Omega; Tatana, N’wana, na Moya lowo Kwetsima. “Eka Yena ku tshamile ku hetiseka ka vunharhu bya miri wa Xikwembu.” Ha vumbirhi Rimintsu na Ximitswani xa Davida!

“Loyi a nga Vutomi lebyi hlawuriweke, Vutomi lebyi hlawuleriweke emahlweni, lebyi nga eka Mina,” nakona hi Yena Rito, “kusukela ekusunguleni; loko a humelela, u ta tswala mihandzu ya Mina.” Mukwetsimi Yohana 14:12.

Kambe lavan’wana va ta hanya hi nchumu lowu fanaka, va tivitana Vakreste na vapfumeri. “Kungari hinkwavo lava nge, ‘Hosi, Hosi,’ va nga ta nghena endzeni.”

Sweswi, leswi swi ta humelela ni ku vonakarisiwa eka masiku ya makumu, “loko swihundla swa Xikwembu swi ta hetisisiwa,” tani hilaha hi nga ta nghena eka swona kungari khale.

⁵² Minsinya leyi, nsinya wa ntiyiso wa vhinya na nsinya wa vunwa wa vhinya! Mi ndzi twile ndzi chumayela hi sweswo kusukela, kusukela malembe lawa ya hundzeke, hilaha yi kuleke swin’we. Ndzi va tisile ha un’we-un’we ni ku kombisa leswaku, kusuka eka Kayini na Abel, minsinya yimbirhi leyi hlanganeke ealtareni; ha vumbirhi a yi ri vakhongeri, ha vumbirhi a yi totiwire, ha vumbirhi a yi navela vutomi, ni ku gandzela

Xikwembu lexi fanaka. Kutani un'we u ariwile nakona loyi un'wana u amukeriwile.

Nakona ndlela yin'we ntsena leyi loyi a amukeriweke a nga vaka a endlile xin'wana ku hambana na makwavo wa yena, i kuva yi paluxiwile eka yena. Hikuva Bibeke yi teri, "Hi ripfumelo..." Vaheveru, kuavanyisa ka vu11, "Hi ripfumelo Abel u humeserile Xikwembu magandzelo lama tlulaka ya Kayini, laha Xikwembu xi tiyisiseke vumbhoni bya leswaku u lulamile."

Yesu, u teri, nhlavutelo wa ximoya wa leswaku A ri Mani! "Xana vanhu va ri Mina N'wana wa munhu hi mina mani?"

A ku, Petro a ku, "U Krete, N'wana wa Xikwembu lexi hanyaka."

"U katekile, Simon—Simon, n'wana Yona; a hi nyama na ngati leswi ku paluxeleke sweswo. Tata wa Mina loyi a nga eTilweni hi yena a swi paluxeke. Ehenhla ka ribye leri Ndzi ta aka Kereke ya Mina," (yini?) nhlavutelo wa ntiyiso wa Rito. Hi walowo nsinya wa Vhinya wa ntiyiso nakambe. "Abel, hi ripfumelo!"

Mi teri, "A ku ngari nhlavutelo."

⁵³ Xana ripfumelo i yini? Ripfumelo i nchumu lowu paluxiweke eka n'wina; lowu nga si vaka kona, kambe mi pfumela leswaku wu tava kona. Ripfumelo i nhlavutelo wa ku rhandza ka Xikwembu. Swingaleswi, hi nhlavutelo!

⁵⁴ Kutani tikereke namuntlha a ta ha pfumeli eka nhlavutelo wa ximoya. Ti pfumela eka madyondziselo ya xinawu ya mafambiselo yo karhi. "Hi nhlavutelo Abel u humeserile Xikwembu magandzelo lama tlulaka ya Kayini, laha Xikwembu xi tiyisiseke vumbhoni bya leswaku u lulamile." Amen. Ndza tshembha ma swi vona sweswo. Ma ku vona laha hi hanyaka kona? Ma yi vona awara?

A ndzi ri eku vulavuleni na—na njhingha kungari khale ngopfu, xidyondzi xa Vukreste ni njhingha. U teri, "Nkul. Branham, hi ala tihlavutelo hinkwato."

⁵⁵ Ndzi ku, "Kutani mi fanele ku ala Yesu Krete, hikuva hi Yena nhlavutelo wa Xikwembu, Xikwembu lexi tivonakariseke enyameni ya ximunhu." Handle ka loko mi nga swi vona, mi lahlekile.

Yesu u teri, "Handle ka loko mi pfumela leswaku hi Mina Yena, mi ta fela evudyohweni bya n'wina." Hi yena nhlavutelo wa Xikwembu, Moya wa Xikwembu lowu vonakarisiweke hi xivumbeko xa munhu. Loko mi nga swi pfumeli sweswo, mi lahlekile. Mi N'wi veka tani hi munhu wa vunharhu, munhu wa vumbirhi, kumbe munhu un'wana na un'wana ehandle ka Xikwembu, mi lahlekile. "Handle ka loko mi pfumela leswaku hi Mina Yena, mi ta fela evudyohweni bya n'wina." Nhlavutelo!

⁵⁶ A swi hlamarisi kuva va nga N’wi vonanga. “A kuna munhu loyi a nga taka eka Mina handle ka loko Tata wa Mina a n’wi tisa. Kutani hinkwaswo leswi Tatana a Ndzi nyikeke swona,” etimitswini, “swi ta ta eka Mina.” Wa vona? Ma swi kuma? Oho, hilaha hi faneleke ku N’wi rhandza ha kona, ku N’wi tsakela, ku N’wi dzunisa; ku ta vona muhandzu wa Moya emasikwini ya makumu, ni ku vupfa ka Nsinya wa Mutekiwa ehenhla ka nkarhi!

⁵⁷ Nsinya wa vhinya wa ntiyiso na nsinya wa vhinya wa vunwa, ha vumbirhi a yiri na ntoto lowu fanaka. Mati ya werile ehenhla ka havumbirhi bya yona. A swi hlamarisi loko A hi tshinyile, “Wu ta hambukisa na vona Vahlawuriwa loko swi nga koteka.”

⁵⁸ Xiyisisani, yi languteka ku fana. Yi totiwile ku fana. Kambe xiyisisani, “Hi mihandzu ya vona . . .” Mi yi tivisa ku yini?

Xana mi swi tivisa kuyini leswaku walowo a hi mulamula? Hikuva wu tswala bambalakuza. Rhavi rero ri kahle, ri hanya ensinyeni, kambe ri tswala bambalakuza. A ri fani ni lero sungula.

Kutani loko kereke yi vula leswaku yi “pfumela eka Yesu Kreste loyi a fanaka na tolo, namuntlha, ni hilaha ku nga heriki,” nakona yi tsan’wa Matimba ya Yena, yi tsan’wa mintirho ya Yena, yi tsan’wa Rito ra Yena; loko—loko . . . Kereke leyi pfumelaka eka Yesu Kreste, yi ta endla mintirho ya Yesu Kreste, yi tava na Vutomi bya Yesu Kreste. Kutani loko swi ngari tano, a swi na mhaka loko Vutomi byi chululekela eka yona; loko yi nga hlawuleriwanga emahlweni, kusukela etimitswini, yi ta tswala bambalakuza nkarhi hinkwawo, kumbe swin’wana swo hambana. Kambe loko yi ri Vutomi lebyi hlawuleriweke emahlweni, etimitswini, yi ta tswala Yesu Kreste loyi a fanaka na tolo, namuntlha, na hilaha ku nga heriki, loko yi ri Rito leri humaka eRimitswini. Laha, A nga Rimintsu, masungulo ya nkarhi.

⁵⁹ Xiyisisani, kambe hi leswi va swi humesaka leswi mi byelaka ku hambana. “Hi mihandzu ya vona,” Yesu u teri, “mi ta va tiva.” “Munhu a nga hlengeleti tidiriva leti khiweke eka mahlwehlwe,” hambu loko mahlwehlwe ma ri kahle ensinyeni wa mudiriva. Sweswo swi nga koteka, kambe muhandzu wu ta swi hlamusela.

Xana muhandzu i yini? I Rito, ra muhandzu wa nguva ya kona. Sweswo hi leswi wu nga swona, ku dyondzisa ka vona. Ku dyondzisa ka yini? Ku dyondzisa ka nguva, leswaku i nkarhi muni. Dyondzo ya munhu, dyondzo ya dinominexini, kambe, kumbe Rito ra Xikwembu ra nguva?

Sweswi, nkarhi wu famba hi xihatla, leswaku hi nga tiyisela eka sweswo nkarhi wo leha. Kambe ndza tshembha leswaku n’wina mi nga kona lahawani, nakona ndza tshemha leswaku n’wina mi rhendzeleke hi tiko, ma swi vona leswi ndzi ringetaka

ku mi byela swona, hikuva a hi na nkarhi wo leha ku ta tshama eka swona.

⁶⁰ Kambe mi nga swi vona leswaku Ntoto wu ya eka lavo homboloka, vadyondzisi va vunwa, ni ku va endla leswaku va endla swona leswi Xikwembu xi nga va byela leswaku va nga swi endli; kambe va swi endla, hambi swi ri tano. Hikokwalaho ka yini? Va ngaka va nga tikhomi. Xana hlwehlwe ri nga va nchumu wun'wana njhani ehandle ka kuva hlwehlwe? Swi ngari na mhaka leswaku i mpfula ya kahle ku fika kwihi leyi ri cheletaka, xi fanele kuva hlwehlwe. Hi xona xivangelo Yesu a teri, “Va tava ekusuhi lero swi nga hambukisa na vona Vahlawuriwa,” lava nga etimitswini, “loko swi nga koteka,” kambe a swi koteki. Koroni a yi nge endli nchumu kambe ku tswala koroni; hi sweswo ntsena leswi yi nga swi tswalaka.

⁶¹ Xiyisisani. Tsundzukani, Xikwembu a hi xona mutsari wa vandla. Javulosi hi yena mutsari wa vandla. Ndzi swi khorwisile sweswo hi Rito, endzhaku na le mahlweni, kuya na kuya; a hi nga yi eka sweswo mixo lowu. Ha swi tiya leswaku Xikwembu a xi kalanga xi kondletela vanhu kun'we kukotisa sweswo, ku endla vandla. Madzana ya malembe endzhaku ka rifu ra mudyondzisiwa wo hetelela, va nga si va na vandla ro sungula. Swi kombisile ku tsandzeka hi minkarhi hinkwayo. Loko swi ngari tano, hikokwalaho ka yini hi ngari kun'we hi rirhandzu namuntlha, Methodist, Baptist, Presbyterian, Katholiki na hinkwato? Hikokwalaho ka yini mintirho ya Xikwembu yi nga hi landzeli, kutani, kereke yin'wana na yin'wana eka nchumu lowu fanaka, Rito? Swilo leswi hambanyisaka vanhu, yumakwerhu . . . Hi le kule na Xikwembu kutlula leswi a hi ri xiswona, tikereke, ku vulavula hi tona.

⁶² Sweswi, hi byeriwile leswaku, “Hinkwaswo swilo swa khale swi humelerile tani hi swikombiso, swa ku dyondzisa ka hina, ku laya, ku tshinya.” Leswaku hinkwaswo swilo swa khale swa Testamente ya Khale swi humelerile, swi va ndzhuti wa swa le mahlweni, ku vona leswi nga ta va eka Testamente Leyintshwa, esikwini ra hina.

Ntsena tani hi loko u nga si tshama u vona xandla xa wena, nakona u langutisa ehenhla kutani u vona ndzhuti ekhumbhini, tani hilaha xandla xa mina xi nga tava hakona elayitini, loko xi ri na ntlhanu wa tintiho laha endzhutini, loko xifaniso lexi nga hlantswisiwangiki; kutani u fambisa swandla swa wena ku kongoma, na kuva xifaniso lexi hlantswisiweke, ku kongomana na—ku kongomana na xifaniso lexi nga hlantswisiwangiki, swi fanele ku ta eka tintiho ta ntlhanu.

Tani hilaha Bibe le yi hi byelaka, leswaku, “Testamente ya Khale i ndzhuti, xifananiso xa swilo leswintshwa, kumbe swilo leswi swa ha taka; ku ngari swilo leswi nga kona, kambe i ndzhuti, xifananiso xa swilo leswi swa ha taka.”

63 A hi tlheleleni endzhaku ni ku ya vona loko nchumu lowu wu kale wu va kona eka nguva yin'wana. Xana ma swi tsakela? [Nhlengeletano yi ku, "Amen."—Muhleri.] Swingaleswi hi ta swi tiva, ku swi khorwisa leswi, endzhaku na le mahlweni, hi Rito; ku ngari hi mianakanyo ya munhu, maehleketelelo yan'wana.

A ndzi na mhaka leswaku hi yena mani; munhu un'wana na un'wana, mina kumbe munhu un'wana, "Loko a nga vulavuli ku ya hi nawu na vaprofeta, a kuna ku Vonakala eka yena." Wa vona? Sweswo hi leswi Biblele yi swi vuleke. "Pfumelelani rito ra munhu un'wana na un'wana ri va vunwa, kutani ra Mina ri va ntiyiso," swi nga ri na mhaka leswaku i mani.

64 Sweswi a hi tlheleleni endzhaku ni ku kumisisa loko leswi swi kale swi humelela, ku hi komba xikombiso.

Hi nga tlhelela endzhaku sweswi eka Buku ya Eksoda, kutani hi vulavula hi ximunhuhatwa lexi thyiweke Muxe, loyi a ri muprofeta loyi a totiweke ni ku rhumiwa hi Xikwembu, na Rito ra Xikwembu na ku rhandza ka Xikwembu eka rixaka ra yena. Tani hi leswi Rito ra Xikwembu hi minkarhi hinkwayo ri tsutsumaka hi ku yisa emahlweni, Xi teri, "A xi endlanga nchumu kukondza Xi Swi paluxela vaprofeta va Xona ku sungula." Kutani Xi swi endlile. Ahaa.

Sweswi, Xi ngaka xi nga hembu. Xi ngaka xi nga hembu xi tlhela xi va Xikwembu. Ee, nkulukumba. Xi fanele ku tshama xi ri ntiyiso. A ku na vunwa eka Xona. Xi . . .

Nakona Xi ngaka xi nga Swi cinci. Loko Xi swi endla, kutani a hi Xona Xikwembu; Xi endlile xihoxo. Xi fanele kuva lexi nga riki na makumu. Nakona lexi nga riki na makumu xi ngaka xi nga endlile xihoxo. Wa vona? Swingaleswi leswi nga kalaka swi vuriwa hi Xikwembu, swi lulamile hilaha ku nga Heriki. Wa vona? Nakona Xi swi tshembhisile sweswo. Swingaleswi, vonani, ku hava eBibeleni ehandle kova swi landzelela ku yisa emahlweni ku ya eka swona.

65 Sweswi, Xikwembu xi tshembhisile Abraham leswaku mbewu ya yena yi tava muluveri eka—eka tiko leri nga tolovelekangiki kufikela mune wa madzana ya malembe, kutani Xi ta n'wi humesela ehandle hi voko lerikulu ra ntamu na matimba, xi kombisa masingita ya Xona na swihlamariso exikarhi ka vanhu lava a va tshama swin'we. Nkarhi wa xitshembhiso wu tshinerile ekusuhi. Vanhu a va rivele mayelana na wona. A vari na Vafarisi na Vasaduki, na van'wana, tidinominexini. Kambe, hi xitshuketani, hi loko ku ta Xikwembu xi ri xoxe ni ku koka kusuka, ehandle, ekule na un'wana na un'wana wa vona.

Xikwembu a xi kalanga, eka siku rin'wana na rin'wana kumbe nkarhi wun'wana na wun'wana, xi kala xi vitana muprofeta ku suka eka dinominexini. Ee, nkulukumba. U

soholotekile swinene, a nga ta swikota; a ta fanele ku tshama na dinominexini yaleyo.

⁶⁶ Muxe, wanuna loyi a rhumiweke kusuka eka Xikwembu, na Rito ra Xikwembu, na kuva erendzweni ra yena ku teka Israel ri ya etikweni ra xitshembhiso, hi ku landzelerisa ku lerisa ka Xikwembu, u hlanganile na muprofeta un'wana, un'wana loyi a totiweke loyi a ri na ntoto wa xiviri wa Moya lowo Kwetsima lowu fanaka na lowu a wuri eka Muxe. Hi swona. A ri muprofeta. Moya lowo Kwetsima a wuri ehenhla ka wanuna loyi. Vito ra yena a kuri Balaam. Hinkwerhu ha n'wi tiva. Hi swona, swona swilo sweswi, leswi fanaka, swilo leswi wanuna loyi a swi vuleke, swa ha ri eku humeleleni, kwalomu ka makume nhungu wa madzana ya malembe lawa ya hundzeke. "Wena u tani hi hanci ya rimhondzo, O Israel. Un'wana na un'wana loyi a ku katekisaka u ta katekisiwa. Un'wana na un'wana loyi a nga ta ku rhukana u ta rhukaniwa. Matimba ya wena, na ntamu, hilaha ya lulameke hakona matende ya wena, O Yakob!" Wa vona, a nga ta tikhoma. U tile lahaya a kunguhatile embilwini ya yena ku ya rhukana vanhu.

⁶⁷ Oho, n'wina vadyondzisi va mavunwa lava yingisaka tithepi leti malembe lawa hinkwawo, ni ku vona Xikwembu xi tiyisisa hakunene leswi Xi swi vuleke, nakona mi tshamile eku hlayeni ka n'wina mi ri karhi mi switiva leswaku i Ntiyiso; kutani hikokwalaho ka ku hambana ka xidinominexini, ma va kaneta ni ku byela vanhu va n'wina leswaku a va tano. Khombo eka n'wina! Nkarhi wa n'wina wu le kusuhi exandleni.

⁶⁸ Balaam, a totiwile hi Moya lowu fanaka lowu a wuri eka Muxe. Xana ku hambana a kuri yini? Ku dyondzisa ka Muxe a ku hetisekile. Biblele yi vurile lahawani eka Petro wa Vumbirhi, leswaku a kuri "ku dyondzisa ka Balaam" loku amukeriweke hi Israel, loku Xikwembu xi nga kalangiki xi ku rivalela. Xidyoho lexi nga rivalelekiki! Ku hava na un'we wa vona loyi a ponisiweke, hambi leswi va humeke ehansi ka minkateko ya Xikwembu, ni ku vona voko ra Xikwembu ri ri karhi ri famba na muprofeta loyi wa matimba, ni ku swi vona swi tiyisisiwa kunene-nene hi Xikwembu. Nakona, hikuva, muprofeta un'wana a tile na dyondzo, leyi hambaneke, na ku kanetana na Muxe, na ku ringeta ku khorwisa vanhu leswaku Muxe u hoxile. Kutani Dathan, Korah, na votala va vona, va pfumelelanile na yena kutani va dyondzisa vana va Israel ku endla vumbhisa, ku landzelela vandla ra yena, leswaku, "Hinkwerhu ha fana."

"Hambi hi Mamethodist, Mabaptist, Mapresbyterian, kumbe Mapentekosta, na tin'wana, ha fana hinkwerhu."

⁶⁹ A hi fani! Mi vanhu lava hambanyiwiweke, lava kwetsimeke eHosini, lava tinyiketeleke eRitweni na Moya wa Xikwembu, ku tswala muhandzu wa xitshembhiso xa Xona xa siku leri.

Nakona a mi va vona! Ndza switiva sweswo swa chavisa swinene, kambe walowo i Ntiyiso hilaha swi fanaka. Wu kongomisiwile eka xikhongelo emasikwini lawa yo hetelela! “Humani exikarhi ka swona.”

⁷⁰ Sweswi, “dyondzo ya Balaam,” ku ngari vuprofeta bya Balaam. Sweswo a swi lulamile. Xexo a xi ri Xikwembu. I vangani lava pfumelaka sweswo? [Nhlengeletano yi ku, “Amen.”—Muhleri.] Vuprofeta bya Balaam a byi lulamile, hikuva a nga ta vulavula nchumu wun’wana. Ntoto wa Xikwembu a wu nga ta vulavula nchumu wun’wana, nakona Xikwembu xi swi tiyisisile hi ku khorwisa leswaku a kuri Ntiyiso. Kambe a kuri “ku dyondzisa ka Balaam.”

⁷¹ Sweswi swi pimaniseni sweswo na Matewu 24:24. Lava va totiweke, kambe dyondzo ya vona i vunwa. Vunharhu bya tilo, na hinkwaswo swilo swo kota sweswo; swi hoxekile, antikreste!

Ndza tshembha leswaku vutitwi bya n’wina a byi nge vaviseki. Nakona mi nga hundzuluxi sweswo, ku tima tifoyini. Nakambe mi nga yimi mi humela ehandle. Ntsena tshamisekani, kutani hi vona loko kuri ku Moya lowo Kwetsima a wu nga ta hi paluxela swona, ni ku swi khorwisa eka hina. Mi ri, “Kambe sweswo. . .” Ntsena hambu ku ngava yini leswi mi swi pfumelaka, tshamisekani kutani mi yingisela. Nakona mi kombela Xikwembu ku va xi pfula mbilu ya n’wina, kutani mi ta kumisisa loko kuri ku mi xigatlu, kumbe hlwehlwe, kumbe kun’wana na kun’wana laha mi nga yima kona. Wa vona?

⁷² Sweswi, hambu a ri Yudasi, “u hlawuleriwile emahlweni ku ya avanyiseriwa leswi a ri xiswona,” u tshamile lahaya emahlweni ka Yesu. Nakona Yesu u n’wi byerile leswaku, “Hi wena munhu wa kona. Hambu ku ngava yini leswi u nga ta swi endla, nakona hambu ku ngava yini leswi u fanelaka ku swi endla, yana u ya swi endla hi xihatla.” Yena a switiva leswi a ri eku swi endleni, kambe, hikokwalaho ka makume nharhu wa swiphemu swa silivhere, na ku duma, u xavisile Hosi Yesu Krete. Un’we wa vadyondzisiwa va Yena, mukhomi wa nkwama wa kereke, Yesu a n’wi vitana “munghana” wa Yena. Wa vona? Bibeledi yi teri, “U tswariwile a ri n’wana wa ku lova,” ntsena ku fana na hilaha Yesu a nga velekiwa a ri N’wana wa Xikwembu. “Va ta hambukisa na vona Vahlawuriwa loko swi nga koteka.”

⁷³ Xiyisisani hi vukheta loko ha ha hlaya. Hi ta teka xikombiso xin’wana, eBukwini ya Tihosi. A kuri na—na muprofeta, nakona vito ra yena a ri Mikiya. A ri n’wana wa Imlah, nakona a ri muprofeta. A ri yena.

Kutani a kuri na muprofeta un’wana, nhloko ya vandla ra vaprofeta, lava va totiweke. Bibeledi yi ri a vari “vaprofeta,” ntsena tani hilaha Xi vuleke leswaku Balaam a ri muprofeta, lava va totiweke.

Nakona a kuri na un'wana wa vona loyi vito ra yena a ri Mikiya, loyi a totiwile hi Xikwembu ni ku rhumiwa hi Xikwembu, ni kuva na Rito ra Xikwembu.

A kuri na un'we, Zedekiya, loyi a ehleketa leswaku u rhumiwile hi Xikwembu. A totiwile hi Xikwembu, kambe dyondzo ya yena a yi hambana na Rito ra Xikwembu. "Ku pfuka, ka Vakreste va vunwa, va endla masingita lamakulu, va ta hambukisa Vahlawuriwa loko swi koteka."

⁷⁴ Xiyisisani, ha vumbirhi bya vona, ha vumbirhi bya vona va totiwile. Sweswi, xana mi nga vurisa ku yini leswaku hi wihi loyi a lulamile, ni loyi a nga lulamanga? Vonani leswi Rito ri swi tshembhiseke Akab. Muprofeta loyi a ri kona a nga se va kona, loyi a ri Eliya, un'wana wa vaprofeta lavakulu eka nguva ya kona, yaloye a ri muprofeta loyi a tiyisisiwile. Muprofeta yaloye wo tiyisisiwa u vurile, leswaku, "Hikokwalaho kova Akab a endlile vubihi lebyi, leswaku timbyana ti ta lakatsela ngati yakwe; ku teka vutomi bya Naboth. Nakona timbyana teto ti tadya Yezabel, kutani hi . . . ntsumbu wa yena wu tava quva ehenhla ka masimu." Sweswi, xana u nga swi katekisisa ku yini leswi rhukaniweke hi Xikwembu? Kumbexana u nga rhukanisa ku yini, tani hilaha Balaam a swivuleke, leswi katekisiweke hi Xikwembu? Wa vona?

Kambe vaprofeta lava a va tshembhekile. A ku ngari na ku kanakana ehandle ka leswaku a va ri vavanuna va kahle, vavanuna vo xiximeka. Hikuva, kuva muprofeta eIsrael, u fanele u xiximeka, kumbe hambi kuri kuva Muisrael. A wu khandliwa, loko swi nga ri tano. A va ri vavanuna vo xiximeka. A va ri vavanuna vo tlhariha. A va ri vavanuna vo dyondzeka. A va ri vahlawuriwa va Akab, va tiko. (Wa swi vona sweswo, Sesi Wright?) Vahlawuriwa va tiko, lava va lulameleke xiphe- . . .

⁷⁵ Kutani sweswi, loko Mikiya a vona xivona xa yena, a swi tiva embilwini ya yena leswi Rito ri swi vuleke, kambe a lava ku vona leswi Moya lowu a wuri eka yena wu nga ta swi vula.

Swingaleswi va n'wi byerile, va ku, "U vula swilo swo fana ni leswi vuriwaka hi vaprofeta lavan'wana. Kutani loko u swi endla, hikokwalaho ka yini, u tava, hi ta ku nghenisa eka xinakulobye, a kuna ku kanakana, nakambe. Wa vona? Hi ta ku endla un'wana wa hina. Hi ta ku amukela eka dinominexini ya hina. U . . . Ha switwa leswaku u muprofeta, kambe u tshamela ro vula swilo swo rhukana minkarhi hinkwayo. U tshamela ro rhukana Akab. Sweswi, Zedekiya, ndhuna ya wanuna, mupapa, kumbe . . ." swin'wana na swin'wana leswi a ri swona. "Sweswi u katekisiweke Akab, u teri, 'Famba u ya swi endla.' Sweswi u vula nchumu lowu fanaka, Imlah. Hikokwalaho ka yini, wo va ntsena mbuyangwani. A wu na nhlengeletano, na swintsongo, eka hinkwaswo. Nakona vanhu lava va na mamiliyoni. Tiko hinkwaro i ra vona. Sweswi u vula nchumu lowu fanaka na leswi

va swi endlaka, u vona leswi u nga ta swi endla, u ta—u dya rifumo ra misava.” U le ku vulavuleni na wanuna wo hoxeka lahayani!

⁷⁶ A swi tava njhani loko a ku lo vuriwa leswaku, “Xana u nga xi kuma xihoxo eka Zedekiya, Mikiya?”

“Ee.”

“Xana u kale u n’wi kuma evudyohweni?”

“Ee.”

“Xana u kale u n’wi twa a rhukana un’wana?”

“Ee.”

“Xana u kale u n’wi kuma a pyopyiwile?”

“Ee.”

“Xana u nga phikiza dyondzo ya yena?”

“Ee.”

“Xana wa pfumela leswaku digri ya yena ya vudokodela i ya vunwa?”

“Ee.”

“Wa pfumela leswaku Ph.D. ya yena—yena yi kahle?”

“Hakunene. Hi huvo ya Sanhedrin; ndza tshembha hinkwaswo i huvo, ndza tshembha swi kahle.”

“Hi swona, kutani, hikokwalaho ka yini u nga n’wi joyini?”

“Hikuva u humile eRitweni!”

⁷⁷ Hi swona, hi tava na nkombiso wa swona, kutani, kukotisa Eliya muprofeta loyi a ri kona ku nga se va na sweswo. Kutani loko kuri ku u n’wana wa Xikwembu, u ta tshama na muprofeta wa Bibeleyi. I Rito. Xiyisisani awara, nguva.

⁷⁸ Hi swona, a swi tava njhani loko Zedekiya a teri, “Oho, ndza switiva muprofeta u vurile sweswo, kambe sweswo i swa rixaka leri taka. Sweswo i swa nkarhi wo leha kusukela sweswi?”

U teri, “Yima kukondza ndzi vona xivono kusuka eka Xikwembu, kutani ndzi ta ku byela.”

A ku, “Kutani u ta vula nchumu lowu fanaka xana?”

U teri, “Ndzi ta vula ntsena leswi vuriwaka hi Xikwembu; ku ngari swin’wana, ku ngari swin’wana swotala. Ndzi ngaka ndzi nga engeteli na rito na rin’we eka Swona, kumbe ku hunguta Rito rin’we eka Swona.”

Swingaleswi vusiku byebyo, hi xikhongelo, Hosi yi tile eka yena hi xivono. U yile ehandle eka mixo lowu landzeleke, a ku. . .

Ku na vaprofeta vambirhi!

⁷⁹ Wanuna lonkulu etikweni, eka swa tinyimpi na le mahlweni ka rixaka, a kuri Zedekiya. A ri muprofeta lonkulu, wa hosi.

A ri nhloko ya vaprofeta lavan'wana hinkwavo, hi vandla. U endliwile, hi vandla ra yena, nhloko ya vona hinkwavo; kumbexani muhlayi wa xiyimo xa le henhla, loyi a dyondzekeke ku tlurisa, loyi a lulameriwile swinene hi ntirho. Nakona a totiwile hi Moya lowo Kwetsima, hikuva u vuriwa "muprofeta." Hakunene, ku ngari ntsena muprofeta wa ntolovelu, a ri muprofeta wa Muheveru. N'wi languteni sweswi.

⁸⁰ Zedekiya u teri, "Hosi yi vulavurile na mina, 'Ndzi endleli timhondzo letimbirhi ta nsimbhi,' mfungho." Muprofeta hi ntolovelu u nyika mimfungho. "Yi teri, 'Endla timhondzo leti ta nsimbhi.' Moya lowo Kwetsima wu teri eka mina, 'Tekela leti,' Ntoto lowu wu ndzi katekiseke." Mi nga swi anakanyi tani hi ku phahla, kambe ku nghena emhakeni. "Moya lowo Kwetsima lowu vulavulaka hi tindzimi ha mina, Wona lowu ndzi tiyisiseke, Wu teri, 'Tekela timhondzo leti, kutani, hi leswi, byela hosi leswaku yi ta susumetela Siriya le handle ka tiko. Nakona Ndzi ta yi vuyisela tiko leri lulameleke Israel, kereke.'"

Boti, sweswo i ntiyiso swinene, ntsena swi lava ku fana na loko Balaam a ri lahawani. Balaam ntsena ku vulavula hi ntiyiso a kotisa leswi Muxe a ri xiswona. Muxe... Nomboro leyi lulameke ya Xikwembu i nkombo. Kutani Balaam u teri, "Ndzi akeli tialtari ta nkombo; switlhavelo swa nkombo swo tenga, tinkavi, na tinyimpfu ta nkombo ta xinuna." Sweswo i ku vulavula hi ku vuya ka N'wana wa Xikwembu. Entiyisweni, a ri loyi a lulameke tani hi un'wana wa vona.

⁸¹ Nakona hi loyi Zedekiya, na yena a lulamile hi kuya hi ntiyiso, "Hikuva tiko leri i ra hina. Hikokwalaho ka yini, vona Vasiriya na Vafilista lahaya va tata makhwiri ya vona, ya vana va vona na van'wana, nala wa hina, hi swakudya leswi vana va hina va swi pfumalaka! Loko, Xikwembu xi hi nyikile tiko leri!"

Boti, walowo i njhekanjhekisano wa kahle. Ndza tshembha leswaku a ta huwelela sweswo emahlweni ka Israel, nakona a va ta huwelela hi matimba hilaha a va ta swikota hakona. Sweswi, ndzi vulavula hi namuntlha sweswi. Ndzi pfumela leswaku mi le ku ndzi landzeleni. Ku huwelela hinkwako, ni ku kalakala!

⁸² Ma n'wi tsundzuka Davida eka Sonto lowu hundzeke? Wa vona? N'wina mi nga le handle endhawini ya xiya-na-moya, kumbe ndhawu ya vuhlanganisi lebyi bya riqingho; a mi ri kumanga Hungu ra Sonto lowu hundzeke, tiyisisani kuva mi ri kuma. *Ku Ringeta Ku Endlela Xikwembu Ntirho Ehandle Ko Hlawuleriwa Ku Swi Endla*, swi ngari na mhaka leswaku swi tshembhekile kufika kwihi, kuva kahle, a swi amukeriwi na swintsongo hi Xikwembu. Wa vona?

Sweswi, hi loyi Zedekiya, a ehleketaka leswaku u lulamile.

⁸³ Mikiya u teri, "Mi nge ndzi vutisa Xikwembu." Swingaleswi u tile na mixo lowu landzelaka ni LESWI HOSI YI SWI VULAKA. U kambisisile xivono xa yena hi Rito.

⁸⁴ Sweswi loko a teri eka Zedekiya, “Xana wa switiva leswi muprofeta wa Biblele laha a vuleke leswaku swi ta humelela eka nakulorhi loyi?”

⁸⁵ “Kambe ku ngari eka nkarhi lowu, hikuva wanuna loyi i wanuna wo xiximeka. U le ku ringeteni.” Mi nga tsandzeki ku swi kuma leswi. “U le ku ringeteni ka ku tlherisela swilo leswi nga swa kereke eka kereke. U le ku ringeteni ka ku tlherisela nhundzu ya yona endzhaku,” ku ngari swilo swa Ximoya; loko a swi ri tano, a tava a ninginisile tiko leriya hinkwaro tani hilaha Eliya a endleke ha kona. Kambe, ku ringeta kuva nyika tinhundzu, “Hi fuma nhundzu. Hi vandla lerikulu. Hi wela eka rona. Hina hinkwerhu, n’wina vanhu hinkwenu, n’wina Maprotestant, hinkwenu mi fanele ku hi joyina.” Ahaa.

Hi ta eka swona ku ngari khale. “Hinkwavo i vaboti na vasesi, hambu swi ri tano.” A hi swona! A swi kalanga swi va tano nakona a swi ngevi tano, hi Kereke ya xiviri ya Xikwembu. A swi ngevi tano!

⁸⁶ Xiyisisani, u vonile xivono. Nakona u teri, “Xikwembu xi vulavurile na mina.” Sweswi, vonani, wanuna loyi a tshembhekile. A ku, “Xi teri, ‘Endla timhondzo leti, kutani mi ya le mahlweni ka hosi nakona mi susumetela evupela-dyambu,’” kumbe ndlela yin’wana na yin’wana laha tiko ri tshameke kona kusuka laha a va yimile kona. “‘Susumetani, kutani sweswo ku tava kuri LESWI HOSI YI SWI VULAKA, leswaku u ya eku hluleni na ku tlhela a vuya, ku hlula ka kereke.’ Ku ya va humesela ehandle!” Sweswo swi le kusuhi swinene, a hi swona xana? Xana mhaka a kuri yini?

Hi loyi Mikiya a taka. Va ku, “Sweswi hi nyike vuprofeta bya wena.”

⁸⁷ “Yanani mi tlhandluka! Kambe ndzi vonile Israel ri kotisa tinyimpfu, ri hangalakile, ri ngari na murisi.” Yhoo! Kunene swa hambana.

⁸⁸ Sweswi, mi nhlengeletano. Sweswi xana hi wihi loyi a lulameke? Ha vumbirhi ka vona, i vaprofeta. Ndlela yin’we ntsena leyi u nga vulaka ku hambana eka vona, i, ku swi kambisisa hi Rito.

Va ku, “Xana u swi kumisile ku yini sweswo?”

A ku, “Ndzi vonile Xikwembu xi tshamile eXiluvulweni.” A ku, “Ndzi vonile vandla hinkwaro ri Xi rhendzerile.”

⁸⁹ Sweswi tsundzukani, Zedekiya u teri u vonile Xikwembu, na yena, na Moya lowu fanaka. “Ndzi vonile Xikwembu. Xi ndzi byerile ku endla timhondzo leti hi—hi nsimbhi. Yanani le handle kutani mi susumeta matiko ehandle, hikuva leswi i swa hina. Lavan’wana a va na mfanelo eka swona.” A va tava na swona loko kuri ku a va tshamile eku lulameni na Xikwembu. A va tava va vile na sweswo, kambe va yile ekule na Xikwembu.

Sweswo hi leswi vandla ri nga xiswona, kereke. Ri na mfanelo eka swilo leswi, kambe mi khirhiwile eka swona, hikuva mi yile ekule na Rito ra Xikwembu na Moya wa Xikwembu, ntoto, ku tiyisisa Rito ra nguva. Mi nga tsandzeki ku kuma Hungu leri.

⁹⁰ Xiyisisani leswi humeleleke sweswi. U teri, “Ndzi vonile Xikwembu,” Mikiya u xi vonile, “xi tshamile eXiluveweni eTilweni. Vandla ra xona a ri hlanganile ku rhendzeleka hi Xona. Xi ku, ‘I mani loyi hi nga n’wi kumaka ku ya le hansi kutani a kanganyisa Akab, ku endla leswaku marito ya Eliya ya va ntiyiso, muprofeta wa Mina loyi a tiyisisiweke. Ndzi vurile leswaku u ta ta. Kutani Eliya a ri na Rito ra Mina. Nakona matilo na misava swi ta hundza, kambe Rito ra Mina ri ngaka ri nga tsandzeki. A ndzi na mhaka ni hilaha va vaka va ximanguva lawa, kumbe hilaha va dyondzekaka ha kona, kumbe hilaha va nga vakulu ha kona, Marito ya Mina ya ngaka ya nga tsandzeki.”

“Kutani moya wo hamba wu ta kusuka etiheleni, wu wela ehansi hi matsolo ya wona, kutani wu ku, ‘Loko U nga ndzi pfumelela, ndzi nga va nyika ntoto wa mina, wu va endla leswaku va endla muxaka wun’wana na wun’wana wa masingita na swihlamariso, ntsena loko ndzi va humesa eRitweni. A nge kali a swi tiva leswaku Rero i Rito ra Wena. U ta Ri honisa, hikwalaho ka ndhuma.” Boti, minkarhi a yi se ncinca. Makwerhu Neville, wolowo i ntiyiso. Mi tsundzuka, wolowo i ntiyiso. “Ndzi ta fika ehenhla ka yena, ndzi n’wi endla kuva a endla swilo swo fana ni leswi hinkwavo va swi endlaka. Ndzi ta n’wi endla leswaku a profeta, ni ku vula vunwa.” Swi ngava vunwa njhani? Hikuva swi hambanile na Rito.

⁹¹ Mi teka minkhuvulo yin’wana na yin’wana leyi ya vunwa, *swingere-ngere-na-swingere-ngere* swa vunwa, a ndzi na mhaka na hilaha swi twalaka swi ri swa xiviri ha kona, hilaha va ringetaka ku encenyeta ha kona, i vunwa loko swi hambanile na Rito ra Xikwembu ra awara leyi. Hi swona sweswo.

Mi ri, “Hi swona, ya hina, hi swona, hi endlile *leswi*, nakona hi endla *leswi*, kutani kereke ya hina yi hi ndlela *leyi* na *yaleyo*.”

A ndzi na mhaka na leswaku yi njhani. Loko yi hambanile na Rito leri tsariweke ra awara leyi, i vunwa. Xikwembu a xi ngevi na nchumu xo xi endla hi yona, swi ngari na mhaka hilaha yi tshembhekeke ha kona, hilaha yi dyondzekeke, hilaha yi tlhariheke, hilaha yi twalaka yi ri ni ntiyiso, hilaha yi twalaka yi twisiseka, loko yi hambanile na Rito ra awara leyi. Hi ta nghena eka sweswo hi vuenti eka timinetse tintsongo, loko nkarhi wu hi pfumelela. Loko hi tsandzeka, hi ta swi teka nakambe eka vusiku bya namuntlha.

⁹² Xiyisisani, a tshembhekile, wanuna wa kahle, a swi kakanansi. Nakona u teri...Swingaleswi, handle ka swona,

Mikiya u teri eka yena, ku ngari emahlweni ka xikandza xa yena, kambe hi marito yan'wana, "U totiwile hi moya wa vunwa." Xana sweswo a swi nga tava swin'wana ku swi byela mubishopo? Kambe u swi endlile.

⁹³ Swingaleswi mubishopo loyi u yile ni ku vula leswaku, "U ngaka u nga havi na xinakulobye na kan'we," ni ku n'wi phakata rhama. A ku, "Wa switiva leswaku ndzi wanuna loyi a tiyisisiweke. Kereke ya mina yi ndzi endlile nhloko ya yona, nchumu lowu. Ku hlawula loku tivekaka ka vanhu va Xikwembu ku ndzi endlile leswi. Vandla ra mina ri ndzi endlile leswi. Nakona Xikwembu xi hi nyikile tiko leri, kutani Xi lava leswaku ri va ra hina. Nakona ndzi na LESWI HOSI YI SWI VULAKA." A n'wi phakata, kutani a ku, "Xana hi yihi ndlela leyi Moya wa Xikwembu wu fambeke hi yona loko Wu huma eka mina?"

⁹⁴ Mikiya u teri, "U ta swi vona, eka rin'wana ra masiku lawa," loko California yi ri le hansi ka lwandle lahaya, na swilo leswi hinkwaswo. Wa vona? "U ta swi vona leswaku Wu fambile hi ndlela yihi, loko u tshamile ekhotsweni ra le ndzeni."

⁹⁵ Sweswi, Akab, u ta ku yini? "Ndzi pfumela muprofeta wa mina," a vula tano. Swi ngava njhani loko a lo kambisisa Rito? Wa vona, a nga lavi ku tivona a rhukaniwile. Ma ndzi twa! A nga swilavi ku tivona a rhukaniwile. A ku na munhu loyi a swi lavaka.

Nakona ra mina vand- . . . boti wa vandla, sweswo hi leswi nga xiphigo hi wena. U lava ku ehleketa leswaku u lulamile, loko, u ri karhi u swi tiva embilwini ya wena, leswaku loko u khuvula hi ku tirhisa vito ra "Tatana, N'wana, Moya lowo Kwetsima," u le ku hembeni. Wa swi tiva leswaku loko u bvu- . . . ku vula swilo leswi u swi endlaka, ni ku teka vumbhoni byo rhanga, na swilo hinkwaswo swo tani hi sweswo, wa hoxisa. Swi nga endlekisa ku yini kuva vumbhoni byo rhanga byi va ku vulavula hi tindzimi, kutani u vulavula ku hambana na xitshembhiso xa Xikwembu eka awara leyi? Swi nga endlekisa ku yini xana? A wu lavi ndzhukano, a hi swona? Kambe swi tsariwile *Lahawani*, kutani swi tava tano. Walowo i mfungho wa xivandzana, wu le kusuhi lero wu nga hambukisa Vahlawuriwa loko swi nga koteka.

⁹⁶ Masingita yan'wana na yan'wana, swihlamariso swin'wana na swin'wana, munhu loyi a totiweke, vuprofeta, tinxaka hinkwato ta swilo kuya emahlweni; tinxaka hinkwato ta mimfungho, tinxaka hinkwato ta swihlamariso, xana mi ta ku vurisa ku yini ku hambana? Langutisani Rito ra awara leyi. Sweswo hi leswi mi tekisaka . . .

⁹⁷ Langutisani Muxe, hilaha a tava a byerile Balaam. Langutisani Mikiya lahawani, xana hi swi tivisile ku yini leswaku a lulamile? Rito, emahlweni ka yena, ri profetile sweswo eka Akab.

Nakona Rito, emahlweni ka hina, ri profetile mavandla lawa ya siku leri, ni ndzhukano lowu nga ehenhla ka wona. Kutani swilo leswi nga ta humelela hi Kereke ya Yena ya xiviri leyi totiweke, swi tava na Rito, Mutekiwa wa Rito. Hi hina lava. Hi leswiwani, namuntlha, ntsena tani hilaha a swi ri xiswona.

⁹⁸ Biblele yi teri, “Timhaka hinkwato ti ta tiya hi milomo ya timbhoni timbirhi kumbe tinharhu.” Ndzi vulavurile hi Balaam, ndzi vulavurile hi Balaam na Muxe. Nakona ndzi vulavurile sweswi hi Mikiya na Zedekiya. Sweswi ndzi ya eku nyikeni ka un’wana nakambe. Laha, ku nga na madzana ya vona, kambe un’wana nakambe, ku ta endla timbhoni tinharhu. Ndzi na xintambyana lexi heleleke xa vona lexi tsariweke lahawani; kambe ku hlayisa nkarhi.

⁹⁹ Yeremiya loyi a tiyisisiwile, sinda ra honyololo, kambe muprofeta wa Xikwembu loyi a tiyisisiwile. A va n’wi venga wanuna loyi. Va hoxile maga-...mihandzu leyi yi vupfeke swinene eka yena, na leswin’wana hinkwaswo. Kutani u vekile ndzhukano ehenhla ka vona. Nakona swilo leswi a swi endleke, ni ku swi andlala le handle ematlhelo ka yena, na swilo, na ku nyika masingita leswaku Israel a ri hoxile.

Muprofeta un’wana na un’wana, muprofeta wa ntiyiso loyi a nga tshama a pfuxiwa emisaveni, u rhukanile mavandla lawaya ya tidinominexini ta kereke. Swi nga ncincisa ku yini, hi Xikwembu lexi nga ncinceki?

¹⁰⁰ Moya lowo Kwetsima i Muprofeta wa awara leyi; Wu tiyisisa Rito ra Wona, wu Ri khorwisa. Moya lowo Kwetsima a wuri Muprofeta wa awara ya Muxe. Moya lowo Kwetsima a wu ri Muprofeta wa awara ya Mikiya. Moya lowo Kwetsima, lowu tsaleke Rito, wa ta ni ku tiyisisa Rito.

¹⁰¹ Sweswi ku humelerile yini enkarhini wa Mikiya xana? Akab u dlayiwile, nakona timbyana ti lakatserile ngati ya yena, hi kuya hi Rito ra Xikwembu.

N’wina vadyondzisi va mavunwa hinkwenu, ku vula Xikwembu, siku rin’wana mi ta tshovela leswi mi nga eku swi byaleni, n’wina mabofu lawa ya rhangelaka mabofu! A ndzi hlundzukunganga. Ndzo va ku mi byeleni ka Ntiyiso. Nakona a ndzi tava ndzi nga swi vulanga leswi loko le henhla, ekamareni liyani, loko kuruku Moya lowo Kwetsima a wu nga vulanga leswaku, “Swi vuli hi mukhuva walowo.” Xana ndzi tshame ndzi mi byela nchumu wun’wana wo hoxeka ehandle ka leswi Xikwembu xi swi khorwiseke ku va leswi swi lulameke xana? Pfukani, vamakwerhu wa mina, nkarhi wu nga se hela!

¹⁰² Kambe ndzi pfumeleleni ndzi vula leswi. Xana mutwa wu nga pfukisa ku yini wu va hlwehlwe, loko kuruku wu hlawuleriwe emahlweni ku va sweswo? Xana Vahlawuriwa va nga swi siverisa ku yini ku swi vona? Hikuva, mi hlawuleriwe ku swi vona. “Hinkwavo lava Tatana a Ndzi nyikeke vona va

ta ta,” ku vula Yesu, “kambe ku hava na un’we wa vona a nga ta ta handle ka loko A Ndzi nyikile yena ku nga seva ni masungulo ya misava, loko mavito ya vona ya tsariwa eBukwini ya Xinyimpfana ya Vutomi,” ku ngari eka mufambisi wa kereke, kambe eBukwini, Buku ya Xinyimpfana ya Vutomi.

¹⁰³ Xiyisisani, Yeremiya u yimile, u tiyisisiwile emahlweni ka vanhu, hambi leswi a va n’wi venga.

¹⁰⁴ Swingaleswi va yi le ehandle kutani va endla joko, u ri endlile, kutani a ri tlhandleka enhan’wini ya yena, kutani a ya emahlweni ka vanhu. Va teri, “Oho, hi vanhu lavakulu va Xikwembu. Hikokwalaho ka yini, hi Vaisrael. Hi tshembhekile ngopfu esinagogweni ya hina! Ha ya Sonto wun’wana na wun’wana, hina, hi nyikela magandzelo, ni ku hakela mali ya hina. Xana Nebukadnetsar a nga kala a swi khomisa ku yini swilo swo kwetsima swa Xikwembu?” Ahaa! Swidyoho swa n’wina swi swi endlile.

Xikwembu xi teri, “Loko mi nga hlayisa milawu ya Mina, Ndzi ngaka ndzi nga swi endli leswi. Kambe, loko mi nga endli tano, swi le ku mi teleni.” Sweswo hi swona ngopfu. Xa hari lexi fanaka. Xi hlayisa milawu ya xona, Rito ra Xona ra awara, leswi Xi swi tshembhiseke.

¹⁰⁵ Sweswi xiyisisani. Sweswi, Yeremiya, hi ku rhandza ka Xikwembu, muprofeta loyi a tiyisisiweke, hambi leswi a vengiwa. . . Un’wana na un’wana wa vona a vengiwa emasikwini ya vona. Va endlile swilo leswi nga tolovelakangiki swo hambana na dinominexini ya siku rero, un’wana na un’wana a va venga, hambi kuri tihosi na leswin’wana hinkwaswo. Swingaleswi u tlhandlekile e—e joko enhan’wini ya yena, kutani a ku, hi “LESWI HOSI YI SWI VULAKA. Mi tava le hansi ku ringana makume nkombo wa malembe,” hikuva a ri na ku twisisa kusuka eRitweni ra Xikwembu. “Makume nkombo wa malembe!”

¹⁰⁶ Kutani Hananiya, Hananiya, ndza tshembha mi ri vurisa xiswona, H-a-n-a-n-i-y-a. Hananiya, muprofeta exikarhi ka vanhu, u tile, a susa joko enhan’wini ya Yeremiya, a ri tshova. Kutani a ku, vana nkulukumba exikarhi ka vanhu, wa vona, loko a ri karhi a vulavula ku hambana na Rito ra Xikwembu. Nakona u teri, “Malembe mambirhi va tava va vuyile. HI LESWI HOSI YI SWI VULAKA.”

Vaprofeta vambirhi lava totiweke. Xana ku hambana a kuri kwihi eka vona? Un’we a ri na leswi vuriweke hi Rito, nakona loyi un’wana a ngari na swona. Yeremiya u teri, “Amen.”

¹⁰⁷ Emahlweni ka vakulukumba hinkwavo na nhlengeletano, Israel hinkwaro, wa vona, a lava ku kombisa leswaku a ngava nkulukumba tani hilaha Yeremiya a ri xiswona. “Wa switiva leswaku a va ku rhandzi, hambi swi ri tano. Swingaleswi ndzi muprofeta, na mina. Ndzi muprofeta kutlula leswi u nga xiswona, hikuva u le ku profeteni ka vunwa. U ndzi

byela leswaku vanhu va Xikwembu va tava ehansi ka nchumu *lowu-na-lowu*?”

Sweswo hi leswi va swi vulaka namuntlha, kambe mi tava kwalahaya ntsena hilaha ku fanaka, tani hi kereke. Mi rhukaniwile hi ndzhukano. N’wina tikereke hinkwerhu, tidinominexini leti khomeleleke eka mindhavuko ya munhu ematshan’wini ya Rito ra Xikwembu, mi rhukaniwile hi Xikwembu.

¹⁰⁸ Xiyisisani sweswi, hi loyi a taka. Hananiya a susa joko leri enhan’wini ya yena, mfungho wa Xikwembu, a ri tshova, kutani a ku, “HI LESWI HOSI YI SWI VULAKA. Malembe mambirhi va tava va vuyile.” Ntsena ku ta tikombisa, “Ndzi *Swingere-ngere*.” Hikuva a yimile endzeni, a ri muprofeta wa vandla.

¹⁰⁹ Yeremiya a ri wanuna wa le mananga loyi a tihanyela a ri yexe. A profeta leswo biha ehenhla ka vona nkarhi hinkwawo, hikuva a va bihile.

Kutani wanuna loyi a ri eku va byeleni, “Oho, mi lulamile ntsena loko mi wela kona. Ntsena loko mi ri Vaisrael, sweswo hi leswi lavekaka. Wa vona, n’wina, hi . . . Xikwembu a xi nga ta swi endla sweswo. Ndza swi tiva leswaku ku vile na nchumu wuntsongo lowu humeleleke lahawani, kambe mi nga chuhwi, mi nga chavi.”

Oho, boti, va ha hanya namuntlha. “Mi nga vileli, hinkwaswo swi tshamisekile. Hinkwaswo swi le hansi ka vulawuri bya hina. Hi Kereke.” Mi nga tshuki mi swi ehleketile sweswo. Ina.

¹¹⁰ Swingaleswi u teri, “Hinkwaswo swi lulamile. Va tava va vuyile eka malembe mambirhi. I nchumu wuntsongo lowu humeleleke. A hi leswi nga tolovelekangiki. Hi na swona sweswo. Ntsena Nebukadnetsar u tile lahawani, kambe Xikwembu xa hina xi ta swi lulamisa hinkwaswo sweswo.”

Kambe Rito ri vurile leswaku va tava lahaya ku ringana makume nkombo wa malembe; ku kondza rixaka rero ri nyamalala, na rixaka rin’wana. Makume mune wa malembe i rixaka. “Leti ti kwalomu ka tinxaka timbirhi leti mi nga tava kona kwale hansi.” Nakona Yeremiya u swi vurile hi kuya hi Rito ra Xikwembu.

¹¹¹ Hananiya u swi tshovile sweswo! Yeremiya u teri, “Swi lulamile. Amen. Kambe, Hananiya, a hi tsundzuki leswi, havumbirhi bya hina hi vaprofeta. Hi tiministara.”

Kutani ndzi vula leswi eka wena, boti wa mina. A hi tsundzuki leswaku ku vile na vaprofeta hi nga seva kona, nakona va profetile ku lwisana na mimfumo, nakona va profetile ku lwisana na swilo swo karhi. Kambe, tsundzuka, loko muprofeta a vula swin’wana na swin’wana, u fanele ku profeta hi kuya hi Rito. Tani hi Mikiya, na Muxe, na hinkwavo ka vona. Swi fanele

kuva hi kuya hi Rito. Loko swi ngari tano, kutani tsundzukani leswi humeleleke.

¹¹² Kutani, Hananiya, ku siringeka ka vululami bya yena ku tlakuka. “Ndzi Hananiya” (ku hava ku kanakana), “muprofeta wa Hosi, nakona ndzi ri, ‘Malembe mambirhi.’” Hi marito yan’wana, “A ndzi na mhaka na leswaku Rito ri ri yini.” Ntoto wa yena, “Ndzi ri, ‘Malembe mambirhi, va tava va vuyile.’”

¹¹³ Yeremiya u sukile mahlweni ka yena a huma, a ya ehandle, a ku, “Hosi, a ndzi na mhaka na leswi a swi vuleke, ndza pfumela na ku switiva leswaku Rito rero ri vula tano. Ndzi ta tshama hi ntiyiso eka Wena. A ndzi nge kanganyisiwi hi yena.”

¹¹⁴ Xikwembu xi ku, “Famba u ya byela Hananiya, ‘Ndzi ta ri endla hi nsimbhi, joko leri landzelaka.’” Hikuva a endlile sweswo, u tekiwile kusuka exikandzeni xa misava, Hananiya na yena, hi lembe rin’we.

Hi xexo xikombiso xa hina, vaprofeta ha vumbirhi. Swingaleswi swo tala swi nga vuriwa ni ku vulavuriwa hi swona enkarhini lowu.

¹¹⁵ Kambe vonani. Yesu u vurile, leswaku, enkarhini lowu wa makumu, nakambe, mimoya leyi mbirhi yi tava kusuhi swin’we nakambe. A hi swona sweswo? [Nhlengeletano yi ku, “Amen.”—Muhleri.] Xiyisisani sweswi. Yi tava ekusuhi kutlula leswi a yi ri xiswona. Lowu i nkarhi wa makumu. Oho, vana! Xikwembu a xive na tintswalo ehenhla ka hina! Ku kondza, “Swi tava swa xiviri ku kondza swi hambukisa na vona Vahlawuriwa loko swi nga koteka.” Sweswi xana mi ta . . . xana hi swi vurisile ku yini emasikwini lawaya? Xana mi ta swi vurisa ku yini namuntlha? Hi ndlela leyi fanaka, tshamani na Rito, “Yesu Krete wa ha fana ni tolo, namuntlha, ni hilaha ku nga heriki.”

Sweswi hlayisani Hungu leri hinkwaro. Kutani loko mi yingisela eka thepi, hambi loko kumbexani ndzi tava ndzi fambile siku rin’wana loko Hosi yi hetile hi mina laha emisaveni, mi ta kongomisela endzhaku eka leswi. Yingiselani rito ra mina, leswi ndzi mi byelaka swona. Loko Yi ndzi teka ku nga se fika ku Vuya ka Yona, ntsena tsundzukani, ndzi vulavurile na n’wina hi Vito ra Hosi, hi Rito ra Hosi. Ina.

¹¹⁶ Xiyisisani, “Ku va ekusuhi swinene lero swi nga hambukisa Vahlawuriwa loko swi nga koteka,” va ta endla masingita lawa ya fanaka, mahlori lawa ya fanaka, hi Moya wun’we. A hi swona sweswo xana? [Nhlengeletano yi ku, “Amen.”—Muhleri.] Ntsena tani hilaha vaprofeta lava hi vulavuleke hi vona a vari xiswona, vaprofeta. Sweswi, swi tsariwile nakambe. . .

¹¹⁷ A hi pfuleni eka swona, eka leswiwani, loko mi swi lava, Timotiya wa Vumbirhi 3. Mi nge hi nga swi siyi leswiwani. Nakona a ndzi lavi ku. . .

¹¹⁸ Ndzi langutile wachi le henhla, kutani ndzi—ndzi lava ku siya swotala swa swona, nakona a ndzi ehleketi leswaku hi fanele ku swi endla sweswi. Wa vona? Xiyisisani. Ntsena. . . Loko ndzi yimile lahawani, ndzi juluka tani hi leswi ndzi nga xiswona, wa vona, kambe ndzi tsakile. Nakona ndza switiva leswaku wolowo i ntiyiso. Timotiya wa Vumbirhi 3:8.

¹¹⁹ Paul, wanuna loyi a nga teri, “Loko Ntsumi yi nga ta kusuka eTilweni kutani yi vulavula rito rin’wana eka n’wina ehandle ka leri ndzi ri vuleke, a yi rhukaniwe,” sweswi, Ntsumi yi xikerile ehansi. Yaleyo i Vatesalonika va Vumbirhi. . . Oho, ndzi khomeleni.

¹²⁰ Xiyisisani eka Timotiya wa Vumbirhi 3:8. Vonani Paul loko a vulavula sweswi. A hi sunguleni hi kwalomu ka. . . A hi sunguleni emasunguleni ya ndzimana, kutani mi yingisela swinene sweswi. N’wina lava mi nga na Tibibele, hlayani na mina. N’wina lava nga riki na Tibibele ta n’wina, yingisani swinene. Ti. . .

Tiva mhaka leyi, leswaku emasikwini ya makumu. . .

Khwatihatani sweswo, “masiku ya makumu.” Hilaha swi nga ta humelela.

. . . ku ta ta minkarhi yo nonohwa. (Hi le ka yona.)

Hikuva vanhu va tava lava tirhandzaka, lava rhandzaka swa van’wana, vatikurisi, vatikukumuxi, vasandzi, lava nga yingisiki vatswari va vona, lava nga tiviki ku khensa, lava nga tengangiki,

¹²¹ Langutisani ntlawa lowu hi nga na wona namuntlha, wo bola. Hambu kuri eka vavanuna le handle exitarateni, majaha, va kokela misisi emagon’wini ya vona, tani hiloko va ri na misisi yo ncikinyha kukota wansati. Vuencenyeti! Vasodoma!

¹²² Xana mi kale mi hlaza eka lembe leri, *Reader’s Digest* ya n’hwetile leyi? Yi ri, “Vanhu va Amerika eka nguva,” leyi ndzi ehleketaka leswaku hi yona leyi, “exikarhi ka makume mbirhi na makume mbirhi—ntlhanu wa malembe hi vukhale, va va vari eka xiyimo xa malembe ya le xikarhi.” Va herile! Va borile! Sayense yi vula leswaku, leswaku wanuna u va eka malembe ya le xikarhi, na wansati, loko va hari eka malembe ya vumakume mbirhi. Mimiri ya vona yi borile ni ku nyiketwa eka vubihhi.

¹²³ Oho, Amerika, i kangani laha Xikwembu a xi tava xi mi wungerile, kambe sweswi awara ya n’wina yi fikile! Mi rhangela misava hi vubihhi.

. . . vasandzi, lava nga yingisiki vatswari va vona, lava nga tiviki ku khensa, lava nga tengangiki,

Lava nga riki ni rirhandzu ra ntumbuluko, . . .

Ku hava rirhandzu ra ntiyiso hambu kuri un’wana eka un’wana, wanuna eka wansati, wansati eka wanuna. “Ku hava hambu rirhandzu ra ntumbuluko.” Vubihhi, hi swa masangu!

. . .lava nga tshembhekangiki, valumbeti, lava nga tiviki ku tikhoma, vakarihi, ni vavengi va lava lulameke,

Hi marito yan'wana, u ri, "N'wina ntlawa wa vavumbuluki vokwetsima." Un'wana u vutisile siku rin'wana mayelana na ku ta laha ekerekeni. A ku, "U nga yi lahayani. Hinkwaswo ka swona i huwa leyikulu ni kuya emahlweni."

Wa vona, "vavengi va lavaya."

Vaxengi, lava nga tiviki ku tikhoma, lava tikurisaka, lava rhandzaka ku titsakisa kutlula ku rhandza Xikwembu;

Mi ri, "Makwerhu Branham, sweswo i vukhomonisi." Xana ndzimana leyi landzelaka yi ri yini?

Va ni nghohe ya vukhongeri, kambe (yini?) va ala matimba ya byona: (Rito, Yesu Kreste loyi a fanaka na tolo, namuntlha, na hilaha ku nga heriki, u vonakarisiwile, xitshembhiso xa siku). . .

Ntsena tani hi Hananiya, ntsena tani hi Zedekiya, ntsena tani hi Balaam, ku ya endzhaku, vaprofeta van'wana va vunwa.

Va ni nghohe ya vukhongeri, (va totiwile. . . Wa vona?)

Va ni nghohe, (va totiwile, tiministara leti vekiweke. . .)

Va ni nghohe ya vukhongeri, kambe va ala (leswaku Wa hari loyi a fanaka na tolo, namuntlha, ni. . . Va ala Rito ra Yena!)

Xana va n'wi arisile ku yini Yesu esikwini rero? Xana va arile mani loko va ala Yesu? Rito. A vari vakhongeri. A va dyondzisa kusuka eka Bibe le va vona, kambe va arile Rito ra siku ra nkarhi walowo.

Xana hi vahi namuntlha? Nchumu lowu fanaka, va totiwile, va chumayela Evhangelu ya pentekosta, kambe va ala xitshembhiso xa siku ra sweswi xa Rito lexi tiyisisiweke, "Yesu Kreste hi loyi a fanaka na tolo, namuntlha, ni hilaha ku nga heriki." Ma swi vona xana? [Nhlengoletano yi ku, "Amen." — Muhleri.]

Hikuwa lava hi van'wana va lava ngenaka etindlwini, ni ku rhangela. . .vavasati va swiphukuphuku lava tikeriweke hi vudyoho, lava fambisiweke hi ku navela ka tinxakanxaka,

"Mavandla ya hina yo phasaphasana na *swingere-ngere* swa hina." Munhu un'wana u tile haleno a ri karhi a ringeta ku toloka Rito hi ku hoxisa, kutani a vula leswaku, "Swi lulamile, sesi, kuva u va na misisi yo koma. U nga yingiseli xiphukuphuku xexo. Wa vona? Kumbe, loko u—u ambala *leswi*; a hi *sweswo*, 'hi leswi humaka embilwini ya munhu leswi n'wi nyamisaka.'" Wa vona? Nakona xana wa swi lemuka leswaku u totiwile hi lowo

biha, wo navela, moya wa thyaka? Tivoneli, u nga ha yimbelela ekhwayereni, na misisi yo koma, kambe u na moya wo biha. Sweswo swi hambanile na Rito. Sweswo hi swona. Hi leswi Biblele yi swi vuleke. Nakona mi ri, “Hi swona, ndzi ambala leswo koma. A swi ndzi avanyisi.”

“Hambi ku ngava mani, loko wansati a ambala nguvu leyi fambelanaka ni ya wanuna, i manyala emahlweni ka Xikwembu.” Xikwembu lexi nga ncinceki xi vurile sweswo.

¹²⁴ Oho, swilo swo tarisa xileswi, xana hi nga hundzisa ku yini eka swona? Nkarhi wa hina wu tava wu fambile. Kambe mi tiva ku ringana ku tiva leswi lulameke ni leswo hoxeka. Nakona ndzi nga swi endlisa ku yini kuva va swi endla? Ndzi nga swi endlisa ku yini xana? Va ri, “Hi swona, xana u huwelela hi mayelana na yini?” Ndzi mbhoni ku lwisana na n’wina. Siku rin’wana, hi Siku ra ku Avanyisa, a mi nga tava na yinhla yo ya kona.

¹²⁵ Xana Mikiya a ta swi yimisisa ku yini sweswo? Muxe a ta swi kotisa ku yini, ku huwelela, ku ringeta ku swi yimisa? Kutani Yoxuwa na vona va ri karhi va tsutsuma exikarhi ka vanhu? Nakona Levi u hlomurile tlharhi ra yena, ni ku va tlhavetela, ku ringana? Va yile emahlweni hilaha ku fanaka.

Swi bvumbhiwile leswaku va ya eku swi endleni. Nakona va ya eku swi endleni, hikuva hi LESWI HOSI YI SWI VULAKA leswaku va ya eku swi endleni. Mi ehleketa leswaku minhlawulo yi ta kala yi phatluka, dinominexini ya vona yi vuyela eRitweni? Hi LESWI HOSI YI SWI VULAKA, va ngaka! Xana va taya eka antikreste? Kunene. Hi LESWI HOSI YI SWI VULAKA, va taya! “Swingaleswi mi ri yini mayelana na sweswo?” Ndzi fanele kuva mbhoni, nakona swi tano hi n’wina, vappfumeri hinkwavo. Vonani.

. . . vavasati va swiphuphuku lava tikeriweke hi . . . ku navela ka tinxakaxaka,

¹²⁶ “Hi swona, vavasati hinkwavo va swi endla.” Vaprofeta va mavunwa! Yingisani sweswi. Vaprofeta va mavunwa, lava ndzi vulavulaka hi vona. Xana va ta endla yini hi siku ra makumu?

. . . va rhangela vavasati . . . va fambisiwa hi ku navela ka tinxakaxaka,

“Hi swona, ndza va tiva vavasati hinkwavo . . .” Hi swona, yana emahlweni.

¹²⁷ Xana ndzi te yini loko ku nga se va na swikulukumba leswi nga ta humelela laha eCalifornia? “N’wina vanhu lahawani eLos Angeles, lembe rin’wana na rin’wana loko ndzi vuya ku na vavasati votala va misisi yo bobwiwa na vavanuna lava nga na vusati kutlula lava a vari kona ekusunguleni, vachumayeri votala vava eka mavandla. A mi na xo tumbela hi xona! Loko mintirho ya matimba a yi endlilwile eSodoma na Gomora leyi endlilweke eka n’wina, a yi tava yi yimile namuntlha. Oho,

Kapernaum, wena loyi a tivitanaka hi vito ra tintsumi, Los Angeles!” Ma swi vona leswi humelelaka? U ya kona kwale hansa ka lwandle. Rini? A ndzi swi tivi leswaku swi ta humelela rini, kambe ri le kuyeni. N’wina vanhu lavantsongo, loko ndzo ka ndzi nga swivoni enkarhini wa mina, mi swi langutisa. U fambile!

Va dyondza hi masiku hinkwawo, . . . kambe a va swikoti ku fika eku tiveni ka ntiyiso.

Sweswi hi lexi xo hlamarisa, hi lexi xiphemu lexi hlamarisaka. Yingiselani leswi.

Sweswi tani hilaha Yanne na Yambre va aleleke Muxe, swi tano hi lava na vona va alaka ntiyiso: vavanuna lava boleke emiehleketweni, swihunguki hi tlhelo ra ripfumelo leri nga tshama ri nyikiwa vakwetsimi, hakunene-nene.

“Hi tlhelo ra Ripfumelo.” “Kutani u ta tlherisela Ripfumelo ra vatatana, kumbe vana, eka vatatana.”

¹²⁸ “Swihunguki hi tlhelo ra Ripfumelo.” Ahaa! Xana ma switiva leswi *vuhunguki* swi vulaka swona? Loko mi ri na Bible ya Scofield, ku na “h” lahaya. Kona kwalahaya, yi ri, “vugwinihi.” Vugwinihi, hi leswi swi nga swona.

¹²⁹ Sweswi, minete ntsena. Ndzi lava ku langutisa swin’wana lahawani. Ndzi ehleketa leswaku ndzi swi tsarile kahle ehansi. A ndzi na ntiyiso wa swona, kambe ndzi lava ku swivula, ni ku swi languta loko ndzi—ndzi nga se swivula. Sweswi, minete yin’we ntsena. [Xivati lexi nga riki na nchumu eka thepi—Muhleri.] “Swihunguki hi tlhelo ra Ntiyiso, hi tlhelo ra Ripfumelo.” “Ripfumelo,” ku na Ripfumelo rin’we ntsena. Hi swona sweswo. “Hi tlhelo ra Ripfumelo, swihunguki!”

Sweswi ndzi lava ku hlaya Luka 18. Minete ntsena. A mi boheki . . . Mi nga tsala ehansi; a mi boheki ku hlaya.

Naswona A va byela xifaniso xo hetelela, leswaku vanhu va fanele ku khongela nkarhi hinkwawo, va nga tshuki . . . va karhala;

A ku—a ku, Emutini wun’wana a kuri ni muavanyisi, loyi a nga chavi Xikwembu, ni vanhu a nga va vuli nchumu:

Kutani a kuri ni wansati wa noni emutini lowu fanaka; nakona u yile eka yena, a ku, ndzi Avanyiseli eka loyi a ndzi tengisaka.

Kambe a—kambe a ala nkarhi wo leha: kambe endzhaku a tianakanya, Hambi leswi ndzi nga chaveki Xikwembu, hambu kuri ku vula nchumu hi munhu;

Hambi swi ri tano hikuva noni leyi ya ndzi karhata, ndzi ta n’wi avanyisela, leswaku a nga . . . a ta ndzi pandzisa nhloko.

Kutani Hosi yi ku, Yingisani leswi vuriwaka hi muavanyisi loyi a nga lulamangiki.

Nakona xana Xikwembu xi ngaka xi nga avanyiseri . . . vahlawuriwa va xona, lava vitanaka eka xona nhlekanhi ni vusiku, hambu loko xi hlwela ku va rihisela?

Ndzi ri ka n'wina, xi ta hatlisa xi va rihisela. Kambe kutaku loko Nwana wa munhu a ta, xana u ta kuma ku pfumela kuri kona emisaveni?

¹³⁰ Sweswi hi xona xivutiso xexo. Lahawani hilaha a ndzi lava kuya kona, eka Nhlavutelo 10. Hi ta ya eka yona ku ngari khale, eka yin'wana ndzimana ya Tsalwa. U teri, “Emasikwini ya Hungu ra ntsumi ya vunkombo, hilaha xihundla xa Xikwembu xi nga ta hetiseka.” Hi lexi xivutiso, hi leswaku, loko mi landzelerisa eka ntila walowo eka awara leyi, xana swi ta hetiseka? “Xana Ndzi nga ri kuma Ripfumelo?” Xana Malakiya 4 yi nga hetiseka enkarhini lowu, “Ku tlherisela Ripfumelo ra vana, eka Ripfumelo ra vatatana, ra xiviri, Rito”? Wa vona?

¹³¹ “Swihunguki, Yambre na Yanne, tani hilaha va aleleke.” Sweswi, nakambe, yingisani, Timotiya wa Vumbirhi 3:8. “Tani hilaha Yan- . . . va aleleke Muxe, nakambe emasikwini ya makumu swihunguki leswi fanaka swi ta ta,” sweswi vonani laha Yi vulaka lahawani, “va ni nghohe ya vukhonger,” lava va totiweke. Sweswi ntsena a hi . . . Mi tlhelela endzhaku ni—ni ku swi hlaya loko mi fika ekaya, leswaku ndzi ta kota ku heta leswi, mixo lowu, loko ndzi nga swikota. “Swihunguki hi tlhelo ra . . .” Ku ngari swihunguki eku—eku—eku hanyeni; va kahle, vanhu va ndhavuko.

¹³² Xiyisisani sweswi, loko Muxe a ya eEgipta, na hungu ra LESWI HOSI YI SWI VULAKA, nakona a tiyisisiwile; a vitaneriwela Israel, leri a ri ri vanhu, ku ngari kereke. Israel a kuri vanhu; a va kalanga va va kereke. Hikuva, rito *kereke* ri vula “lava vitaniweke.” A vari vanhu va Xikwembu. Kutani loko va tava va totiwele ehansi ka Rito, ni ku vitaniwa, va hundzokile kereke ya Xikwembu. Kutani va wile, hikuva a va pfumelanga Rito ra Xikwembu, nakona va yingiserile muprofeta wa vunwa. Ndza tshembha sweswo swi ta nwelela endzeni.

Israel, kuva vanhu va Xikwembu, ri humile hi le hansi ka voko ra Xikwembu, va totiwele hi Rito . . . hi Matimba ya Xikwembu, va vonile masingita na swihlamariso swa Xikwembu. Kutani loko Xikwembu xi ri karhi xi famba na vona, ku ngenile muprofeta wa vunwa, loyi a totiweke, kutani a dyondzisa swin'wana swo hambana na Rito ra Xikwembu leri va ri teweke; nakona un'wana na un'wana va vona u helerile emananga, handle ka vanhu vanharhu. Swi khomeni sweswi.

¹³³ “Tani hi leswi a swi ri xiswona emasikwini ya Nowa, laha ku nga ponisiwa mimoya ya nhungu hi mati, swingaleswi swi

tava tano eku vuyeni ka N’wana wa munhu.” “Tani hi leswi a swi ri xiswona emasikwini ya Lot, laha vanharhu va humeke eSodoma, swi tava tano hi nkarhi lowu N’wana wa munhu a nga ta paluxiwa.” Ndzo va eku tshaheni ka Matsalwa ntsena, Rito ra Hosi, leri, “Matilo na misava swi ta hundza . . .” Ku tava nhlayo leyintsongo!

¹³⁴ Xiyisisani lahawani. Muxe u ya eka Aroni. Muxe a fanele kuva Xikwembu. Xikwembu xi n’wi byerile leswaku a va Xikwembu, xi ku, “U tava Xikwembu, kutani Aroni makwenu wa wena u tava muprofeta wa wena. U ta veka marito enon’weni wa yena loko u nga koti ku vulavula kahle.” Xi ku, “Kambe i mani loyi a endleke munhu a va mbheveve? I mani loyi a endleke kuva munhu a vulavula?” Swi endlwile hi Hosi.

Kutani u yile lahaya. Xana u endlile yini? U endlile mahlori ya ntiyiso na ku lulama lawa Xikwembu xi n’wi byeleke ku ya endla. Xikwembu xi n’wi byerile ku, “Famba u ya hoxa nhonga ya wena ehansi.” A yi tlakula, nakona a yi ri nyoka. U yi tlakurile, kutani yi hundzukile nhonga. Xi ku, “Famba u ya swi endla emahlweni ka Faro, kutani u ku, ‘HI LESWI HOSI YI SWI VULAKA.’”

¹³⁵ Kutani loko Faro a vona leswi, hi ri, “Hikokwalaho ka yini, i salamusi ro chipa swonghasi.” A ku, “A kuna nchumu eka swona. I ku hlaya ka miehleketo kumbe swin’wana, wa switiva. Hi na vanhu evandleni ra hina lava nga endlaka swo fana na sweswo. ‘Tana haleno, Bishopo *Swingere-ngere*. Kutani, wena, wena tana haleno.’ Hi na vona lava nga endlaka swona leswi fanaka.” Yaloye a kuri Sathana a vulavulaka hi Faro.

Xexo a kuri Xikwembu lexi vulavulaka hi Muxe.

¹³⁶ Kambe langutani nakulorhi loyi a humaka. Yanne na Yambre va humile va ya emahlweni ka Muxe, na le rivaleni emahlweni ka vanhu, na ku endla mahlori hinkwawo lawa Muxe a ta ma endla. “Va ta hambukisa na vona Vahlawuriwa loko swi nga koteka.” Hi swona sweswo? Va endlile swo fana ni leswi Muxe a swi endleke. Ma swi kuma? Tsundzukani sweswi, hi LESWI MATSWALWA YA SWI VULAKA, leswaku swi ta vuyelela nakambe emasikwini ya makumu.

Xana ku hambana a kuri yini exikarhi ka Muxe na Yambre?

Muxe u teri, “Ngati a yi humi ematini.”

Kutani vaprofeta lava mavunwa va ku, “Kunene, hi veka ngati endzeni ka mati, na hina.” Nakona swi humelerile.

¹³⁷ Swingaleswi Muxe u teri, “A kubi na tinhwala.” Xana a ti kuma kwihi? Kusuka eka Xikwembu. Wa vona?

Kutani xana u endlile yini? U teri, “Hi swona, kunene, hi nga ti tisa tinhwala, na hina.” Nakona va swi endlile. Mahlori hinkwawo lawa Muxe a ta ya endla, a va ta ya endla, na vona!

Tsundzukani, swi hlayseni emiehleketweni sweswo, hi le kuteni eka swona, endzhaku ka nkarhi. Va nga endla xin'wana na xin'wana lexi hinkwavo ka vona va nga xi endlaka, kambe va ngaka va nga tshami na Rito. Va ngaka va nga tshami na Rito.

¹³⁸ Xiyisisani sweswi, va swi endlile. Kambe Muxe, muprofeta wa ntiyiso loyi a rhumiweke kusuka eka Xikwembu, loyi a lerisiweke hi Xikwembu, a nga kalanga a holovisana na vona, a ku, "Lahawani, mi ngaka mi nga swi endli sweswo! Mi ngaka!" U lo va tshika vari voxé, a va tshika va ya emahlweni. I vaprofeta va mavandla, kambe yanani emahlweni.

Muxe u lo tiyela emahlweni, a yingisa Xikwembu. Swin'wana na swin'wana leswi vuriweke hi Xikwembu, "Sweswi u endla *leswi*," Muxe u yile a ya swi endla. U endlile nchumu wuntshwa. Loko va wu endlile, un'wana na un'wana wa vona a ri na nyanyuko kumbe swin'wana, hi lava va taka. Va wu endlile, na vona, ntsena tani hilaha Muxe a endleke hakona.

¹³⁹ Xiyisisani sweswi. Vanakulorhi lava va humelerile. . . Oho, n'wina vanhu, mi nga hundziwi hi leswi! Vanciseteri lava, va encenyeti, va humelerile endzhaku ka loko loyi wa ntiyiso a tile ku sungula. Wa vona? Va tela ku encenyeta. Wa vona, va fanerile. Javulosi a ngaka a nga tumbuluxi na nchumu; o va ntsena muencyeti wa leswi swa xiviri.

Nakona xidyoho i yini? I vululami lebyi encenyetiweke. Xana vumbhisa i yini? Ku encenyetiwa ka swiendlo leswinene. Xana vunwa i yini? Ntiyiso lowu vekiweke hi ndlela yo hoxeka. Vuencyeti!

Langutisani Hananiya, vuencyeti bya Rito ra xiviri. Langutisani Balaam, vuencyeti bya Rito ra xiviri. Langutisani Zedekiya, vuencyeti bya Rito ra xiviri.

Nakona Bibeles yi vurile leswaku vanhu lava va ta humelela, endzhaku ka ku encenye- . . . kumbe ku encenyeta Rito ra xiviri leri tiyisisiweke ni ku khorwisiwa kuva ri ri Ntiyiso.

¹⁴⁰ "Endla ntirho wa vuevhangele," eyinhleni yaleyo kwalano, "endla vumbhoni lebyi hetisekeke bya ministri wa wena. Hikuvu ku ta fika nkarhi laha va nga taka va nga yingiseri Dyondzo leyi hanyaka, kambe endzhaku ka ku navela ka vona va ta tihlengelletela vadyondzisi, va ri karhi va ti phumundha tindleve; kutani va ya emahlweni ni ku endla swin'wana na swin'wana leswi va swi lavaka, nakona, 'Swi lulamile, hi na masingita na swihlamariso swo fana.' Kutani va ta susiwa eNtiyisweni, ni ku yisiwa emintsheketweni, mikhuva."

¹⁴¹ Oho, ku lemukisa ka Moya lowo Kwetsima, nchavo lowu baka moya wa munhu loko a yima ku ehleketa hilaha swi nga swa xiviri na kuva erivaleni hakona emahlweni ka hina! Yimbula ribye rero ra yinhla lahawani kutani u hlaya xiphemu xa phepha lexi vekiweke lahaya, makume nharhu wa malembe lawa ya hundzeke. Vona leswi A swi vuleke lahaya e—e Seventh

Street, mixo lowuya loko ribye leri ra yinhla ri vakeriwa. Swi languteni sweswi. Langutisani laha enambyeni, loko Ntsumi ya Hosi yi xikerile ehansi hi xivumbeko xa Langavi ra Ndzilo, madzana-dzana ya tikereke, kumbe vanhu va kereke, va yimile ku rhendzeleka hi ribuwa; leswi A swi vuleke, langutani loko swi humelerile. Langutani leswi nga humelela.

Swi tika ngopfu. Ndza switiva leswaku swi tikomba swi tika, vamakwerhu, le handle. Kambe swi. . . Bibeke yi teri, Yesu hi Yexe u teri, “Swi ta hambukisa na vona Vahlawuriwa loko swi nga koteka.” A ku na ndlela yin’wana eka swona. Va ngaka va nga tshuki va Swi vonile. Loko swi nga koteka, na vona Vahlawuriwa a va ta hambukisiwa hi swona.

¹⁴² Xiyisisani, vanakulorhi lava va humelerile endzhaku ka loko mutotiwa wa ntiyiso wa Xikwembu a rhumiwile; hi muprofeta wa Xona wa ntiyiso, Muxe. Nakona loko Muxe a endla xin’wana na xin’wana, a va ta xi encenyeta.

¹⁴³ Sweswi, boti, sesi, ndzi. . . Leyi i kereke leyi nga ya mina. Ndzi na mfanelo yo chumayela leswi ndzi swi lavaka, ntsena loko swi huma eRitweni ra Xikwembu. Nakona a ndzi le ku mi avanyiseni n’wina vanhu, kambe a hi kambisiseni sweswo eka nkarhi na awara leyi hi hanyaka eka yona.

Xewani Makwerhu Ruddell, eka Junior Jackson, na vona kwala handle, tikereke leti nga vamakwerhu wa hina. Ndzi va rivarile, nkarhi lowu nga hundza. Ndzi ehleketa leswaku va le ka swa vuhlanganisi emixweni lowu, na vona, hikokwalaho ko pfumala—ko pfumala ndhawu ekerekeni.

¹⁴⁴ Ntsena ehleketani hi swona sweswi, minete ntsena. Va endlile mahlori yo fana ni lawa Muxe a ya endleke. Muxe u tisile tinhwala; va swi encenyetile kutani va tisa tinhwala. Wa vona?

Xikwembu xi teri, “Siku mi nga ta dya lahaya, hi siku lero mi ta fa.”

¹⁴⁵ Sathana u tile kwalahaya kutani a ku, “Kunene, mi ngaka mi nga fi. Mi ta tlhariha. Mi tava na vandla ro antswa, swo antswa. . .” Ma swi tiva. “Wa swi tiva, hinkwaswo swi tava leswi antswaka eka n’wina, mi va na Vutivi byo antswa.” Wa vona, kova vuencenyeti ntsena. Mi fanele. . .

Nakona tsundzukani, LESWI HOSI YI SWI VULAKA, hi kuya hi Timotiya wa Vumbirhi 3:18, leswaku, “Emasikwini ya makumu, leswaku Yambre na Yanne lava va tava emisaveni.” Sweswi, ndzi lava leswaku mi lemuka leswaku i vumbirhi, wa vona, vaencenyeti.

¹⁴⁶ Sweswi hi ya eku tlheleleni endzhaku eSodoma, endzhaku nyana, vunharhu bya tona, mi kuma Tintsumi tinharhu leti nga xikela ehansi, kutani mi vona vuencenyeti, na swin’wana, wa vona, mi vona leswaku hi swin’wana leswi lulameke na ku hoxeka. Wa vona? Wa vona?

¹⁴⁷ Xiyisisani, va endlile mahlori lawa ya fanaka. Kambe, xiyisisani, va encenyetile endzhaku ka loko Rito ra ntiyiso ri totiwile, hi loyi a nga wa ntiyiso loyi a rhumiweke hi Xikwembu; a landzela, hi ku tlhandlama.

Ndza tivutisa loko hi nga ehleketa nyana xinkadyana. Ku teka vanhu hi voko, ku ngari khale ngopfu, kwalomu ka makume mbirhi wa malembe lawa ya hundzeke, kutani ku humelerile singita. Jaha, a kuri na masingita yo tala ehenhla ka swilo hinkwaswo, nakona munhu un'wana na un'wana . . . Un'wana u ma kumile evokweni ra yena ra xinene; un'wana u ma kumile evokweni ra yena ra ximatsi; loyi un'wana a ma nuhwetela. Wa vona, tinxaka hinkwato ta . . . Nakona ndza tivutisa . . . Xikwembu xi nge ndzi pfumeleli ndzi mi byela eka lowu nkarhi leswi a swi ri ntiyiso, kambe siku rin'wana mi ya eku swi kumeni. Sweswo a kova ntsena ku vonakarisa vuphukuphuku bya vona. Sweswo a swi nga lulamanga, eku sunguleni. Ndzi ta mi byela, siku rin'wana, loko Hosi yi swi pfumelela.

¹⁴⁸ Xiyisisani, va endlile mahlori lawa ya fanaka, kambe a va . . . Xiyisisani, a va swi endlanga kukondza Rito ra xiviri ri humelela, ku sungula. Yaleyo hi yona ndlela leyi Sathana a endleke hakona entangeni wa Eden. Yaleyo hi yona ndlela leyi a endleke hakona nkarhi hinkwawo. I mani loyi a sunguleke a profeta? Muxe. I mani loyi a sunguleke a fika eka xivono, Muxe kumbe Balaam? Muxe. I mani loyi a sunguleke a fika eka xivono, Yeremiya kumbe Hananiya? Ma swi vona leswi ndzi swi vulaka xana? [Nhlengeletano yi ku, "Amen."—Muhleri.]

¹⁴⁹ Xiyisisani, va koperile. Vaencenyeti va xinyama, va tshembheka, va ehleketa leswaku va "endlela Xikwembu ntirho," tani hilaha Davida a endleke hakona, vhiki leri nga hundza, kambe vuencenyeti bya xinyama. Ndzi ta yima nyana xinkadyana. Ndzi lava leswaku mi ehleketa exikarhi ka tindhawu leti. Loko ndzi nga swi vuli, kunene Moya lowo Kwetsima wu ta swi paluxa, ngopfu-ngopfu eka Vahlawuriwa. Wa vona?

¹⁵⁰ Dinominexini ya Faro yi ri, "Hi na vavanuna lava nga ta endla nchumu lowu fanaka," nakona va wu endlile. Wa vona? Hikokwalaho ka yini Faro a endlile leswi? Hikokwalaho ka yini Xikwembu xi swi pfumelerile? Hikokwalaho ka yini Xikwembu xi rhumela wa ntiyiso, muprofeta loyi a totiweke kwalahaya ku ya endla masingita emahlweni ka Faro, nakona xi pfumelela vuencenyeti bya xidinominexini kuta ni ku ta ma kopela emahlweni ka vanhu? Hikokwalaho ka yini Xi pfumelerile muencenyeti kuva a yima a swi endla, ni ku endla nchumu lowu kunene wu fanaka ni lowu endlilweke hi Moya wa xiviri wa Xikwembu? Wa vona, Matsalwa ya fanele ku hetiseka.

¹⁵¹ Xiyisisani, Xi endlile leswi leswaku Xi ta nonohwisa mbilu ya Faro ni Vaegipta, ku khorwisa leswaku Muxe a ngari yena

ntsena loyi a ri na Rito. A va ta endla hinkwaswo ku fana na leswi Muxe a ta swi endlisa xiswona.

Kutani hikokwalaho ka yini Xikwembu xi pfumelerile nchumu lowu kuva wu humelela emasikwini ya makumu? Swingaleswi, nchumu wun'we tani hi moya wo hamba wu teri eka Zedekiya, "Xana hi ta n'wi humesisa ku yini Akab le handle, ku endla leswaku swilo leswi swi humelela?" Xana Xi tava endlisa ku yini vanhu lava, lava tshembheleke etikerekeni ta vona, kuva va humela ehandle lahawani ku endlela leswaku leswi swi ta humelela, leswi Xi swi bvumbheke? Va, eka Nguva leyi ya Kereke ya Laodekiya, "Hikuva u ri u 'mufuwi, nakona a ndzi pfumali nchumu. Ndzi tshamile tani hi hosikazi.' A wu na nchumu! Kasi a wu swi tivi leswaku u na khombo, u xisiwana, u file mahlo? Kutani Ndza ku khongotela leswaku u tixavela eka Mina," Xi ku, "mafurha na nsuku." Hikokwalaho ka yini Xi swi endlile?

¹⁵² Hikokwalaho ka yini Xi pfumelerile vuencyenyeti lebyi kuva byi pfuka emasikwini lawa ya makumu, loko swilo leswi swi ri karhi swi humelela hi Rito ra Xikwembu ra ntiyiso; ni ku pfumelela vaencyenyeti va ta na ku endla nchumu lowu fanaka, na ku tsan'wa Rito ra Xikwembu ra ntiyiso? Xi swi endlile eka Muxe. Nakona Faro u swi endlile ku lwisana na Muxe; na lavaya, Yanne na Yambre, va swi endlile ku lwisana na Muxe. Nakona Bibe le yi vurile leswaku swi ta tlhela swi vuya nakambe emasikwini ya makumu. Hi hina lava. Sweswi, loko sweswo ku ngari ku hetiseka ka Matsalwa, xana swi le kwihi?

¹⁵³ Xana Muxe u kale a va holovela ni ku vula leswaku, "Lahawani! Lahawani! Mi ngaka mi nga swi endli sweswo. Hi mina ndzi ri ndzexe loyi a vekiweke ku endla sweswo. Lahawani! Yimani ku endla sweswo, sweswi"? U lo va tshika va famba.

Va tshikeni va ya emahlweni. Tsundzukani, Bibe le yi teri, "Tani hilaha vuphukuphuku bya vona byi paluxiweke, na swona leswi swi ta paluxiwa hi siku ra makumu," loko Mutekiwa a tlhandlukisiwa ni ku vutleriwa empfhukeni. Xiyisisani.

¹⁵⁴ Muxe, Rito ra ntiyiso leri vonakarisiweke, a nga kalanga a vula nchumu, u lo swi tshika swi tifambela. Kambe Xi endlile sweswo leswaku Xi ta nonohwisa mbilu ya Faro, ku kanganyisa Faro.

Xi endlile nchumu lowu fanaka leswaku Xi ta kanganyisa Akab. Kutani wanuna un'we lontsongo loyi a yimile hi lahaya a ri yexe, Mikiya lontsongo, a ri eku va byeleni, "LESWI HOSI YI SWI VULAKA." Hi loyi un'wana a yimeke, loyi a totiweke, "LESWI HOSI YI SWI VULAKA." Nakona a va hambana, un'we eka un'wana.

¹⁵⁵ Ha yima namuntlha na LESWI HOSI YI SWI VULAKA, leswaku nkhuvo wa mati emasikwini ya makumu wu tava hi

Vito ra Yesu Kreste. Kutani wanuna un'wana a yima ni ku endla mahlori, nakona, i Mutrinitarian.

Ndzi kombeteni rito *vunharhu bya tilo* eBibeleni. Ndzi kombeteni laha ku nga na Swikwembu swinharhu. Ndzi kombeteni laha ku nga na swilo swo tani hi sweswo. A swile Ritweni ra Xikwembu. Ku hava nchumu wo tani hi un'wana loyi a nga kala a khuvuriwa hi vito ra "Tatana, N'wana, Moya lowo Kwetsima," hi ku tirhisa swiyimela vito sweswo. Swilo leswi hinkwaswo, "Oho, swi lulamile, vasesi. Hi swona sweswo, ntsena mi va ni yo leha . . . misisi ya n'wina yo koma. Hi swona sweswo, a mi boheki ku swi endla *leswi, sweswo*, kumbe *leswin'wana*. Oho, sweswo a swi twali, i munhu loyi a hundzeriweke."

Kambe Bibeke yi swi vurile! Nakona Xi tshembhisile, "Emasikwini yo hetelela, Xi ta rhumela Moya wa Eliya, nakona wu ta vitana vanhu, vana va Xikwembu, va tlhelela eka Ripfumelo ra xiviri kukotisa leswi a swi ri xiswona eku sunguleni, ka Rito." Rito rero ri tiyisisiwile, kuva N'wana wa munhu emasikwini ya makumu, kukotisa leswi a swi ri xiswona eSodoma; tolo, namuntlha, ni hilaha ku nga heriki. Xi tshembhisile ku swi endla. I xitshembhiso xa Xikwembu. HI LESWI HOSI YI SWI VULAKA.

¹⁵⁶ Xiyisisani, va endlile nchumu lowu fanaka, tani hilaha Muxe a endleke hakona, kukondza Xikwembu xi karhala hi swona.

Tsundzukani sweswi, hi LESWI HOSI YI SWI VULAKA, swi ta humelela eka siku leri. Sweswi, lavisisani emisaveni hinkwayo; tekani mintoloveloo hinkwayo, tekani swivongo hinkwaswo, tekani munhu un'wana na un'wana, tekani kereke yin'wana na yin'wana! Ndza mi boha, hi Vito ra Kreste, ku endla leswi, n'wina vachumayeri. Ndzi mi boha ku hlava maphepha hungu kumbe ku tekela enhlokweni kun'wana na kun'wana laha mi lavaka kuya kona, nakona mi vona loko swi ngari kona emisaveni sweswi. Wa vona?

Kutani, Matewu 24:24 kunene yi lulamile. "Vamavunwa, lava va totiweke va ta humelela emasikwini ya makumu, kutani va tava vaprofeta va mavunwa, nakona va ta hambukisa lavo tala." Swi voneni eka swifananiso sweswi, tani hiloko swi ri ekuteni sweswi, wa vona, "Va ta hambukisa lavo tala." "Vaprofeta," vunyingi; "Vakreste," vatotiwa, vunyingi; votala lava hambaneke, Mamethodist, ma swi tiva, na Mabaptist, na Mapentekostal, na van'wana. Wa vona?

Kambe ku na Kreste wa xiviri, Moya, nakona sweswo i Rito leri endlweke nyama tani hilaha Xi tshembhiseke ku swi endla.

Sweswi hi taya nyana emahlweni swintsongo, eka Matsalwa yan'wana yo engetela.

¹⁵⁷ Ku kondza, Xikwembu xi karhala hi swona, kutani swiva swi herile. Vuphukuphuku bya vona byi paluxiwile.

¹⁵⁸ Xiyisisani. Tsundzukani, xikhamba xi languteka tani hi ndoho ya koroni. Wa vona? Sweswi, a mi nga ta vula, le ndzhaku eka nguva ya Lutheran, “xinsinya a xi ri koroni,” hambi leswi xi nga na Vutomi eka xona. Xinsinya xi kahle, Vutomi lebyi nga exinsinyeni a byi ri kahle, kambe, tsundzukani, Vutomi byi hundzerile emahlweni; byi hundzile kusuka eka Elixa kuya eka Eliya. Vutomi byi tshamela ku hundzela emahlweni. Kambe, tsundzukani, byi le ka xiyimo xin’wana. Byi ngaka byi nga tshami eka xiyimo xexo. Hi ngaka hi nga dyi nyama yo bola ya nguva yin’wana. Hi ngaka hi nga dyi nyama yo bola ya Xipentekosta, Methodist, kumbe Baptist. Wa vona, swi hundzukile nyama yo bola. Hi na Swakudya swo tenga, Rito ra awara leyi, kuya emahlweni.

¹⁵⁹ Tsundzukani, xikhamba xi fana swinene na ndoho ya koroni. Mi ngaka. . . A xi nga langutekisi swona etlukeni, a xi nga langutekisi swona exichochweni, kambe kunene a xi ri tano eka xikhamba. A xi nga languteki tani hi le. . . Yesu Krete wa ha fana na tolo, eka Luther; a swi nga languteki tani hi le ka Wesley; kambe kunene swi tano eka Pentekosta, swi “hambukisa na vona Vahlawuriwa loko swi nga koteka.” Wa vona? Hi teto tinguva ta n’wina.

¹⁶⁰ Kambe tsundzukani, leswaku kereke ya Pentekosta, emasikwini ya makumu, a kuri Laodekiya; nakona Krete u humeseriwe ehandle, Kenele, Koroni, hi Yoxe. Loko A ringeta. . . Tsundzukani, loko A ringeta ku tivonakarisa hi Yexe ekerekeni, U humeseriwe ehandle. A ya hari kereke, yi koxa kuva; leyi totiweke.

Kambe *hi leri* Rito lahawani, Krete hi Yexe, loyi a nga Rito leri totiweke leri nga ta ta eka Miri wa Yena hinkwawo, Mutekiwa. Mutotiwa, wa mati yan’we lawa ya cheleteke koroni, tani hilaha hi vulavuleke ha wona, ya tlhela ya cheleta mfava, lava va totiweke. Ntsena lava Hlawuriweke, kumbe lava hlawuleriweke emahlweni, va ta kota ku vona ku hambana exikarhi ka vona. Sweswi, Vaefesa 5:1 yi mi byela tano, na mayelana na hilaha a swi ri xiswona.

¹⁶¹ Hi lava va totiweke. Un’wana na un’wana u ri, “Ku kwetsima a kuve ka Xikwembu! Hi na ntshuxeko lahawani. Haleluya! Hi. . . Oho, haleluya! Hi vulavula hi tindzimi, ni ku tlulatlula. Hi na ntshuxeko wa vavasati; n’wina vanhu mi ringeta kuva veka ehansi ka tinxaka ta swilo leswi hinkwaswo.” Wa vona? Yanani emahlweni. Ku hava nchumu lowu mi nga wu endlaka. Mi ri, “Hi swona, hi vulavula hi tindzimi. Ha huwelela. Hi cina hi ri eMoyeni. Hi chumayela Rito.” I ntiyiso. A ku na xo xi vula ku lwisana na swona. Swi tano hi vavanuna lava nga eBibeleni.

Yesu u teri, “Swi ta hambukisa na vona Vahlawuriwa loko swi nga koteka, vona Vahlawuriwa.”

¹⁶² Xiyisisani sweswi, xikhamba...Kusuka eka Ndoho ya xiviri, Ndoho leyi ngheneke ehansi, a Yi nga ri vandla. A yi ri Ndoho yin'we, eka Yona. Kambe loko seni yi mirile, a yi nga hari Ndoho; a yi ri vandla, wa vona, matluka, mphoho.

Kutani Yi yile eka xiyimo xin'wana, lexi a xi ri xichocho. Hambisi ri tano a yi nga ri hi le ku sunguleni. A yi ri vandla.

Yi yile eka xikhamba, matluka yo tala, Pentekosta, seni a yi vumbekile. Yi languteni. Yi le ku tekeni ka xivumbeko nkarhi hinkwawo, yi lava kuva leyi fanaka, yi languteka tani hi Ndoho ya koroni loko u vona kamba leriya rintsongo lahaya.

Kambe eku heteleleni Yi vonakarisiwile, nakona a kuna vandla. A ka hari na swirhwali swin'wana. Vandla kova xirhwali ntsena. Ku hava swirhwali swin'wana; xinsinya xi fanele ku fa, xikhamba xi fanele ku fa, leswin'wana hinkwaswo swi fanele ku fa, kambe koroni yi hanya kuya emahlweni. Walowo i miri wa ku pfula, wu rhelela ehansi ni ku swi pfula. "Vasali va le ndzhaku va tava lavo rhanga, kutani lavo rhanga va tava vasali va le ndzhaku." Wa vona, wu va pfula eku pfuleni ka vafi. Mi le ku swi landzeleleni leswi xana? [Nhlengletano yi ku, "Amen."—Muhleri.] Hi swona. Xiyisisani, ndoho yi. . .

¹⁶³ Xikhamba xi languteka tani hi ndoho. Nakona wanuna loyi a rimaka purasi ra koroni, kumbe nchumu wun'wana, a nga langutisa kutani a ku, "A ku dzunisiwi Xikwembu, ndzi na swirimiwa swa koroni," loko a ngari na vala na rin'we ra koroni. Hmm? Xi languteka ntsena tani hi koroni, kambe i xikhamba.

¹⁶⁴ Sweswi, vanghana, tlhelelani endzhaku na mina. Xana mpfuxelelo wo sungula wu huma kwihi, endzhaku (ka rifu) ka masiku lawa ndoho ya koroni a yi fanele ku wela ehansi, Miri, Mutekiwa wa Krete? Krete u kondleterile Mutekiwa wa Yena, hi swona sweswo, Kereke ya Yena? A nga kalanga a Yi kondletela; U lo veka vaapostola, na vaprofeta, na van'wana, eKerekeni, kuva Yi tshama yi basile. Kambe eNicaea, Rhoma, endzhaku ka madzana manharhu na ntsevu wa malembe, va yi kondleterile ni ku yi endla vandla. A hi swona sweswo xana? Kutani yi file. Xin'wana na xin'wana lexi a xi nga pfumelelani na kereke yaleyo a xi dlayiwa. Nakona yi tshamisile xisweswo, madzana ya malembe, ethyakeni.

Kambe, endzhaku ka nkarhi, yi tile hi Luther. Ku hlomukile swihluke leswintsongo swo sungula swa mphoho. Xa vumbirhi, swi hlukerile ehandle kusuka lahaya. Va yile emahlweni, va vile na Zwingli na van'wana, na mavandla lawa yan'wana na swin'wana. Kutani, endzhaku nyana, ku tile Maanglican.

Kutani xana ku humelerile yini? Hiloko ku ta Wesley na mpfuxelelo wuntshwa, wu nga xichocho, lexi langutekaka swinene tani hi Koroni. Kutani xana ku humelerile yini? Xi tikondleterile, kutani xi oma ni ku fa.

Vutomi byi yile exikhambeni, kutani xikhamba xi humelerile kahle tani hi Koroni. Kambe, eku heteleleni, vuphukuphuku bya xona byi vonakarisiwile eka nhungu kumbe khume ra malembe yo hetelela, ngopfu-ngopfu eka malembe manharhu yo hetelela. Xana xi endla yini sweswi? Xi kokela ekule na Koroni.

¹⁶⁵ Sweswi hikokwalaho ka yini ku nga vanga na vandla leri sunguleke eka makume mbirhi wa malembe yo hetelela ya mpfuxelelo lowukulu; i vaprofeta lava va totiweke, vadyondzisi lava va totiweke, na swin'wana, kambe hikokwalaho ka yini ri ngari kona? Ku hava nchumu emahlweni ka Ndoho. Wa vona, Yi vuyile, yi ngari na vandla. Oho, mina, wo fa mahlo a nga swi vona sweswo. Yi ngaka yi nga tikondleteli; Yi tiyile ku lwisana na swona. I ndoho ya Koroni, hi Yoxe. N'wana wa munhu u ta vonakala. Ndoho ya Koroni yi ta tlhelela eka Vuyona nakambe, N'wana wa munhu emasikwini ya makumu.

“Kutani ku ta ta bya vunwa, vuencyeti bya Yona, emasikwini ya makumu, lebyi nga ta hambukisa Vahlawuriwa loko swi nga koteka.” Langutisani swikhamba swa vona swa xivandla swi kokela ekule sweswi.

¹⁶⁶ Swi pfumelela ntsena kuva Koroni yi tiveka, eka Vahlawuriwa, lava nga xiphemu xa Yona. Xiyisisani hilaha leswi swi tisiweke kusaseka ha kona lahawani sweswi. Ntsena. . . Xiyisisani, lava va totiweke va ta swikota; va ntiyiso, Vahlawuriwa, lava hlawuleriweke emahlweni, Vaefesa 5:1, kumbe 1:5, swa antswa, va ta vekiwa, va hlawuriwa. Hi vona vari voxela lava swi nga taka swi nga va hambukisi.

Xiyisisani, vaprofeta lava totiweke va tava va vunwa, nakona le xikarhi ka swona ku tava na vatotiwa va ntiyiso. Xana mi ta swi vurisa ku yini? Hi Rito. Tani hilaha, hi nga na swona endzhutini. Ma swi vona xana? Mi nge, “Amen.” [Nhlengeletano yi ku, “Amen.”—Muhleri.] Wa vona?

¹⁶⁷ Xiyisisani, lava va totiweke, i Rito ntsena ri nga tava hambanyisa, ku ngari masingita. Oho, ee. Va ta endla masingita lawa ya fanaka, kambe Rito hi leri va hambanyisaka. Kunene. Hinkwavo va profetile. Hinkwavo va endlile *leswi*, *sweswo*, na *leswin'wana*, kunene, ntsena ku fana. Yesu u teri va ta endla nchumu lowu fanaka. Kambe Rito hi leri va hambanyiseke, xiyisisani, ku ngari masingita.

¹⁶⁸ Xana mi kale mi swi lemuka? Yesu u vurile lahawani, eka Matewu 24. A nga kalanga a ku, “Ku ta humelela Vayesu va mavunwa emasikwini ya makumu.” Oho, ee, a va nga ta swi yimela sweswo. Ee. Mi kuma Mupentekosta loyi a nga Mupentekosta wa xiviri, a vula, hi yexe, hi yena “Yesu”? Wa vona? Mi kuma Mumethodist wa vunwa, kumbe Mubaptist, kumbe un'wana wo fana na valavo, kumbe rin'wana ra mavandla, ri ku, “Hi hina Yesu”? Va tiva ku antswa kutlula sweswo. A va nga swi endli sweswo. Kambe Bibebe yi vurile

leswaku va tava “Vakreste va mavunwa,” ku ngari Vayesu, kambe, “Vakreste va mavunwa.” A va nga ta swi lemuka, mi ku, “Hi mina Yesu.” Oho, ee.

¹⁶⁹ Kambe hi vona “Vakreste va mavunwa,” nakona a va switivi, hikuva va hambana na Rito. Nakona Xikwembu xi tiyisisa leswi fanaka. Sweswi, ndzi tisa leswi ntsena eka nkombiso sweswi, hikuva mi vonile leswi fanaka swi endlwiwa hi vanhu lava leswi endlweke hi xiviri. Nakona Yesu u vurile tano.

¹⁷⁰ Sweswi, tani hilaha ndzi vuleke, sweswi eka n’wina vanhu le handle, emisaveni ya riqingho lahaya, a ndzi—a ndzi mi avanyisi, kambe leyi i kereke ya mina na—na ntlawa wa mina lowu Moya lowo Kwetsima wu ndzi vekeke ehenhla ka wona, kutani ndzi fanele ku va byela Ntiyiso. Awara leyi yi le ku heleni.

¹⁷¹ Sweswi, a va nga ta swi yimela sweswo, kambe, “Vakreste va mavunwa,” va mavunwa, lava va totiweke, hakanyingi na masingita hinkwawo na letere rin’wana na rin’wana ra Rito. “Va wu pfumela nkhuvo lowu Moya lowo Kwetsima?” Ina. “Va pfumela eka *leswi* hinkwaswo?” Ina. “Va pfumela eka ku vulavula hi tindzimi?” Ina. “Va pfumela leswaku masingita na mahlori ya landzela, masingita ya tava landzela?” Ina. Sweswo a hi Mamethodist, sweswo a hi Mabaptist. Ee, ee. Sweswo i Mapentekosta. Wa vona, lawa i masiku ya makumu.

Sweswi, nguva yo sungula ya kereke a yi nga ta swi lemuka sweswo. Nguva ya kereke ya Methodist a yi kalanga yi swi lemuka; nguva ya kereke ya Baptist, a va kalanga va swi lemuka; nguva ya kereke ya Presbyterian, a va kalanga va swi lemuka. Kambe, ya Pentekosta, yi le kusuhi swinene tani hi Nchumu wa xiviri! Kwalaho hilaha, Koroni . . . xikhamba hakanyingi xi vaka tani hi Koroni. A va nga ta swi lemuka. Wa vona? A va nga ta swi kota. Kambe i masiku ya makumu, siku leri. Ina, nkulukumba.

¹⁷² Xiyisisani, tani hilaha a swi ri xiswona eku sunguleni, swi tava tano eku heteleleni. Tani hilaha Evha a tolokeke Rito rin’we hi ku hoxisa, Sathana u swi endlile eka Evha, nakona u swi pfumerile. Wansati, ku ngari wanuna; kereke, ku ngari Yena. Wa vona? Kereke hi yona leyi kumeke rito ra vunwa. Wa vona? Ku ngari Adam; Evha. Ku ngari Krete; kereke, mutekiwa, mutotiwa, u fanele kuva tano, u tivitana Mutekiwa, wa vona, u kumile rito ra vunwa.

A mi swi voni sweswo xana? Hikokwalaho ka yini, swi boheka kun’we tani hi ntambhu ya ntanghu, tani hi tinxiyi etihlweni ra wena. Hikokwalaho ka yini, swin’wana na swin’wana leswi u nga ta hundzulukela eka swona, Biblele, Yi swi boha kahle kun’we. Evha, ku ngari Adam; Evha u swi pfumerile, ku ngari Adam. Mutekiwa namuntlha, u vitaniwa tano, u swi pfumerile; ku ngari Krete. Mutekiwa u na tinxaka hinkwato, loyi a vitaniwaka mutekiwa; masingita lawa ya fanaka, swihlamariso leswi fanaka, hinkwaswo leswi fanaka;

kambe ku ngari Swa ntiyiso. “Ku hambukisa Vahlawuriwa loko swi koteka.”

Sweswi hi ku hatlisa, loko hi nga kota ku hetisa leswi hi khume ntlhanu wa timinetse, hi tava enkarhini. Xiyisisani hi vukheta sweswi, leswaku mi nga—mi ngavi na ku ka mi nga twisisi, eka n’wina.

¹⁷³ Sweswi, ee, a va nga ta swi yimela ku vuriwa “Yesu wa vunwa.” A va nga tava tano, ku yimela ku vitana, “Yesu.” Kunene swi nge endleki. Sweswo swi le rivaleni ngopfu. Un’wana na un’wana a ta switiva sweswo. Un’wana na un’wana a ta switiva leswaku a va ngari Yesu. A ndzi na mhaka ni loko va vile na mafurha eminhlaneni ya vona, na ngati emavokweni ya vona nale henhla nale hansi ka matihlo ya vona, va ha switiva i . . . Un’wana na un’wana loyi a nga na ku twisisa ka kahle, a switiva leswaku a ku ngari Yesu. Wa vona? A va nga ta swi yimela sweswo. Kambe va tivitana “vatotiwa.” Nakona va endle masingita na swihlamariso, “hakanyingi ku hambukisa Vahlawuriwa.” “Kambe Vakreste va mavunwa, lava va totiweke, va ta pfuka, kutani va ta hambukisa Vahlawuriwa loko swi nga koteka.”

¹⁷⁴ Sweswi langutisani hi vukheta. Mi nga hupi xitatimendhe lexi, hikuva xi ringanele ku yingisiwa.

U le ku vekeleni ka thepi yin’wana eka makrofoni leyi lahawani, ku swi sivela ku hahela ehenhla. A ndzi ri eku julukeni; wu thonela eka thepi, ma swi vona.

¹⁷⁵ Kutani swi tava tani hi Yona, Bibe, yi teri swi tava tano. Wa vona?

¹⁷⁶ Xiyisisani, ku ngari Vayesu va mavunwa. “Vakreste va mavunwa!” Va pfumela leswaku va totiwile, kambe va switiva leswaku a hi vona Yesu. Wa vona, sweswo swi le rivaleni ngopfu. Loko munhu a yile ni ku vula leswaku, namuntlha, “Langutani swivati emavokweni ya mina. Langutani mombo wa mina. Hi mina Yesu.” Hi swona, sweswi, ha swi tiva leswaku sweswo swi hoxekile. Nakona, tsundzukani, Yesu a nga kalanga a vula leswaku vanhu valavo va ta humelela. U teri ku ta humelela “Vakreste va mavunwa.” “Vakreste,” eka vunyingi, tidinominexini, na swin’wana, *lava va totiweke*; va totiwile hi moya wa dinominexini, nakona ku ngari Rito. Ma swi landzelela? Ku ngari Yesu wa vunwa. “Vakreste va mavunwa,” va mavunwa, lava va totiweke. Wa vona? Oho, hilaha swi nga erivaleni ha kona! Hilaha hi . . . Kunene mi nge swi hupi!

¹⁷⁷ Sweswi, tsundzukani, ndzi tshamele ro mi byela leswaku ku na mintlawu yi nharhu ya vanhu. Ku na tinxaka tinharhu ta vanhu: Kam, Shem, na Yafet, tinxaka tinharhu. Mintlawu yi nharhu, nakona ndzi teri, leswaku i mupfumeri, mupfumeri wo tiendlisa, na loyi a nga pfumeriki. Swi tano minkarhi hinkwayo, swi tava tano minkarhi hinkwayo. Wa vona? A kuri na Muxe,

mupfumeri; a kuri na Yanne na Yambre; lava nga pfumeriki. Wa vona? A kuri na Balaam; Muxe. . . Minkarhi hinkwayo mintlawwa yaleyo yi nharhu ya vanhu, mintlawwa yi nharhu; mupfumeri, mupfumeri wo tiendlisa, na loyi a nga pfumeriki.

¹⁷⁸ Sweswi tsundzukani, loyi a nga pfumeriki, kereke ya dinominexini, a yi pfumeli eka rin'wana na rin'wana ra masingita na swintsongo; ku titimela, ximfumo, ku omelela, kereke emisaveni, dinominexini. Kambe mupfumeri wo tiendlisa i xikhamba xexo. Yaloye i mupfumeri wo tiendlisa. Kutani ku na mupfumeri wa xiviri loyi a nga wa ntiyiso. Sweswi, va languteni loko va ri karhi va famba sweswi, ntsena xinkadyana nyana.

¹⁷⁹ Nakona xiyisisani hilaha lava nga pfumeriki va titssembhaka hakona, kumbe vappfumeri lavo tiendlisa na lava nga pfumeriki. Mina! Va titssembha, vonani, hambu a ri Sathana u yimile eVukoneni bya Rito ra ntiyiso, ni ku vula leswaku, "Swi tsariwile!" A hi swona sweswo xana?

Hikokwalaho ka yini Sathana a endlile sweswo? Hikuva a nga ri tivi Rito ra sweswo. . . A ri tiva Rito ra awara yaleyo, kambe u vile na ku kanakana hi Wanuna lontsongo wo titsongahata kuva a ngava Rito. "Loko U ri N'wana wa Xikwembu. Ndza switiva leswaku N'wana wa Xikwembu u le kuteni, hikuva Yi vurile leswaku U ta swi endla sweswo. Nakona ku tsariwile, 'Xi ta veka Tintsumi ta Xona ehenhla ka Wena.' Wa vona? Swi khorwisi eka mina! Endla mahlori! U nge ndzi ku vona U ma endla." Wa vona? Wa vona?

Wa vona, loyi a nga pfumeriki, mupfumeri wo tiendlisa, muencyeti. Langutisani Yudas exikarhi ka vona, nkarhi wun'we, mupfumeri wo tiendlisa! Wa vona? Xiyisisani, nakona a kuri na Rito ra ntiyiso.

¹⁸⁰ Hilaha va titssembhaka hakona! "Sweswi, mi nga tshuki mi yingiserile swilo swo ka swi nga twali. A ku na nchumu eka Swona. Mi nga yi lahaya. Kova ntsena ntlawa wa huwa. A ku na nchumu eka Sweswo. Sweswo kova garingeto ntsena. Sweswo swi le miehleketweni ya n'wina." Wa vona, ma swi vona leswi ndzi swi vulaka? Yima kahle eVukoneni bya Rito kutani u swi vula.

¹⁸¹ Sathana u nghenile. Tani hilaha Bibeke yi swi vuleke lahawani eka Yuda, "Hambu yi ri Ntsumi leyikulu, loko yi kanetana na Sathana, yi teri, 'Hosi a yi ku tshinyi.'" Ku lwisana na Rito hi Roxe!

Kutani hi loyi antikreste, mutotiwa, u yimile lahawani ku lwisana na Rito ra siku ra xiviri, Yesu Krete, nakona u teri, "Ku tsariwile."

¹⁸² Langutisani eka masiku yo hetelela. "Swi tava ekusuhi swinene lero swi ta hambukisa Vahlawuriwa loko swi nga koteka." Oho, mina! Xivangelo xova swi nga ta endleka kuva Vahlawuriwa va hambukisiwa, ma swi tiva leswaku

hikokwalaho ka yini? Hikokwalaho kova va ri Rito. Wa vona? Ntsena tani hi Vutomi lebyi nga erimintswini, ndzi vurile khale nyana, Byi ngaka byi nga titsan'wi byona hi Byoxe. Wa vona, hi Byona Rito nakona eka nguva ya Rito. Hi swona sweswo.

¹⁸³ Ntsena tani hi Yeremiya, a switiva. Swi ngari na mhaka leswaku Hananiya u teri yini, a switiva leswaku a ri kwihi. Sweswo swi fana na leswi endlweke hi Muxe, na—na hinkwavo ka vona. Hi leswaku, a swi tiva, swi ngari na mhaka leswaku muprofeta wa vunwa a ku yini, a kuri na Rito ra Xikwembu. A ri tsariwile.

Xexo hi xona xivangelo xova Mikiya a kotile ku vula a ku, “Hi swona, wena yima ntsena u vona.”

Akab u teri, “Ndzi pfumela vaprofeta va mina. Vandla ra mina ri kahle. Loko ndzi vuya hi ku rhula . . . Vekani nakulorhi yaloye le ndzhaku ekhotsweni. Ndzi ta vonana na yena! Mi n'wi phamela vuswa bya khombo. N'wi tlheriseleni ehandle, mi ngavi na xinakulobye na yena na swintsongo. Loko ndzi vuya hi ku rhula, hi ta vonana na munhu yaloye.”

¹⁸⁴ Mikiya a ku, “Ku ngaku loko u vuya, Hosi a yi vulavulanga ha mina.” A swi tiva leswaku a ri na LESWI HOSI YI SWI VULAKA, nakona xivono xa yena a xiri na LESWI HOSI YI SWI VULAKA; kungari swa tinguva tin'wana, kambe swa nguva yaleyo. Amen! Haleluya! Nguva!

¹⁸⁵ Ku titshembha, a yima na ku kanetana na Ntsumi leyikulu! Swi vuriwile, leswaku, “Swiphukuphuku swi ta kandziyela hi tintanghu ta vukandziyo bya swipikiri laha Tintsumi ti chavaka ku famba kona.” Hi swona sweswo.

¹⁸⁶ Xivangelo xova Vahlawuriwa, Yesu a teri, va ngaka va nga hambukisiwi, hikokwalaho kova vari Rito rero. Va ngaka va ngavi nchumu wun'wana. Va ngaka va nga twi swin'wana. A va tivi swin'wana. Hi swona sweswo.

Tsundzukani, Muxe a nga tirivalanga eka vuencenyeti bya vona hinkwabyo. U tirivarile? Muxe u teri, “Sweswi, yima nyana, Faro. Wa switiva leswaku i yini? Hosi yi ndzi byerile ku endla leswi, kambe, ku kwetsima a kuve eka Xikwembu, ndza swivona leswaku vafana va wena va nga wu endla nchumu lowu fanaka. Swingaleswi, ndzi ku byela leswi ndzi nga ta swi endla, ndzi ta ku joyina”? Ahaa! Sweswo a swi twali tani hi muprofeta wa Xikwembu. Ee, hakunene! U yimile a tiya tani hilaha a ta yima hakona. A switiva, kunene, Xikwembu xi ta vonana na swona hi ndlela yin'wana, hikuva Xi tshembhisile ku swi endla. “Ndzi tava na wena. Ndzi ngaka ndzi nga ku tshiki.”

¹⁸⁷ A switiva, swingaleswi a nga va joyinanga. Oho, ee. U tshamile kahle na vona. A nga lavi na yin'we ya tidinominexini ta vona. U tshamile kahle na Xikwembu. A nga rivatiwanga hi swilo hinkwaswo leswi a va swi endla. Loko va endlile nchumu wun'we . . . U tisile tinhwala; va tisa tinhwala. U tisile ngati;

va tisa ngati. U tisile swilo hinkwaswo; va n'wi encenyetile hi ndlela yin'wana na yin'wana, ku famba na yena. U yimile a nga ninginiki. A swi tiva leswi a swi ri swona. Xikwembu a xi ri entirhweni.

Ma swi twisisa sweswi xana? [Nhlengeletano yi ku, "Amen."—Muhleri.] Mi teka mbirhi na mbirhi, mi endla mune? ["Amen."] A mi swi lavi ku vavuka hi ku nonohwa. Swingaleswi, ma—ma swi twisisa, wa vona.

¹⁸⁸ Hikokwalaho ka yini? Va ngaka va nga hambukisiwi hi swona. Vapfumeri va xiviri, hi vona Mbewu leyi hlawuleriweke emahlweni leyi faneleke ku yima hi siku rero.

¹⁸⁹ Ntsena, nakambe, Yesu u vurile leswi, "Votala va ta ta hi siku rero, hi Vito ra Mina, kutani va ku, 'Hosi, a ndzi hlongolanga madimona hi Vito ra Wena xana?" Yesu u teri, "Emasikwini ya makumu, loko nkarhi wu tava wu herile na ku pfuka lokukulu ka vafi ku tava ku tile, leswaku votala va ta ta ku ta tshama eMfun'weni." Mfumu wa Xikwembu wu le ndzeni ka n'wina.

Votala, nhova yi ta ta niku tshama ehansi na Koroni, yi ku, "Sweswi, yima nyana, Hosi! Ndzi vulavurile hi tindzimi. Ndzi huwelerile. Ndzi cinile ndzi ri eMoyeni. Ndzi hlongorile madimona. Ndzi vulavurile hi tindzimi. Ndzi swi endlile hinkwaswo swilo leswi."

Xana U ta ku yini? Xiyisisani. "N'wina vaendli va leswo homboloka, A ndzi kalanga ndzi mi tiva."

¹⁹⁰ Xana *ku homboloka* i yini? Vutisa un'wana. I "nchumu lowu u swi tivaka leswaku a wu fanele ku wu endla, nakona u nga wu endlile." Va ri tiva Rito rero. Va Ri twa. Mi le ku yingiseleni ka thepi leyi. Mi le ku yingiseleni ka Hungu leri. Mi vona Hosi Xikwembu xi vula tano; mi Xi vona xi swi tiyisisa, xi swi endla swa ntiyiso. Nakona Leswi mi swi tiva kuva swi ri erivaleni tani hi laha dyambu ri vangamaka ehandle, kambe n'wina lava khomelelaka eka dinominexini ya n'wina, ku khomelela eka swilo sweswo swa vunwa; n'wina vaendli va leswo homboloka!

"Oho, ina, ndzi vile na mapfhumba ya kahle. Ndzi endlile *leswi*. Ndzi endlile *sweswo*."

A ku, "Sukani eka Mina, n'wina vaendli va leswo homboloka, A ndzi kalanga ndzi mi tiva."

¹⁹¹ "Hi swona, Moya lowo Kwetsima wu werile ehenhla ka mina." A ndzi swi kanakani sweswo na swintsongo. "Ndzi vulavurile hi tindzimi. Ndzi yimbelerile ndzi ri eMoyeni. Ndzi endlile. . ." A ndzi swi kanakani sweswo na swintsongo. A kuna xivutiso eka sweswo. Oho, boti, sesi, xana i xiyimo xa muxaka muni!

Lowu i nkarhi wo rhurhumela. Hi le kwihi xana? Rito leri ri ta eVuton'wini sweswi. Xiyisisani.

¹⁹² Ina, U vurile leswaku va ta endla sweswo. Xiyisisani, “N’wina vaendli va leswo hamboloka.” Ndzi na Tsalwa leri tsariweke lahawani. Ntsena a ndzi swi tivi leswaku a ri ri kwihi. Ndzi tekile nkarhi swinene. Ndzi ya eku ri languteni, ntsena xinkadyana, kutani ndzi vona leswaku a kuri yini. Ndzi na—ndzi na Matewu 7:21. A—a ndzi swi tivi ntsena leswaku kwihi. Ndzi, nkarhi wun’wana a ndzi tsali nchumu wun’wana ehansi na swona, hi swona, ndzi—ndzi ri eku chumayeleni kukotisa leswi, ndzi—ndzi rivale laha a ndzi swi kongomisa eka swona eMatsalweni. Matewu 7:21.

A hi hinkwavo lava nge ka mina, Hosi, Hosi, lava nga ta nghena eku fumeni ka matilo; kambe la endlaka ku rhandza ka Tata wa mina la nge matilweni.

Enkarhini wolowo votala va taku eka mina, Hosi, Hosi, xana a hi profetanga . . .

Vaprofeta, lava totiweke! Hi swona sweswo? “A hi ngari vaprofeta xana? A hi nga totiwanga xana, lava totiweke? A ndzi profetanga hi Vito ra Wena xana? Nakona a ndzi hlongolanga madimona hi Vito ra Wena xana?” Xana u nga swi endlisa ku yini sweswo, nakona u ala ku khuvuriwa hi Vito ra Yesu? Wa vona? Oho, mina! Ma swi vona hilaha swi hambukisaka ha kona? Ku ya le henhla eka yinhla yaleyo, kutani swi wela ehansi. Va ya le henhla eRitweni, kutani va wela ehansi. Sweswi vonani leswi. Hi humesela leswi ehandle, ntsena xinkadyana.

Votala va taku eka mina . . . Hosi, Hosi, xana a hi profetanga, hi vile vaprofeta? . . .

Ina, ndzi vulavurile hi sweswo eka Matewu 24:24.

. . . nakona hi vito ra wena . . . ku hlongola madimona? nakona hi vito ra wena hi endlile swotala swihla- . . . mintirho yo tala?

Kutani ndzi ta va byela erivaleni, leswaku a ndzi kalanga ndzi mi tiva: sukani eka mina, n’wina vaendli va leswo hamboloka.

“Loko Ri tava ri vekiwile lahawani mahlweni ka n’wina kutani mi Ri vona, ni ku Ri vona ri famba, mi Ri vona leswaku i Rito; nakona hikwalaho ka vudinominexini bya n’wina, mi khomelerile eka swona. A ndzi kalanga ndzi mi tiva. A ndzi na mhaka ni leswaku i mademona mangani mi ya hlongoleke, i swingani mi swi endleke *leswi* na *sweswo*; A ndzi tivanga nchumu ha n’wina.”

Balaam u teri, “Ndzi profetile kahle, hi Vito ra Wena. Swi humelerile.”

¹⁹³ “Sweswo i ntiyiso, kambe, loko swi ta eka Rito, u Ri arile.”

Oho, boti, wa xi vona xiphemu xo hambukisa? Ku ngari “muprofeta,” kunene; kambe hi Rito, Rito ra ntiyiso, Rito

leri tiyisisiweke leri vonakarisiweke. “N’wina vaendli va leswo homboloka!”

¹⁹⁴ Ringetani, Sathana u ringetile eka tinguva hinkwato ku encenyeta Rito ra ntiyiso. Ha swi tiva sweswo, a hi swona?

¹⁹⁵ Xiyisisani, tanani endzelekanweni ni ku swi tshika. Vonani lahawani, U teri, eka Vaheveru kuavanyisa ka vu6, sweswi, a hi ri eku yi hlayeni ku ngari khale ngopfu. Ndzi mi byerile kuva mi yi langutisa, kutani hi ta yi langutisa eka timinetse nyana leti landzelaka. U teri:

... kambe *mitwa ni mahlwehlwe*... leswi nga ekusuhi
ni ku aleriwa; leswi makumu ya swona ku nga ku hisiwa.
(Ndzelekanano!)

... n’wina lava nantsweke... ku ha kale tilweni,...

“Mi nantswile,” hi marito man’wana, mi Wu vonile! Mi ngaka [Makwerhu Branham a phakatanisa milomo ya yena kun’we—Muhleri.] ntsena Wu nantsweni hi nomo wa n’wina. Kambe mi Wu vonile, nakona mi Wu tivile leswaku i Ntiyiso. Mi Wu tivile leswaku i Ntiyiso. “Ku nantswa ku ha kale Tilweni.”

... ni ku averiwa Moya lowo Kwetsima, tani hilaha
Wu weleke ehenhla ka n’wina,

... mi nantsweke swa rito lerinene ra Xikwembu,...

“Mi nantswile,” mi swi vonile leswaku a Wu ri kahle. “Nakona Moya lowo Kwetsima wu werile ehenhla ka n’wina,” nhova leyi nga ensin’wini.

... kutani mi hundzulukela ekule,...

“Mi tsan’wa Krete yaloyi a mi kwetsimiseke, ni ku mi vitana, ni ku vekela ntoto walowo ehenhla ka n’wina.”

... a ka hari ni gandzelo rin’wana ra vudyoho, eka sweswo.

A swi rivaleleki! “A swi koteki eka vona kuva va nga tlhela va ta eku tiveni ka Ntiyiso.”

Hikuva swi ngaka swi nga endleki leswaku lava nga... averiwa Moya lowo Kwetsima,

Wu werile ehenhla ka nhova, wa vona, “Swi sungurile hi Yesu, kutani, ‘Hosi, ndzi ya kona,’” kambe loko mi ba Rito, mi tlhelela endzhaku. “Mi averiwile Moya lowo Kwetsima, hambu kuri ku nantswa, kumbe ku vona Rito hi Roxe ri vonakarisiwa.” Kutani mi hundzulukela ekule na Rona, “A swi koteki eka vona ku tlhela va Ri vona kumbe ku ta eka Rona.”

Sweswo HI LESWI MATSWALWA YA SWI VULAKA. Sweswi, mi... “Matilo na misava swi ta hundza, kambe Ri ngaka.” Ma swi vona xana? “A swi koteki na swintsongo.” Bibeleyi vurile tano, nakona Moya wu tiyisisa vumbhoni bya swona.

¹⁹⁶ Xiyisisani, mi nge ndzi mi nyika xikombiso xintsongo. Langutisani vanhu lava humeke ehansi ka vuprofeta bya Muxe, va huma eka vandla rero, ni ku huma ehandle ka hinkwaswo, ehansi ka vuprofeta, va vona mintirho leyikulu na swihlamariso, na swilo swo tani hi sweswo, kutani va ta endzelekanweni wo nghena endzeni.

Sweswi, Lee, lahaya ku ta “vito ra wena eBukwini.” Wa vona? U na swona swi lunghisiwile. Kutani n’wina lava nga riki lahawani, na le handle eka—eka swa vuhlanganisi, i Dokodela Lee Vayle loyi a tshameke lahawani. U le ku lulamiseni ka ririmi ra buku leyi ya Tinguva Ta Nkombo Ta Kereke. Nakona xiphiso xi humelerile, kumbe xivutiso, mayelana na “vito ra wena leri susiweke eBukwini ya Vutomi ya Xinyimpfana.” Wa vona, swi pfilunganyile tiministara to tala. Kambe yimani kukondza mi kuma buku, mi ta swi twisisa loko ntsena mi ri na Layiti endzeni ka n’wina. Wa vona?

¹⁹⁷ Xiyisisani, sweswi, mi ta hundzuluxa tinhloko ta n’wina nakona mi ngaka mi nga Yi languti loko mi nga lavi ku Yi vona. Tani hilaha manana wa mina u tshamela ro swivula, “U ngaka u nga kumi ngati eka thenipi, hikuva ku hava ngati eka yona.”

¹⁹⁸ Xiyisisani, Layiti yi fanele ku ta; a ri le munyamani. Layiti yi ta emunyamani, kutani munyama a wu Ri amukeli. Sweswi xiyisisani lava totiweke eka siku leri.

Tani hilaha Muxe a humeseke vana va Israel; nakona va yingiserile na ku pfilunganyiwa hi rixaka lerikulu kwalahaya. Sweswi, Israel a ri ri exikarhi ka tidinominexini. A ri ngari na tiko, a ri ngari na kaya. A ri ya ekaya.

A hi na kereke. A hi...Hi—hi ya eKerekeni, Kereke ya Mativula, Kereke leyi nga eVukwetsimelweni; ku ngari kereke leyi nga emisaveni, hi munhu. Kereke leyi nga eVukwetsimelweni, lava vitaniweke, va hlawuleriwe emahlweni eka Vutomi lebyi nga Heriki, wa vona, va ya eKaya ka vona.

Kutani loko va fika endhawini yo tsemakanyela kona, va kakananile Rito, na ku tlhelela endzhaku. Endzhaku ka loko Yoshuwa na Kaleb na vona va tava va yile na ku vuya na nyandza ya tidiriva, kuva khorwisa leswaku tiko a ri ri kona, xitshembhiso xa Rito ra Xikwembu, “I tiko ra kahle, ntswamba na vulombe.” Nakona va vuyile na swona, hi tlhelo leri, ku tava khorwisa. Kutani va swi ringile, nakona va ku, “Oho, oho, hi ngaka hi nga swi endli, hambi swi ri tano.” Xana ku humelerile yini? Va lovisiwile emananga. Va tshamile kwalahaya na ku tikondletela, na ku fa, un’wana na un’wana wa vona.

Kambe lava va yeke kona ni ku vuyisela endzhaku, Yoshuwa na Kaleb; Muxe u tlhandlukisiwile. Xifananiso xa ku yimeriwa ka Kereke; na ku pfuxiwa ka Testamente ya Khale, Testamente Leyitshwa; na Miri lowu tlhandlukisiweke. Ma swi vona leswi nharhu lahaya? Mi fanele ku hlayisa leswi nharhu entileni, wa

vona, swingaleswi, eka mupfumeri na loyi a nga pfumeriki. Wa vona?

¹⁹⁹ Xiyisisani hilaha a swi ri “hi ku hetiseka.” Tsundzukani, Xikwembu a xi kalanga xi rivalela xidyoho xexo. Xana sweswi va ta nghenisa ku yini? Loko swi ri mitwa, xo sungula, swi mitwa ekuheteleleni. Ntsena lava hlawuleriweke emahlweni va ta Swi vona.

²⁰⁰ Xiyisisani swinene sweswi. Ntsena tani hi le masakwini ya Mukwetsimi Martin, ku nga se fika Tinguva ta Munyama; wanuna lontsongo wa vukhongeri. I vangani lava nga tshama va hlaya leswi tsariweke hi Mukwetsimi Martin? Votala mi hlayile. Hi rhelerile ku ya kuma leswi tsariweke hi Mukwetsimi Martin; muprista a ku, “Kambe a nga xiximiwanga ximfumo.” Kunene, a ngari tano; ku ngari hi vona, kambe hi Xikwembu. Moya lowo Kwetsima wu hi byerile kuva hi n’wi veka lahaya eka nguva liya ya vunharhu ya kereke. Wa vona?

²⁰¹ Langutisani leswaku a ri wanuna lontsongo wa vukhongeri njhani; a vitaniwile, ni ku hlawuleriwa emahlweni. Vatswari va yena, vahedeni. Papa wa yena, a ri socha. A fanele ku landzelela ntila wa yena, kuva socha. Kutani, loko a swi endlile, na ku tshamela ro pfumela leswaku a kuri na Xikwemu kun’wana; wanuna wa khwati, nakona a kota ku vona Xikwembu. Siku rin’wana u hundzile hi le dorobeni, nakona a kuri na mutsendzeleki wo dyuhala loyi a pavalarile kwalahaya, a ri ekufeni, a ri eku kombeleni ka un’wana . . . A twa xirhami vusiku byebyo. “Oho,” a ku, “ndzi nyike xin’wana xo tifunengeta; ndzi ta fa vusiku lebyi.”

²⁰² Ku hava loyi a ta swi endla. Kutani Martin u yimerile eka tlhelo lerin’wana na ku n’wi langutisa nkarhi nyana. Ku hava loyi a ta swi endla. A ri na bajji rin’we ntsena. A ta oma, yena hi yexe, a ri entirhweni, loko a—a n’wi nyikile bajji rero. Swingaleswi u anakanyile, “Ha vumbirhi bya hina hi na nkateko wo hanya loko ndzi nga avelana na yena.” Swingaleswi u tekile bajji ra yena n’winyi, na kuri avanyisa hi le xikarhi hi banga ra yena, kutani a phutsela mutsendzeleki lowo dyuhala hi rona. U tiphutserile hi bajji ra yena.

Un’wana na un’wana a ku, “Vonani leswaku i socha ro languteka ku hlekisa njhani. Vonani leswaku i socha ro languteka ku hlekisa njhani, hafu ya bajji ri n’wi phutserile!”

²⁰³ Vusiku lebyi landzelaka, loko a ngari entirhweni na ku pavalala emubedweni wa yena, u pfuxiwile. U langutisile, a yimile kwalahaya ekamareni, kutani hi lahaya a ku yimile Yesu Kreste a phutseriwile hi xiphemu xa nguvu leyi ya khale lexi a n’wi phutserile hi xona. U swi tivile kwalahaya, “Leswi u swi endlaka eka vatsongwana va Mina, u swi endlile na le ka Mina, eka vatotiwa va Mina,” a pavalarile lahaya.

A ri nandza wa kahle wa Xikwembu. Kereke yi endlile mafenya hi yena, yi n'wi xanisa, yi n'wi hlongola, na hinkwaswo, kambe a ri muprofeta wa Xikwembu. Leswi a swi vuleke swi humelerile. Ku na votala lava n'wi pfumeleke eka nguva yaleyo, na vona.

²⁰⁴ Ndzi lava ku mi kombeta hilaha javulosi a hambukisa hakona. Siku rin'wana a tshamile endhawini ya yena yo hlayela kona. Hiloko ku ta ntsumi ya matimba, na xidlodlo enhlokweni ya yona, tintanghu ta nsuku, na ntambhu ku rhendzeleka na tinguvu ta yena ta nsuku, kutani yi ku, "Martin, wa ndzi tiva xana?" Yi ku, "Hi mina Hosi ni Muponisi wa wena. Hi mina Loyi a ku poniseke. Ndzi gandzeli, Martin." Kambe muprofeta yaloye, hi ku tiva leswaku ku na swintsongo leswi nga tolovelekangiki lahaya, u yile emahlweni ni ku yi langutisa. Yi ku, "Martin, hi mina Muponisi wa wena, Yesu Kreste. Ndzi gandzeli! A wu ndzi tiva xana, Martin?"

²⁰⁵ Martin u yile emahlweni ni ku yi langutisa, Matsalwa ya ri karhi ya tsutsuma emiehleketweni ya yena. A ku, "Sathana, fambela ekule na mina." A ku, "U na harhi enhlokweni ya wena. Nakona Rito ra Xikwembu ri vula leswaku 'vakwetsimi va Yena va ta N'wi ambexa' harhi emakumu ka nguva."

Xana sweswo a swi nga tava swi vile xikwa ya Xipentekosta? Languta Rito rero, boti. Hilaha ri hakeleka kona.

²⁰⁶ Siku rin'wana, nakambe, endhawini ya timonko, a vari na mukwetsimi wo dyuhala kwalahaya, ntlawa wa timonko letintsongo. A kuri na un'wana wa vona wa muxaka wa swipfukela. Vonani leswi, hi lexi xa kahle—xa kahle xifaniso namuntlha. A lava kuva nchumu wo karhi ehenla ka vona hinkwavo. A lava ku tikombisa hi yexe, kuva na matimba, nchumu wun'wana lowukulu, nchumu wun'wana wo antswa, wa xiyimo xa le henhla, ma swi tiva, na kuva nchumu wun'wana lowukulu. A fanele kuva wa xiyimo xa le henhla. A tshamela ku lava leswaku vamaquerhu lavan'wana va nga. . . Ma swi tiva, a fanele kuva loyi a hambaneke. Wa vona? Yena, a swi na mhaka leswaku a kuri yini, a tikukumuxa swinene. A ri yena ntsena ribye ro hlawuleka ebichini. A kuri hava loyi a ta n'wi khumbha. Sweswi langutani leswi humeleleke. A fanele kuva na nchumu wun'wana lowukulu. A fanele ku tixaxameta na—na mintlawa leyikulu. Ma ndzi landzelela xana? Wa vona? Swingaleswi, u teri, u profetile. A ku, "Hosi yi ndzi endlile muprofeta, na mina. Ndzi muprofeta."

Sweswi, a kuri na muprofeta un'we loyi a tiveka etikweni, nakona yaloye a kuri Mukwetsimi Martin; u tswariwile a ri muprofeta.

²⁰⁷ Kambe n'wana loyi u teri, nakulorhi lontsongo u teri, monko leyintsongo ya kwalomu ka makume mbirhi-ntlhanu wa malembe hi vukhale, u teri, "Hosi yi ndzi endlile muprofeta,

nakona ndzi ya eku swi khorwiseni eka n’wina.” A ku, “Vusiku lebyi Hosi yi ya eku ndzi nyikeni ka leyikulu, nguvu ya kahle, yi ndzi tlhandleka yona, nguvu yo basa, ni ku tshama exikarhi ka n’wina. Kutani hinkwenu ka n’wina mi ta ta eka mina, wa vona, nakona mi ta teka swileriso kusuka eka mina.”

²⁰⁸ Sweswi ringanisani sweswo namuntlha, wa vona, “Ndzi tava nhloko ya vandla. Ndzi ta mi hlayisa, n’wina timonko hinkwenu.”

Nakona hakunene, “Vusiku byebyo, malayiti ya tile endzeni ka muako,” leswi tsariweke hi Mukwetsimi Martin swi vula tano. Swi hlayeni. Nakona i swa xiviri. I matimu. Kutani malayiti ya tile, nakona hinkwavo ka vona va hlalerile, kutani hiloko ku ta. . . A ambarile nguvu yo basa, a yimile exikarhi ka vona. A ku, “Ma swi vona leswi ndzi mi byeleke swona?” Kambe sweswo swi hambanile na Rito.

²⁰⁹ Kutani loko a yile ni ku ya kuma murhangeri wa kahle wa kholichi, u yile ehenhla na le hansi swintsongo, a ku, “Jaha, sweswo a swi twali swiri kahle.” A ku, “Ku na ndlela yin’we ntsena.” Hi leyiwani! “Ku na ndlela yin’we ntsena leyi hi nga swi tivaka ha yona. Swi tikomba swi ri ehenhla ka ntumbuluko.” Jaha, Pentekosta a yi tava yi bvanyangetile sweswo, rimintsu, xinyuperisi, risiha, xinjovo, na leswin’wana hinkwaswo! U teri, “Mahlori ya nga languteka ya ri kahle, kambe a ya languteki ya ri kahle eRitweni. Sweswi, hi na munhu wo tano, muprofeta loyi a totiweke, hi vito ra Martin. Tana, yana emahlweni ka yena.”

Wanuna a ku, “Ee, ee! Martin a nga na nchumu xo xiendla hi leswi.”

²¹⁰ Kutani a ku, “Wa famba, hambani swi ri tano.” Nakona va n’wi khomile hi voko, ku n’wi yisa emahlweni ka Martin, kutani nguvu yi n’wi sukerile.

²¹¹ Wa vona, “Ku hambukisa Vahlawuriwa loko swi nga koteka.” Wa vona, va va tiva. Yesu u teri, “Ta mina tinyimpfu ti tiva Rito ra Mina.”

“Oho,” mi ri, “twanani ra Mina “Rito.””

Rero i Rito ra Yena. “Munhu a ngaka a nga hanyi hi vuswa ntsena, kambe hi Rito rin’wana na rin’wana.” Wa vona? Lava hlawuleriweke emahlweni va switiva leswi. “Rito leri nga tolovelekangiki, kumbe mpfumawulo lowu nga tolovelekangiki, a va nge wu landzeli.”

Yaleyo hi yona ndlela ya vanakulorhi lavaya va le ndzhaku; a va nga ta landzelela. A va swi tiva leswaku Martin a ri kona, muprofeta wa nguva yaleyo, loyi a tivisiweke hi Xikwembu hi Rito, a tiva Rito. Nakona wanuna yaloye a nga ta yima emahlweni ka Rona.

²¹² U tlhele a ku, “Laha Ntsumbu wu nga kona,” kumbe Rito, “kwalahaya, eka nguva, magama ya ta hlengeletana.” Sweswi

yaleyo i Mat-. . .Mi lava ku yi tsala ehansi, yaleyo i Matewu 24:28. Ntsena swintsongo nyana emahlweni ka, Matewu 24:24; tindzimana ta mune ehansi ka yona, wa vona, loko mi lava ku swi kuma. “Laha Ntsumbu wu nga kona,” laha Mana ya nga kona, Rito ri nga kona, “hilaha magama ya nga ta hlengeletana kona.”

²¹³ Ndzi fanele ku hatlisa sweswi. Ndzi langutile le henhla ni ku vona leswaku i nkarhi. . .I-i nkombo wa timinetse kumbe nhungu wa timinetse ku bile awara ya khume mbirhi. Ndzi ta hatlisa hi xihatla swinene, kumbe hi nga swi hetisa na vusiku, xin’we eka leswi ni lavaka ku swi endlisa swona. Mixo lowu kumbe vusiku lebyi? Ahaa? I vangani lava faneleke kuya emakaya endzhaku ka xikhongelo lexi, mi nge hi vona mavoko ya n’wina, wa vona. Oho, mina, swa antswa kuya emahlweni!

Ndza tisola ku khomeleta vanhu lava nga etifoyinini le handle kukota sweswo, kambe ndzi ta hatlisa. Swi na nxavo wo tlula mali ya n’wina. Ndzi pfumela leswaku swi tano, eka mina, wa vona. Mali ya n’wina yi ta hela. Leswi swi ngaka; i Rito. Wa vona?

²¹⁴ “Laha Ntsumbu wu nga kona, hilaha magama ya nga ta hlangana kona.” Laha Ntsumbu, laha ku—ku—ku dlaya ku nga kona, hilaha magama ya nga ta hlengeletana kona. Laha Nyama yo tenga yi nga kona, Rito ra nguva, hilaha magama ya nga ta hlengeletana kona.

Kambe endzhaku kaloko yi borile, kutani makoti ya ta yi pomela. Ina. Ma swi vona leswi ndzi swi vulaka? Loko ku dlaya ku endliwile, hilaha ku taka magama; kambe endzhaku kaloko wu tshamile lahaya, ni ku bola, kutani hilaha ku taka makoti. Gama a ri ngevi na nchumu xo xi endla hi wona. Wa vona?

Yesu u teri, “Laha Ntsumbu wu nga kona,” laha ku weke Mana kona, vusiku lebyi Mana ya waka yo tenga, “hilaha magama ya nga ta hlengeletanela Wona kona.” Yalawa i Mana ya siku. Wa vona? Xiyisisani.

²¹⁵ Kambe endzhaku kaloko wu borile, tinsumbha ta wu nghenela, kutani hilaha ku taka makoti. Ma ngaka ma nga wu nuhweteli kukondza wu bola. A swi hlamarisi kuva Yesu a yimile lahaya ni ku vula leswaku, “Yerusalem, wena loyi a khandleke muprofeta un’wana na un’wana!” Xiyisisani risivi rero ra vumunhu, wa vona, “Yerusalem, Yerusalem, i kangani laha a Ndzi tava. . .” A ri Yena mani? “I kangani laha a Ndzi tava ndzi ku hlengeletile tani hilaha mbhaha wu hlengeletaka swikukwani swa wona, wena loyi a khandleke muprofeta un’wana ni un’wana loyi Ndzi n’wi rhumeleke eka wena,” kereke liya yikulu, Yerusalem.

²¹⁶ Yerusalem leyi nga riki kona laha emisaveni, “kambe hi va Yerusalem wa le Henhla,” laha Rito ri humaka kona, kusuka eku hlawuleriweni emahlweni, wa vona. Kungari Yerusalem wa khale loyi a helaka; kambe Yerusalem Lontshwa loyi a nga

heriki. Kungari Yerusalema wa khale, loyi a akiweke hi munhu; kambe Yerusalema Lontshwa loyi a akiweke hi Xikwembu, wa vona, Rito leri nga le henhla sweswi ri vonakarisiwaka. “Endlwini ya Tata wa Mina ku na vuako byo tala. Ndzi taya ndzi ya mi lunghisela byona,” Mutumbuluxi a ri eku endleni ka switarata swa nsuku, na swin’wana. Yaleyoyi hi Leyi nga taka yi nga herisiwi.

²¹⁷ “Yerusalema, Yerusalema, i kangani laha a Ndzi tava,” kusukela emasunguleni ya nkarhi; ku ngari Munhu wa vunharhu, munhu un’wana, kambe, “A ndzi tava ndzi ku wungile tani hilaha mbhaha wu endlaka swikukwani swa vona, kambe a wu nga ta swikota. Kambe awara ya wena yi fikile sweswi.” Wa vona?

“Laha Ntsumbu wu nga kona, magama ya ta hlengeletana kona.” Kambe endzhaku ka loko wu borile, kutani tin’hwati ta hlengeletana. Wa vona?

²¹⁸ Xiyisisani. Muxe, a nga kalanga a nyiketa vana va Xikwembu. . . Muxe a ri gama, kutani a nga kalanga a nyiketa vana va Xikwembu leswi siyiweke hi Nowa. Wa vona? A ri na Rito ro tenga ra Xikwembu. “Hosi Xikwembu xi hlanganile na mina emananga, kutani xi tiyisisa Rito ra Xona, ni ku ndzi rhumela lahawani ku ta mi vitana.” Kutani hiloko ku humelela vaencenyeti, va ri karhi va swi encenyeta. Wa vona? Kambe a ri na Rito ra awara.

Hikuva, Xikwembu xi teri eka Abraham, loyi a ri na xitshemhiso, “Mbewu ya wena yi ta tshama etikweni ra vamatiko, mune wa madzana ya malembe, kambe Ndzi tava endzela ni kuva humesela ehandle hi voko ra matimba.”

²¹⁹ Muxe u teri, “Sweswi, Hosi Xikwembu xi ta vulavula na mina ni ku ndzi komba, nakona xi ndzi byerile leswi ndzi faneleke ku swi endla, kutani ndzi ta mi byela.” A ku, “‘LOYI A NGA KONA’ u ndzi rhumile.”

“LOYI A NGA KONA!” Kungari “Loyi a ri kona, kumbe loyi a nga tava kona.” “LOYI A NGA KONA,” nkarhi wa sweswi, Rito sweswi. Ku ngari Rito leri a ri ri kona, Rito leri nga ta ta; Rito leri nga kona sweswi. Wa vona? Ma swi kuma? “LOYI A NGA KONA!” “LOYI A NGA KONA” i Rito. “Ekusunguleni Rito a ri ri kona, nakona Rito a ri ri na Xikwembu.” A hi swona sweswo? “LOYI A NGA KONA.” “Xikwembu xi ndzi rhumile tani hi muprofeta wa Xona, ku ta tiyisisa leswi kuva ntiyiso. Hi mina nhlamulo eka Rito leri, xi ndzi byerile ku ta lahawani na ku endla leswi.”

²²⁰ Nakona loko a swi endlile, Faro a ku, “Hi swona, hi na vafana votala entlaweni wa hina lava nga swi endleka sweswo, na vona,” vaencenyeti.

Yesu u teri, “Sweswi, sweswo swi ta vuyelela nakambe emasikwini ya makumu,” wa vona, u koxa nchumu lowu fanaka.

Vonani loyi a sunguleke a ta. Vonani loyi a tshameke na Rito. Sweswo hi swona. Sweswo hilaha swi tiviwaka hakona, swingaleswi ma swi vona.

²²¹ Ha swi lemuka, Muxe a nga va nyikanga leswi a swi ri swa nkarhi wa Nowa, “Hi ta aka ngalava sweswi, hikuva rero i Rito, ma swi tiva. Nowa u akile ngalava siku rin’wana.” Ee, makoti a yari ekudyeni ka sweswo. Ee. Ee.

²²² Leri i Rito leri tshembhisiweke. Xiyisisani, hikuva hungu leri a ri na rona kusuka eka Xikwembu, a ri na Rito ra Xikwembu ra xiviri leri hlawuleriweke emahlweni ra awara liyani.

Hambi a ri Yesu a nga va phamelanga leswi siyiweke hi Muxe. Muxe a ri na Rito ra awara liya, kambe Muxe a ri muprofeta. Hi lexi Xikwembu hi Xoxe, wa vona, a Xi kalanga xi va phamela leswi Muxe—Muxe a swi siyeke.

Kambe langutisani makoti eka vandla leriya, a ya ri eku phanghelaneni ka swona. “Ha swi tiva! Hi na Muxe! A hi boheki kuva na Wena.”

²²³ U teri, “Loko a mi tivile Muxe, a mi tava mi Ndzi tivile, hikuva Muxe u vulavurile hi Mina.” Wa vona?

“Laha Ntsumbu wu nga kona, hilaha magama ya nga ta hlengeletana kona.” Magama! Xidlayiwa xo tenga xa Rito, Rito leri kurisiweke na ku nyuherisiwa, na kuva ri vonakarisiwile na ku nyikeriwa eka Swakudya swa vona.

Sweswi, ntsumbu wa khale lowu tshameke lahaya madzana ya malembe, kwalahaya wu tava kona.

Swa fana sweswi! Luther a ri na hungu ra ku hundzuka; kambe, n’wina ntlawa wa tin’hwati ta Lutheran! Baptist a yi ri na hungu; kambe, n’wina tin’hwati ta Baptist! Wa vona? Pentekosta a yi ri na hungu; ku vuyela ekaya sweswi, tin’hwati ta Pentekosta!

“Kambe laha Ntsumbu wu nga kona, hilaha magama ya nga ta hlengelatana kona.”

²²⁴ Tsundzukani, a mi nga ta yi phamela Lutheran, le ndzhaku emasikwini lawaya (mi nga swikota sweswi), nyama yo bola ya Khatholiki. Ee, nkulukumba. A yi ri na nyama yo tenga. Yaleyoy a kuri nguva ya kereke yaleyoy.

A mi nga ta yi phamela Methodist, hungu ra Lutheran. Oho, ee, a yi nga yi lavi nyama yaleyoy yo bola. Yi borile. Wa vona, Vutomi byi yi sukerile na kuya eka nchumu wun’wana. Xexo i xinsinya xa khale lexi feke, le ndzhaku. Vutomi byiya emahlweni.

Nakona mi ngaka mi nga phameli Mutekiwa wa Yesu Krete Vupentekostalism. Ee, hakunene! Mavandla lawa ya pomeriweke hi tinsumbha; a ya endli nchumu! Ee, ee!

Hikuva xitshembhiso hi lexi, “Kutani loko siku lerikulu lero chavisa ri nga se fika, Ndzi ta mi rhumela muprofeta Eliya. U ta vuyisela timbilu ta vana eka Ripfumelo ra vatatana nakambe.” “Hinkwaswo switshembhiso leswi endliweke eBibeleni, Ndzi ta swi endla, kutani hilaha magama ya nga ta hlengeletana kona.” “Hinkwaswo leswi Tatana a Ndzi nyikeke swona swi ta ta eka Mina.” Wa vona?

²²⁵ Yesu a nga kalanga a swi ringeta sweswo. Kambe loko Yesu a ta, U kumile ntlawa wa makoti, “Hi na Muxe na nawu.” Wa vona? Hi swona, sweswo a kuri ku dya ka kahle le ndzhaku loko xi dlayiwile ni ku nyiketwa eka vona. Wa vona, sweswo a swi ri kahle hi nkarhi luwa.

Kambe leswi hi leswi bvumbhiweke hi Muxe, hi yexe, loyi a tlhaveke xitlhavele, u teri, “Hosi Xikwembu xa n’wina xi ta pfuxa exikarhi ka n’wina, eka vamakwenu wa n’wina, Muprofeta. Swi ta humelela, leswaku un’wana na un’wana loyi a nga namarheleki eka Muprofeta yaloye na leswi A swi vulaka, u ta tsemiwa kusuka exikarhi ka vanhu.” Nakona swi vile tano.

²²⁶ Langutani hilaha kwalomu ka ntsevu wa madzana ya vuprofeta byo hambanana byi hetisekeke kwalahaya, bya Testamente ya Khale, kuya eka Yesu Krete. “Va tlhavile mavoko ya Mina na milenge ya Mina.” Kwalomu, ndzi rivele leswaku i byingani lebyi hetisekeke eka nkombo kumbe nhungu wa tiawara to hetelela ta vutomi bya Yena, hinkwaswo leswi vaprofeta va swi vuleke, hi ku hetiseka.

²²⁷ Loko ndzi profetile leswaku nchumu wo karhi wu ta humelela eka lembe kusukela sweswi, kumbexani ndzi na—ndzi na makume mbirhi wa tiphesente ta nkarhi wa kuva swi humelela, hambi swi lulamile kumbe swi hoxekile. Kutani loko ndzi bvumbhile leswaku sweswo swi ta humelela, nakona ndzi nga vulanga leswaku rini, ndzi na tiphesente tintsongo. Loko ndzi bvumbhile leswaku swi ta humelela rini, swi ndzi nyiketa nhlayo leyintsongo. Loko ndzi bvumbhile ndhawu laha swi nga ta humelela kona, swi tama swa ha swi nyiketa nhlayo leyintsongo. Loko ndzi bvumbhile. . . loyi swi nga ta humelela eka yena, kutani ndzi tama ndza hari na kwalomu ka dzana rin’we ra magidi eka nhlayo ya kuva swi nga humelela, loko swi ngari ntiyiso.

Nakona Rito rin’wana na rin’wana, haleluya, leri tsariweke mayelana na Mesiya yaloye, ri hetisekile ku fika eka letere. Hambu kufikela siku rin’wana, a ri eku hlayeni ka Matsalwa, U yimile exikarhi ka xivulwa, kutani a ku, “Moya wa Xikwembu wu le henhla ka Mina ku ta chumayela Evhangeli, ni ku hundzisa. . .” Ni ku yima kona kwalahaya exikarhi ka xivulwa, hikuva hinkwaswo ka swona swi le ka ku Vuya ka vumbirhi ka Yena. Amen! “Matilo na misava swi ta hundza; Marito ya Mina ya ngaka ya nga hundzi.” Wa vona?

228 A ri Rito hi nkarhi luwa, leri a ri phamela nkarhi luwa. Muxe u va byerile Ntiyiso; kambe, ma swi vona, va tshamela ro endla dinominexini ha swona, leswaku makoti ya ta . . .

Kuna swin'wana swa Rona leswi saleke endzhaku ka loko magama ya hetile ku dya na kuya ekaya. Kutani ya yimerile ku vona swin'wana. "Rito," ya ri, "lahawani Ri fanele ku ta. Hi vile na mhofu tolo; hi na nyimpfu mundzuku." Ma swi vona leswi ndzi swi vulaka? "Hi luwa ntsumbu wa khale wa mhofu le hansi, wu nga eku tseketseleni, kambe hi na nyimpfu yi nga eku teni namuntlha. Yi le kwihi xana?" Ma swi vona leswi ndzi swi vulaka? Swakudya swa Tintsumi! Vanhu lava dyeke mana siku rin'wana, loko va ringetile kuya hlayisela siku leri landzelaka, a ya va ya thyakile. Xana a mi swivoni swifaniso hinkwaswo, hilaha swi hetisekeke hakona? Swa fana sweswi!

229 Xiyisisani, makoti ya siku ra Yesu na wona a ya hlongola madimona; lava va totiweke eka ntsumbu wa khale. A hi swona sweswo? A va hlongola madimona. Yesu u vule tano.

Nakona tsundzukani, a vari na vaprofeta emasikwini lawaya. Khefasi, muprista lonkulu, u profetile. I vangani lava va swi tivaka sweswo? Khefasi u profetile. Xiyisisani xiyimo xa nhova ensin'wini; yi cheletywa hi ntoto lowu fanaka. Hikokwalaho ka yini Bible ye vurile leswaku u profetile? "Hikuva a ri muprista lonkulu hi lembe rero." Khema ro bola, nhova na hlwehlwe, swi tshamile exikarhi ka Koroni; kambe Moya a wuri ehenhla ka yena, Moya lowo Kwetsima wa xiviri wa Xikwembu. Moya lowo Kwetsima wa Xikwembu a wuri ehenhla ka yena, ku ta chumayela, ku profeta, na ku vula leswi nga ta humelela; na ku tsan'wa na ku vamba Rito leri nga rona ri tiyisisiweke ra awara.

Oho, tintswalo, boti! I nkarhi wo tani hi kwihi hi faneleke ku vula swilo leswi, wa vona, i wo tani hi kwihi hi Matsalwa? Ndzi ta hatlisa. Ndzi na kwalomu ka khume wa mapheji lahawani, ya Matsalwa, hilaha ya khorwisaka swilo hinkwaswo. "Dyambu eka lava lulameke na lavo homboloka, ra fana."

230 Yesu u swi vurile, ku swi khorwisa leswi. "Loko Ndzi hlongola madimona hi rintoho ra Xikwembu, xana vana va n'wina va ma hlongola hi mani?" Sweswi, a vari eku hlongoleni ka madimona. A vari eku profeteni. A hi swona sweswo? Kambe a va N'wi lemukanga kuva a ri Rito ra awara, (hikokwalaho ka yini?) hikuva A nga tihlanganisanga na vona.

Tekani Matewu 24:24 sweswi, "Vakreste va mavunwa," lava va totiweke, "va ta pfuka, nakona kutava na vaprofeta va mavunwa va ri eku ma profeteni," wa vona, "kutani swi ta hambukisa na vona Vahlawuriwa loko swi nga koteka." Mi swi kumile sweswi?

231 Xiyisisani vana. "I mani loyi vana. . . Loko Ndzi hlongola madimona hi Rito ra Xikwembu," leri, A ri Rito ra Xikwembu, "i

mani loyi vana va dinominexini ya n'wina va ma hlongoloka hi yena?" Sweswi, nakona Xikwembu xi ri xoxe xi nga hlongola javulosi, ha switiva sweswo, Xikwembu xi ri xoxe. Hikuva, wanuna lowo tiya u fanele ku tiya kutlula loyi a nga endlwini ya yena. Va vile na matimba yo swi endla.

Ma switiva, eka Nhluvutelo lahaya, u vurile leswaku u ta...yena antikreste loyi a pfulukeke emasikwini ya makumu, "U endlile masingita na swihlamariso, leswi hambukiseke hambi kuri lava tshameke ehenhla ka xikandza xa misava, ni ku hambukisa un'wana na un'wana wa vona, Vakreste na hinkwavo, lava mavito ya vona ya nga tsariwangiki eBukwini ya Xinyimpfana ya Vutomi," nhlamulo eka Matewu 24:24, "lava mavito ya vona ya nga tsariwangiki eBukwini ya Xinyimpfana ya Vutomi kusukela emasunguleni ya misava."

Vutomi lebyi a byiri erimintswini ra—ra nsinya walowo wa mulamula wa xiviri, lebyi humeke eka hinkwaswo swa xilamula na leswin'wana hinkwaswo, na ku hundzela emahlweni na ku veka muhandzu ehenhla ka nsinya, ehenhla ka hinkwaswo swinamarhetiwa na marhavi ya xidinominexini. Ma swi kuma xana? Ndzi ta hatlisa. Wanuna lowo tiya . . .

²³² Tsundzukani Davida sweswi, a lulamile, a tshembheka, a ringeta ku endlela Xikwembu ntirho, nakona a nga vekiwanga ximfumo ku swi endla.

"Vona," lava totiweke; kambe Yesu u teri, "Va le ku dyondziseni ka ka Dyondzo vutoloki (bya Matsalwa) bya munhu," wa vona, kungari Rito ra Xikwembu, kungari Rito ra Xona leri tiyisisiweke; va dyondzisa hi Kreste wa matimu, wa vona, nchumu lowu a wu ri kona.

Nakona Biblele yi teri, "Hi yena." "LOYI A NGA KONA," kungari "A ndzi ri kumbe ndzi tava." "LOYI A NGA KONA, sweswi." Hi yena Rito leri hanyaka lahawani.

A ri, ekusunguleni, A ri e...A ri e—e matlukeni; A ri exichochweni; A ri exikhambeni; kambe sweswi U le ndzeni ka Ndoho.

²³³ Sweswi, mi tlhelela endzhaku kutani mi ringeta ku hanya nakambe? Swi ngava njhani loko Vutomi byebyo byi tlhelerile ehansi, mi ehleketa leswaku Vutomi byebyo (lebyi sukeke) byi nga tlhela byi vulavula, byi tlhelela endzhaku kaloko xikhamba xexo xa khale xi omile, byi nga kala byi tlhelela ni ku ya hanya endzeni ka xona nakambe? A byi kali byi swi endla. "Hikuva a swi endleki eka lava nga tshama va voningiwa," nakona va nga yi emahlweni na Rito tani hiloko ri humelela, "va file, va fambile; na yona mitwa na mahlwehlwe leswi nga ekusuhi na ku tsan'wiwa, leswi makumu ya swona ku nga ku hisiwa." A hi swona sweswo xana?

Sweswi ku hatlisa hilaha ndzi kotaka hakona.

²³⁴ Xiyisisani Matsalwa sweswi. Ku dyondzisa Xikwembu xa matimu, wa vona, ntsena tani hiloko va ri eku ringeteni ka ku hanya enkarhini lowu hundzeke, tani hi, “Hi swona, Wesley u teri *swingere-ngere*.” Kumbe, “*Swingere-ngere* u teri *swingere-ngere*.” Mi le ku tsan’weni ka Rito leri tshembhisiweke ra siku, Mana lawa ya tivisiweke erivaleni kuva ya siku leri. Va ringeta ku chela ya vona ya khale ya Xilutheran, Xibaptist, vhinyo ya Xipentekosta emabodlheleni ma hina mantshwa. A swi tirhi. Nakona Vhinyo ya hina yintshwa, emabodlheleni ya vona ya khale, yi nge tirhi. Loko va ringeta ku chela Vhinyo leyintshwa eka dinominexini, vuphukuphuku bya vona bya vonakarisiwa. Va ngaka va nga swi endli. Swa n’wi bulusa.

²³⁵ “Sweswi, boti, ndzi vonile Rito ra Xikwembu, ku hetiseka hi Rito!”

“Sweswi, languta lahawani, dokodela, loko . . . Hi—hi ngaka hi ngavi na swona Sweswo.” Ned, ndzi ehleketa leswaku u vile na swin’wana swa sweswo sweswi nyana. “Hina, hi ngaka hi ngavi na swona Sweswo lahawani sweswi. Ndzi—ndzi vona swi antswa leswaku kumbexani mi ya emahlweni.” Ma swi tiva. Wa vona, a swi nge tirhi. Swa buluka.

“U ngaka u nga rhungeleli lapi rintshwa eka nguvu ya khale, hikuva u endla leswaku hinkwayo yi handzuka.” Wa vona? Yesu a nga kalanga a swivula sweswo xana? Mi ngaka mi nga cheli Vhinyo yintshwa endzeni ka mabodlhela ya khale. Ya ma bulusa. Vhinyo leyintshwa yi na Vutomi eka yona. Hi swona.

²³⁶ Xiyisisani swin’wana lahawani, hi xihatla sweswi, loko hi ri karhi hi heta . . . mbulavulo wa hina. Xiyisisani Nhlavutelo 16:13 ku fika eka 14, loko mi lava ku swi tsala ehansi. A ndzi ngevi na nkarhi kumbexani wo ya eka swona. Ndzi lava leswaku n’wina mi va na ntiyiso wa swona na ku swi vona. Xiyisisani sweswi, leswi i ku yimba ka nanga exikarhi ka Ximbitana xa Vuntsevu na xa Vunkombo.

²³⁷ Sweswi hi le . . . hi ta pfala kungari kahle, loko mi nga tiyisela ntsena timinetse tintsongo. Ha pfala sweswi.

²³⁸ Xiyisisani Nhlavutelo 16:13 ku fika eka 14, exikarhi ka Ximbitana xa Vuntsevu na xa Vunkombo, “Mimoya yi nharhu ya thyaka leyi fanaka na mintlambya” (xana ma swi lemuka sweswo?) “yi humile enon’weni wa un’wana.” Sweswi xiyisisani, hi xihatla. Mi tilulamisile? Mi nge, “Amen.” [Nhlengeletano yi ku, “Amen.”—Muhleri.] Vunharhu bya mimoya!

²³⁹ Sweswi boti wa xidinominexini, tshamiseka ntsena xinkadyana. U nga tlakuki ni ku huma ekamareni, le ndzhaku eka xiya-ni-moya lexi, vuhlanganisi bya swa riqingho. U nga timi thepi ya wena yo kandziyisa. Tshamiseka nyana ntsena xinkadyana, kutani u yingisela. U tswariwile hi Xikwembu, u ta swi endla.

²⁴⁰ Vunharhu bya mintlambya! Ntlambya i xiharhi lexi tshamelaka ro languta endzhaku. A wu langutisi laha wu yaka kona; wu languta laha wu humaka kona. Wa vona? A mi swi voni xana? Xana vunharhu bya tilo byi tswariwile kwihi? Tsundzukani, “mimoya yi nharhu ya thyaka,” mimoya hi wun’we-wun’we. Mi le ku swi kumeni xana? [Nhlengeletano yi ku, “Amen.”—Muhleri.]

²⁴¹ Xiyisisani, yi langutisa endzhaku eNicaea Council laha dyondzo ya vunharhu bya tilo yi tswariweke kona, kungari eBibeleni. Ku hava nchumu wo tano. Yi languta le ndzhaku eNicaea Council eNicaea, Rhoma, laha vunharhu bya tilo byi tswariweke kona.

Xiyisisani laha yi humaka kona. Xiyisisani. Nakona vunharhu bya mintlambya byi huma eka vunharhu bya tilo bya khale, byi tswala vunharhu bya tilo lebyi ntshwa, mana wa byona. Xana swi huma eka yini? Vunharhu bya tilo, “dragona,” wa vona, “xivandzana,” na “muprofeta wa mavunwa.” Vunharhu bya tilo, byi ntshwa. Xana mintlambya leyi yi humile rini ehandle? Xana swi endlekile rini? Xiyisisani, a yi ri kwalahaya nkarhi hinkwawo, kambe a yi vonakarisiwanga kufikela exikarhi ka Ximbitana xa Vuntsevu na xa Vunkombo, ntsena loko ku nga se lemuriwa Swilemo (Hmm?) ku yi paluxa.

“Hikuva eHungwini ra ntsumi ya vunkombo, swihundla swa Xikwembu swi ta tiveka,” hinkwaswo swilo leswi swa vunharhu bya tilo, na minkhuvulo ya vunwa, na hinkwaswo swi ta vonakarisiwa. Xikwembu hi pfuni ku vona leswi nga Ntiyiso! Ni ku ka hi nga ehleketi leswaku hi un’wana a ringetaka ku vula swin’wana ku. . .

²⁴² Ndzi twa moya wolowo wuri eku vengeni ka Sweswo, ma swi vona. A ndzi vulavuli hi mina, boti. Ndzi vulavula hi Ntsumi ya Hosi leyi nga kampeni. Sweswo swi lulamile.

²⁴³ Xiyisisani, vunharhu! “Dragona,” i vangani lava swi tivaka leswaku dragona a kuri yini? A kuri Rhoma. “Kutani dragona yi yima emahlweni ka wansati leswaku yi ta dya n’wana wa yena loko a velekiwile.” Hi swona sweswo? Xana “xivandzana” swivula yini eBibeleni? Matimba. Hi swona. “Muprofeta wa mavunwa, muprofeta wa mavunwa,” wa mavunwa, loyi a totiweke. Wa vona?

²⁴⁴ Swi sungurile kwihi? Loyi i “muprofeta wa mavunwa,” vun’we. “Muprofeta wa mavunwa,” muphope wo sungula; kutani kusuka kwalano ku humelerile “e—e nghwavava, ni mana wa swioswi,” nchumu hinkwawo.

Vunharhu bya vunwa a byiri eku pfukeni; kungari emasikwini ya le ku sunguleni, a byi nga ta vonakarisiwa emasikwini ya le ku sunguleni, byi yile emahlweni na swona. Kambe loko Swilemo swa Nkombo swi tava swi tile, ni ku lemuriwa ka swihundla leswiya ni ku swi paluxa, kwalaho

hilaha “mintlambya, mimoya yinharhu ya thyaka leyi fanaka na mintlambya, yi humaka ku ta tivonakarisa hi yoxe,” dyondzo ya vunharhu bya tilo ku lwisana na Ntiyiso. Wa vona? Ahaa!

Ma ku vona laha swi humaka kona? Ma ku vona laha swi tlhelelaka kona? Ecumenical Council. Hinkwavo i vamakwavo, hambu swi ri tano; mimoya yin’we, nchumu wun’we.

Nakona langutisani. Swi hambukisa swinene, ku endla mahlori! Kutani lava i vajavulosi lava yaka emahlweni eka swikwembu hinkwaswo swa misava, va endla mahlori, ku tava hambukisa hi siku ra makumu, nakona va ta humelela eku swi endleni. Xana Xikwembu xi vurile yini mayelana na moya walowo wo biha?

Wu teri, “Ndzi ta enhlela ehansi ni ku nghena emilon’weni ya vaprofeta lavaya kutani ndzi endla leswaku va profeta vunwa, ku endlela leswaku Akab a humela ehandle leswaku a ta herisiwa.”

²⁴⁵ Xikwembu xi ku, “Famba. U ta humelela. U ta endla leswaku va swi pfumela. A va kona eka Rito rero, xo sungula.” Wa vona? “Famba, hikuva u ta n’wi khorwisa. U tava loyi a nga ta swi endla, loko u tava u nghenile eka vaprofeta lava mavunwa, hikuva u tshembhele eka vona. Nakona a nga tivi nchumu hi mayelana na Rito, naswona a ngaka a nga ringeti ku dyondza mayelana na Rona. A ngaka a nga swi endli, hikuva hi yena hlwehlwe, xo sungula.” Wa vona? Wa vona? “U ta humelela.”

²⁴⁶ Langutisani lahawani eka mintlambya leyi ya vunwa, yi languteke endzhaku, “Hikokwalaho ka yini, ma swi tiva leswi va swi vuleke le ndzhaku eNicaea?”

A ndzi na mhaka na leswaku va teri yini, le eNicaea. Ndzi vula leswi va swi vuleke ehenhla laha eXiluvulweni xa Xikwembu; leswi nga tava kona, kungari leswi a swi ri kona; leswi nga tava kona, hikuva hi Xona “LOYI A NGA KONA.” Wa vona?

“Vunwa.” Langutisani sweswo. Ahaa! Xiyisisani laha va humaka kona.

²⁴⁷ Yingiselani hi vukheta sweswi. Ha swi vona erivaleni, endzhaku kaloko Swilemo swa Nkombo swi lemuriwile, leswi nga ku paluxa xihundla xexo. Xana vunharhu bya tilo i yini? Wa vona? Xana hi kwihi laha swi nga tshama swi vitaniwa vunharhu bya tilo? Wa vona? Xana hi kwihi eBibeleni laha Ri nga tshama ri vulavula hi rito vunharhu bya tilo? Xana hi kwihi laha ku nga vaka na Swikwembu swinharhu, leswaku hi gandzela Swikwembu swinharhu nakona ku ngavi vahedeni?

Xana va ngava lava hambaneke njhani, loko A teri, “Mina na Tatana wa Mina hi Un’we?” “Handle ka loko mi pfumela leswaku Ndzi Yena, mi ta lovela evudyohweni bya n’wina, wa vona, ku kala ripfumelo ka n’wina.” Xidyoho i ku kala ripfumelo. “Mi ta lovela eka ku kala ripfumelo ka n’wina.”

Oho, xana mi ri Ndzi mani, xana mi ri Ndzi
huma kwihi,
Oho, xana ma n'wi tiva Tata wa Mina, kumbe
mi nga ri vula Vito ra Yena?
HI MINA Xiluva xa Saroni, yo Vangama na
Nyeleti ya Mixo.

Xana mi nga ndzi byela leswaku hi Yena Mani?

HI MINA loyi a vulavuleke na Muxe
exihlahleni lexi pfurhaka hi Ndzilo,
HI MINA Xikwembu xa Abraham, yo
Vangama na Nyeleti ya Mixo.
HI MINA Xiluva xa Saroni, oho, xana mi ri
Ndzi huma kwihi;
Oho, xana ma n'wi tiva Tata wa Mina, kumbe
mi nga ri vula Vito ra Yena? (Amen!)
HI MINA Alfa, Omega, Masungulo kusuka
eMakumu;
HI MINA ntumbuluko hinkwawo, nakona Yesu
i Vito ra Yena.

²⁴⁸ Hi swona sweswo. A kuna vunharhu bya tilo! Ee, nkulukumba. Walowo i nchumu wa vunwa.

Swilemo swa Nkombo, ku lemuriwa swihundla leswiya “swi faneleke ku hetisisiwa,” swi tивonakarisa. Xilemo xa lemuriwa; xi chulula, swi tивonakarisa, swi paluxa Mintiyiso leyi tumbetiweke hi Swilemo eka malembe lawa hinkwawo, hi tikereke na tidinominexini letiya hinkwato.

“Nghwavava leyikulu,” ya Nhlavutelo khume nko- . . . Xana a kuri mani? Kambe hi yona “MANA WA SWIOSWI,” na yena. Wa vona?

²⁴⁹ “Sweswi, u va vitana ‘makoti,’” mi ri, “Makwerhu Branham.” Hi swona sweswo.

Kambe, tsundzukani, koti i xinyenyani. Xi totiwile ku haha, na xona. “Mimoya leyi mbirhi yi tava ekusuhi swi ta hambukisa Vahlawuriwa . . .” Koti i ri kulu tani hi—tani hi gama. Ri nga haha kukotisa gama rero; nakona ri totiwile ku haha, kumbe ku chumayela, kumbe ku profeta, xiysisani, ku fana na gama. Kambe ringaka ri nga landzi gama hi mpfhuka. Ee, ee. Loko ri nga ringeta ku landza gama, vuphukuphuku bya rona byi nga vonakarisiwa. Ina, nkulukumba. Ri ngaka ri nga ri landzeleli gama.

Oho, ri nga vula leswaku, “Ndza pfumela leswaku Yesu Krete i N'wana wa Xikwembu. Ndzi pfumela Xikwembu Tatana, xa Matimba hinkwawo, Mutumbuluxi wa matilo na misava; Yesu Krete N'wana wa Xona,” na swin'wana. Oho, kunene, ma nga swi endla sweswo. Kambe hi mayelana na kuva

Yena a ri loyi a fanaka na tolo, namuntlha, na hilaha ku nga heriki? Wa vona?

²⁵⁰ Gama i xinyenyani lexi akiweke hi ndlela yo hlawuleka. Ku hava nchumu wo fana na xona, emisaveni. Wa vona? Xi—xi. . . Loko n'hwati yi nga ringeta kuri landzelela, kumbe xinyenyani xin'wana na xin'wana, xi nga hluveka. Vuphukuphuku bya xona byi nga vonakarisiwa, kunene-nene. Xi nga buluka loko xi ringeta ku chela Vhinyo yintshwa ebodlheleni ra khale. Wa vona, xi nga buluka. Xi nga hluveka. A xi endlwanga, a xi. . . Miri wa xona a wu endlwanga na xivumbeko xo xi khoma le henhla. Loko xi fika eka swirhendzevutani leswikulu le henhla, loko xi nga endlwanga, ku vekwiwa, ku hlawuriwa emahlweni, ku tswariwa xi ri gama, xi ta buluka xi wa swiphemu-phemu. Wa vona? Tinsiva ti nga haha kusuka etipikwini ta xona, nakona xi nga wela emisaveni. Kunene. Xi ngaka xi nga ri landzi gama, hi mpfhuka. Loko xo swi ringeta, vuphukuphuku bya xona byi nga vonakarisiwa. Hi swona sweswo. A wu nge swikoti.

²⁵¹ Hikokwalaho ka yini? Xi ngaka xi nga voni ku kotisa gama. Xana swi pfuna yini ku ringeta ku tlulela le henhla, nakona u nga koti ku vona laha u nga kona loko u ri le henhla? Kutani loko xi nga ringeta, hambu kuri ku ringeta ku encenyeta gama leri, hi mpfhuka, xi hundzuka lexi feke mahlo lero xi nga ha swi tivi leswaku xi tirhile ku fika kwihhi. Hi swona sweswo. Xi le ku kalakaleni na ku huwelela, na kuya emahlweni; kambe vulavulani Rito eka yena, jaha, hilaha vuphukuphuku bya xona byi paluxekaka.

Vulavulani na xona hi nkhuvo hi Vito ra Yesu Krete, kumbe, kuva Yena a ri loyi a fanaka na tolo, namuntlha, na hilaha ku nga heriki, hinkwaswo—hinkwaswo swo tani hi sweswo, kutani mi xi byela. “Hikokwalaho ka yini, oho, yima nyana sweswi!” Wa vona? Oho, ina, tinsiva ta xona ta hluveke lahaya. Wa vona, xi le ku tluleleni ehenhla, na ku profeta, na ku hlongola madimona, na ku vulavula hi tindzimi, na ku huwelela, na kuya emahlweni, xi tsutsumela ehenhla na le hansa. Kambe xi nga ringeti ku landzelela le henhla Lahaya; hikokwalaho ka yini, kunene xi ta paluxiwa.

Hambu swi ri tano, xi hlawuriwile. Xi totiwile. Xi nga haha. Xi nga tiseketela hi xoxe, xi ya le henhla, kambe ku ngari. . . ntsena ku fika kwalano. Wa vona, xi nga dya nyama yo bola, kambe xi ngaka xi nga yi dyi Nyama yo tenga leyi humaka eXiluvulweni.

Xi file mahlo. Xi hlangananile, kambe a xi switivi leswaku xi hlanganisiwile hi yini. Wa vona, Moya lowu fanaka lowu weleke ehenhla ka xona, kukotisa mpfula, ku xi endla koroni; xo sungula a hi xona koroni. Xa buluka. “Oho, ndzi ngaka ndzi nga yi eka. . . Oho, ee, nkulukumba! Ndza switiva leswaku Dokodela

Jones u teri. . .” Hi swona, yana emahlweni. Wa vona? Yana emahlweni, loko u swi tsakela.

²⁵² Ee, xiyisisani, a nga tswariwanga, kumbe ku vumbiwa, kumbe ku hlawuleriwa emahlweni, kuva xinyenyani xa muxaka walowo. A nga. . . Hi yena. . . a ngava a ri xibomu lexi kulelaka ensinyeni wa mulamula, kambe a nga kalanga a huma etimintswini. Hi yena nchumu lowu nga engeteleriwa. Nakona loko va fika le henhla eka tidinominexini ta vona lero va nga ha swikoti na ku vona Rito leri hlawuleriweke emahlweni ra Xikwembu leri vonakarisiweke, kutani vuphukuphuku bya vona bya paluxiwa. “Oho, xilo xexo, Xirhendzevutani xa layiti ehenhla ka nhloko, ni hinkwaswo, oho, a Swi twali.” Wa vona? Swi paluxiwile.

²⁵³ A nga akeriwanga ku vona ku fika kwalaho. U vona ntsena ku fika laha manghilazi ya yena ya xidinominexini ya n’wi pfumelelaka ku vona kona. Kambe, endzhaku ka sweswo, u file mahlo tani hi mangedyana. Hi kona laha vuphukuphuku bya yena byi paluxiwaka. Wa vona? Hilaha gama ra ntiyiso ri tshamaka ehansi ku ta dya. Ina, nkulukumba. Kwalano hilaha ya ntiyiso, magama lawa ya hlawuriweke ya vonaka leswi a nga swona. Loko a nga ri teki Rito rero, ya swi tiva xikan’we-kan’we leswaku hi yena koti ra xidinominexini.

²⁵⁴ Hikokwalaho ka yini, hikokwalaho ka yini a nga hahi? Hikuva, langutisani leswi a ri eku swi dyeni. A ri eku dyeni ka nyama yo bola ya xidinominexini. Sweswo swi ngaka—sweswo swi ngaka swi nga endli leswaku miri wa yena wu va wa ximoya, swi ngaka swi nga n’wi veki eka ntshamiseko wa swa ximoya, hi marito man’wana, ku n’wi tlakusela ehenhla eka ku hambana ka xidinominexini. Wa vona? Wa vona, u dyisiwile swilo swo bola; miri wa yena wu endliwile hi sweswo. A ngaka a ngayi le henhla laha Nyama leyo tenga yi yisaka gama rero. Ntsena a ngaka a nga swi endli. Wa vona?

²⁵⁵ Sweswo swi hetisekisa Matewu 24:24. U le ku haheni, a tlulela ehenhla emoyeni, a papamisa tipiku ta yena, kambe a ngaka a ngayi ehenhla ku ringana. Wa vona? Hi swona sweswo. Wa vona, a ngaka a ngayi, a ngaka a nga fikeleli le henhla ku ringanela ku kuma Mana layo tenga. A nga ha dya mana ya khale lawa ya nga ehansi laha emisaveni, mimpfundla leyi feke ya khale leyi tlumbiweke vhiki leri nga hundza, na n’hweti leyi nga hundza, kumbe makume mune wa malembe lawa ya hundzeke, ku nyamisa. A nga ha dya sweswo, na kuva na makolo eka swona, na ku ba huwa na ku huwelela, na kuya emahlweni, a tlulela ehenhla na ku haha kukotisa gama rin’wana. U totiwile, kukotisa xinyenyana xin’wana.

Nakona hi yena muxaka wa gama, n’hwati yi tano. Ha switiva sweswo. Kunene yi tano, kambe yi ngaka yi nga ri landzeleli gama rero ra xiviri. Wa vona? Yi ngaka yi nga swi

endli. Ee, nkulukumba. Miri wa yona a wu akeriwanga; a yiri eku dyeni ka tinyama to bola to hambana, wa vona, nakona yi ngaka yi ngavi. . . yi ngaka—yi ngaka yi ngavi Nyama yo tenga, Mana yo tenga. Swi ngava swin'wana leswi vuriweke hi Luther, leswi Wesley a swi vuleke, kumbe Dokodela *Swingere-ngere* a swi vuleke. A swi ngavi eka leswi vuriweke hi Yesu eka awara leyi.

²⁵⁶ A hi fambeni sweswi, hi ya pfala. Vatotiwa, “Vakreste,” emasikwini ya makumu, kambe “vadyondzisi va mavunwa na vaprofeta va mavunwa.” Xiyisisani hilaha swi hlamarisaka hakona! Sweswi ndzi lava leswaku mi pimanisa leswi; hi pfumarile nkarhi wo swi hlaya, Matewu 24:24 na Timotiya wa Vumbirhi 3:8.

Matewu 24:24 yi teri, emasikwini ya makumu, wa vona, “Ku ta ta Vakreste va mavunwa,” va vunwa, lava va totiweke, “vaprofeta va mavunwa, nakona va ta kombisa masingita na swihlamariso,” kunene tani hi Ya xiviri—Ya xiviri, “kutani va ta—kutani va ta hambukisa na vona Vahlawuriwa.” Xiyisisani sweswi, yaloye a ri Yesu a vulavulaka.

²⁵⁷ Hi loyi Paul a taka, lahawani endzhaku ka Yena, kutani a ku, “Sweswi, emasikwini ya makumu, ku ta ta vanhu va vukhongeri, wa vona, vari na nghohe ya vukhongeri. Kutani va ta rhangela vavasati va swiphukuphuku, lava fambisiwaka hi tinxakaxaka hinkwato ta ku navela ka misava.”

Kutani va hlalala, va ri, “Hikokwalaho ka yini u lwisana na vavasati?” Oho, hikwalaho ka vunene. . . Ntsena vo ka va nga Swi voni.

“Va rhangela vavasati va swiphukuphuku, lava tikeriwaka hi ku navela ka tinxakaxaka,” ekule na swilo tani hi le. . . ka. . . Wa vona, “Tani hilaha Yanne na Yambre. . .”

Matewu 24:24, “Vakreste va mavunwa,” va vunwa, vatotiwa, va endla masingita na swihlamariso ku hambukisa Vahlawuriwa.

“Sweswi tani hilaha Yanne na Yambre va aleleke Muxe, swi tava tano hi swihunguki leswi; miehleketo ya vuhunguki mayelana na Ripfumelo.” Ku ngari “e” ripfumelo. “Ripfumelo leri!”

“Ripfumelo rin'we, Hosi yin'we, wun'we nkhuve. . .” U ngaka u ngavi na “Ripfumelo rin'we” ehandle ko pfumela eka “Hosi yin'we.” U ngaka u ngavi na minkhuvulo mimbirhi, nakona kungari wun'we wa Tatana, na N'wana, na Moya lowo Kwetsima. “Nkhuvulo wun'we,” Yesu Krete. Hi swona sweswo. Wa vona, nkhuve wa vunwa!

²⁵⁸ Xiyisisani, swi pimaniseni kun'we sweswi loko mi fika emakaya. Xiyisisani Matewu 24:24, Yesu a vulavulaka; Paul, Timotiya wa Vumbirhi 3:8; na tin'wana to tala. Kutani pimaniseni sweswo sweswi.

259 Kutani mi veka Tsalwa rin'wana, Luka 17:30, Malakiya 4.

"Tani hilaha Yanne na Yambre va aleleke Muxe," Rito leri totiweke ra awara, "swi tava tano hi vavanuna lava," ku ngari wanuna, "vavanuna," lava totiweke, "va ala Ntiyiso."

260 "Hi siku leri N'wana wa munhu a nga ta paluxiwa ha rona." Nhlavutelo 10:1 kufika eka 7, yi hlayeni loko mi fika emakaya, "Hungu ra ntsumi ya vunkombo, a lemulaka Swilemo." Xana i yini? Ku ngari leswaku ntsumi hi yona N'wana wa munhu; kambe murhumiwa u le ku paluxeni ka N'wana wa munhu. Xana mi nga swikota ku swi hambanyisa sweswi? Hi kona laha swi tikombaka swi nonoha eka n'wina, ma swi vona. Ku ngari N'wana wa munhu, hi Yexe; kambe ntsumi ya vunkombo, murhumiwa wa vunkombo, u le ku paluxeni ka N'wana wa munhu eka un'wana na un'wana, hikuva Yi sukerile xikhamba. A ngaka a nga Yi kondleteli. I Ndoho, hi Yoxe, nakambe.

"Kutani hi siku rero, Yanne na Yambre va ta alela," lava totiweke (vapfumeri vo tiendlisa na lava nga pfumeriki, kereke ya ximfumo ni ta Xipentekosta) va yima ku lwisana na Ndoho ya ntiyiso, "kambe va tshikiseni xisweswo; vuphukuphuku bya vona byi ta vonakarisiwa, tani hi valavaya." Wa vona? Ma swi twisisa sweswi? [Nhlengeletano yi ku, "Amen."—Muhleri.]

261 Nhlavutelo 10, yi teri, "Hi masiku ya ku yimba ka ntsumi ya vunkombo." Tsundzukani sweswi, vunkombo, Nguva ya Kereke ya Laodekiya. "Ku yimba ka ntsumi yaleyo," loko nguva ya kereke yaleyo yi hetile ku endlwa dinominexini na kuva yi hundzuka nguva ya kereke, loko yi hetile eka vandla ra yona ra Xipentekosta; loko murhumiwa eka . . .

Xana murhumiwa un'wana na un'wana a ri yini? Xana Martin Luther a ri yini? Xitshinyo eka Khatholiki. Xana Wesley a ri yini? Xitshinyo eka Malutheran. Xana Pentekosta a kuri yini? Xitshinyo eka lavan'wana. Xana Vutomi byi yile kwihi sweswi? Ekule na vandla. A ka hari na xikhamba; i Ndoho. I yini xana? Xitshinyo eka Pentekosta, wa vona, ku hetisekisa Matsalwa ya awara leyi. Wa vona?

262 Xiyisisani, rona siku leri murhumiwa loyi. . . Kungari loko a sungula kona, kambe loko a sungula ku tiyisisa Hungu ra yena. Wa vona? Ku Koka ko Sungula, ku horisa; ku Koka ka Vumbirhi, ku profeta; ku Koka ka Vunharhu, ku pfuriwa ka Rito, swihundla swi paluxiwa. Ka hari hava, ka hari hava nawu wa le henhla wo paluxa Rito, ku tlula vaprofeta. Kambe ndlela yin'we ntsena leyi muprofeta a nga tiyisisiwaka swi hi Rito. Nakona, tsundzukani, ku Koka ka Vunharhu a kuri ku lemuriwa ka Swilemo swa Nkombo, ku paluxa Ntiyiso lowu fihliweke lowu lemeriweke eRitweni. Ma swi vona xana? [Nhlengeletano yi ku, "Amen."—Muhleri.]

Kutani swi tano, hi siku rero loko swilo leswi swi ta humelela, Yanne na Yambre valava, vaencyeti, va ta humelela

nakambe. Tani hilaha va endleke hakona loko Muxe a tava a humelerile na Rito ra xiviri, ku ta Ri vula, va humelerile ku ta Ri encenyeta. Kunene hi swona. Sweswi xana ma swi vona leswi Matewu 24:24 yi nga swona? Wa vona, lava va totiweke!

²⁶³ Sweswi ku na swilo swinharhu leswi hi nga ta swivula loko hi nga se pfala. Hi leswi. Ndzi lava leswaku mi yingisela hi vukheta sweswi tani hiloko hi pfala. Swilo swinharhu, tsundzukani, swilo swinharhu swi hetisisiwile. Swilo swinharhu swi andlariwile emahlweni ka n'wina sweswi.

²⁶⁴ Xo sungula. Misava yi le ka xiyimo xa Sodoma. Yesu u teri swi ta humelela. Langutisani vuencenyeti; vavasati va hina va le ku ringeteni ka ku tikhoma tani hi vavanuna; vavanuna va hina va le ku ringeteni ka ku tikhoma tani hi vavasati, kuva vusati; ku bola, ku thyaka, ku pfumala musa, lava hlaseleke hi javulosi, nakona a va switivi. Bibe le yi vurile leswaku sweswo swi ta humelela, nakona hilaha swi nga kona.

²⁶⁵ Xa vumbirhi. Swi le ka awara yaleyo, hi kuya hi Tsalwa leri lahawani, kuva Yanne na Yambre va humelela. Ravumbirhi.

²⁶⁶ Xa vunharhu. Swi le ka awara leyi fanaka leswaku N'wana wa munhu a ta paluxiwa.

²⁶⁷ Hi luya mupfumeri wa n'wina, mupfumeri wo tiendlisa wa n'wina, na loyi a nga pfumeriki wa n'wina. Hi leriya Rito ra xiviri ri yimeke ehandle, ri tiyisisiwile; hi luya mupfumeri wo tiendlisa a nga eku Ri encenyeteni; nakona hi luya loyi a anga pfumeriki a nga eku aleni ka nchumu hinkwawo.

Kambe ku tava na ku Vonakala hi nkarhi wa ni madyambu,

Ndlela yo ya eVukwetsimelweni hakunene mi ta yi kuma. (Hi swona sweswo?)

Matiko ya fayelegeka, Israel ra pfuka,
Masingita lawa Bibe le ya hina yi nga ma vula;
Nakona masiku ya Vamatiko ya pimiwile
(Sodoma), hi swikomu leswi dzimiweke;
Tlhelelani, O lava hangalakeke, eka n'wina.

Siku ra ku kutsuriwa ri kusuhi,
Timbilu ta vanhu ta tsandzeka, hi ku chava loku;

Tatiwani hi Moya wa Xikwembu, mavoni ya n'wina a ma lulamisiwi ni ku basa, (leswaku mi ta vona Rito ra awara,)

Langutani ehenhla, ku kutsuriwa ka n'wina ku kusuhi!

Vaprofeta va mavunwa va le ku hembeni, (va te va tava kona; lava totiweke), Ntiyiso wa Xikwembu va wu tsan'wa,
Yesu yaloye a nga Krete i Xikwembu xa hina.

Hi leswaku, a va Swi pfumeli. Biblele yi vurile leswaku ku tava na nchumu walowo lahawani. Hi lowu!

Kambe hi ta famba laha vaapostola va nga ku kandziya (Ku Vonakala loku fanaka! “Ni ku tlherisela Ripfumelo ra vatatana eka vana.”)

Siku ra ku kutsuriwa ri kusuhi, kusuhi swinene,

Timbilu ta vanhu ta tsandzeka hi ku chava, (misava yi wela endzeni);

Oho, tatiwani hi Moya wa Xikwembu, mavoni ya n’wina a ma lulamisiwi ni ku basa.

Langutani ehenhla, ku kutsuriwa ka n’wina ku kusuhi.

Ma swi pfumela sweswo? [Nhlengeletano yi ku, “Amen.”—Muhleri.] Kutani a hi korhamiseni tinhloko ta hina.

²⁶⁸ Ehandle le tikweni laha Hungu leri ri yaka kona, kusuka eEast Coast kuya eWest, kusuka eCalifornia kuya eNew York, ku rhelela eSouth, ehenhla kuya eNorth, ehandle kuya eka mintirho ya timixini, ni hinkwako laha Ri yaka kona, na le ka tabernakele leyi. Hi swisiwana. Hi hava leswa kahle, leswikulu, swilo swa swiluva, na vuhaxi bya thelevhixini. Ntsena hi le ku ringeteni ka ku endla swo tlurisa leswi hi nga swi kotaka. “Kambe hinkwaswo leswi Tatana a nga Ndzi nyika swona swi tata.”

²⁶⁹ Sweswi, ndzi lava leswaku mi swi tiva kuri leswi i ntiyiso, na n’wina lava yingiseleke thepi leyi. Mi ngava mi anakanyile namuntlha leswaku a ndzi ringeta ku vula sweswo mayelana na mina n’winyi, kuri hi leswaku a ndzi ri eku pakeni ka Hungu leri. A ndza hari na swin’wana swo swi endla ha Rona kutlula leswi nga riki nchumu, ku hava swin’wana swo tlula ntsena rito. Nakona, rito ra mina, hambu kuri hi ku lwisana na ku avanyisa ka mina ko antswa; a ndzi lava kuva murhiyi. Kambe i ku rhandza ka Tata wa mina loku ndzi hlambanyeke ku ku endla, ni ku tiyimisela ku ku endla.

A ku ngari mina Loyi a humeleleke ehansi enambyeni; a ndzi lo tiyimela kwalahaya loko A humelela. A hi mina Loyi a endlaka swilo leswi ni ku bvumbha swilo leswi swi humelelaka hi ku hetiseka hilaha swi nga xiswona; ndzo va ntsena loyi a nga ekusuhi loko A swi endla. A ndzo va ntsena rito leri A ri tirhiseke, ku Swi vula. A kungari leswi a ndzi switiva; hi leswi ntsena ndzi tinyiketeleke eka swona, leswi A vulavuleke hi swona. A hi mina, a ku ngari ntsumi ya vunkombo, oho, ee; a kuri ku vonakarisiwa ka N’wana wa munhu. A yi ngari ntsumi, hungu ra yena; i xihundla xa Xikwembu xi nga phurhumuriwa. A hi munhu; i Xikwembu. Ntsumi a hi N’wana wa munhu; a ri murhumiwa kusuka eka N’wana wa munhu. N’wana wa munhu i Kreste; hi Yena Loyi a hi phamelaka. A mi phameriwi hi munhu; munhu,

marito ya yena ya ta tsandzeka. Kambe mi le ku phameriweni eka Miri wa Rito leri nga tsandzekiki ra N'wana wa munhu.

²⁷⁰ Loko mi nga dyanga hi ku hetiseka eka Rito rin'wana na rin'wana, ku mi nyika matimba yo haha ehenhla ka tidinominexini leti hinkwato na swilo swa misava, xana mi nga swi endla eka lowu nkarhi, loko ha ha khongela?

²⁷¹ Tatana loyi a rhandzekaka, lowu i nchumu wo nonohwa. A swi olovi eka loyi a faka ku swi endla. Wena u tiva swilo hinkwaswo. Kutani ndza Ku khongela, Xikwembu lexi rhandzekaka, leswaku swi ngavi leswi nga twisisekiki. Kambe, eku Vonakaleni ka Rito ra Wena, leswaku vanhu va nga ha famba.

²⁷² Nakona, Xikwembu Tatana, a ndzi switivi leswaku Vahlawuriwa hi vahi; Wena wa switiva. A ndzi switivi leswaku ku Vuya ka Wena kutava rini. Kambe ndzi tiva ntsena leswaku U teri loko leswi swi humelela, lava mavunwa, lava totiweke; a va ngari kahle loko va sungula.

Muxe u va tshikile va ri voxe, hikuva a nga ha ta endla nchumu mayelana na swona. A ta vula ntsena leswi A wuri eku swi vuleni. U n'wi byerile kuva a vitana tinhwala; kutani va ti vitanile. U n'wi byerile kuva a hundzula mati ya va ngati; kutani va swi endlile. Muxe ntsena u yisile emahlweni, Rito hi Rito, hilaha U vuleke hakona, kambe hi Wena Loyi A endleke leswaku vuphukuphuku byi vonakarisiwa.

²⁷³ Sweswi, Tatana, U Xikwembu, hambi swi ri tano. Rito leri fanaka ri vurile leswaku leswi swi ta humelela emasikwini ya makumu. Vanhu votala lavo tshembheka, tani hilaha hi vuleke eka Sonto lowu hundzeke, lava tlhandlekeke mavoko ya vona eka Areka yaleyo ehenhla ka kalichi rintshwa, nakona kungari emakatleni ya Valevhi, va wile va fa, "va fele evudyohweni na le ku hambolokeni," va kanetana ku lwisana na mapfalo ya vona vinyi.

²⁷⁴ Vaministara votala lava tshameke eku hlayeni ka vona, va hlaya Rito rero, na ku cinca pheji hi ku hatlisa; ku ku sivela kuva va buluka, ku tiva leswaku va ta lahlekeriwa hi swiyimo swa vona etikweni, etikerekeni ta vona na le ka tidinominexini ta vona. Xikwembu hi pfuni leswaku hi nga tshuki hi endlile sweswo!

²⁷⁵ Basisa timbilu ta hina, Hosi, eka hinkwabyo vubihi bya misava. Hosi, ndzi yima ndzi tilulamisele ku basisiwa. Ndzi yima ndzi tilulamiserile, na kereke leyi na hinkwavo lava yingiseleke, na un'wana loyi a nga ta yingisela thepi leyi. Ndza yima, Hosi, ndzi ku kombela ku basisiwa. Hosi, ndzi teki u ndzi yisa endlwini ya mumbi kutani u ndzi faya, u ndzi vumba kuva nandza loyi U n'wi lavaka.

Hikuva, Hosi Yesu, "Ndzi munhu wa milomo ya tyaka," tani hilaha Esaya a nga rila, "ku tshama na vanhu va milomo ya

thyaka; kutani khombo eka mina, hikuva ndzi vona nhlavutelo wa Xikwembu wu ri eku vonakarisiweni,” tani hiloko Esaya a vona Tintsumi eTempeleni. Ndzi vona nkarhi wa makumu, Hosi, kutani khombo eka mina na ndyangu wa mina; khombo eka mina na vanhu va mina. O Xikwembu lexi ngariki na Makumu, vana na tintswalo ehenhleri ka hina. Ndza tikombelela mina na vanhu. U nga hi tshiki hi lova na lava nga pfumeriki, leswaku hi hanya na vafumeri.

²⁷⁶ Dinominexini yin’wana na yin’wana, Hosi, wanuna un’wana na un’wana kumbe wansati. . . Ndzi ngaka ndzi nga Ku kombeli leswaku u katekisa dinominexini, loko ndzi ri karhi ndzi switiva leswaku U lwisana na yona. Kambe ndzi nga vula ntsena leswaku, Hosi, loko U ngava u ri na yin’wana ya tinyimpfu ta Wena exikarhi ka vona, i ngaku va nga twa thepi leyi. A va Ri twi, Hosi, na ku Ri twisisa hi ku twisisa loku U nga ta va nyika kona, kutani ingaku va nga huma ni ku amukela Wena. Leswaku va nga kanganyisiwi hi vubofu na ndhavuko wa siku leri. Leswaku va nga ringeti ku dya swin’wana leswi. . . kumbe a kuri ntsumbu eka siku rin’wana. Leswaku va nga teka Rito.

Yaleyo hi yona ndlela leyi Vafarisi va Ku vambeke hakona, Hosi. A vari eku tekeni ka ntsumbu wa siku ra Muxe, ni ku ringeta ku tibuma hi wona; endzhaku kaloko U nyiketile xifananiso, emananga, xa mana yo tenga eka madyambu yan’wna na yan’wana, leswi vulaka rixaka rin’wana na rin’wana. Hilaha va tsandzekeke kona. Swivile chefu eka vona. Swi va dlayile, ku dya swakudya leswo nyamisiwa.

Nakona, hi ximoya, swa ha endla swo fana na namuntlha; kuva dlaya, hi ximoya, hi dinominexini.

Hi pfuni, Xikwembu lexi rhandzekaka. Hinkwaswo swi le mavokweni ya Wena sweswi. Hi Vito ra Yesu Krete.

²⁷⁷ Na tinhloko ta hina leti korhameke, hi ya eku yimbeleleni ka sweswo loko ma ha teka xiboho. Xana mi ta famba ndlela hinkwayo?

Ndzi nga twa Muku-. . .(nakona hi Yena Rito). . .-tsuri wa mina a huwelela, ndzi nga twa. . .

“Oho, ndzi tsendzelekile nkarhi wo leha, kambe, kunene, sweswi ndza N’wi twa, ‘Tanani eka Mina, hinkwenu n’wina lava nga eku mbambeni.’ Twanani, ‘Teko xa wena xihambano, u Ndzi landzela hi masiku.’ Ina, ni loko ndzi famba enkoveni wa ndzhuti wa rifu, a ndzi chavi ku biha ni kun’we; ehansi kuya endzhutini wa madyelo ya rihlaza, na le matini lawa ya yimeke.”

Kutani laha A ndzi yisaka kona ndzi. . .

“Hosi, ndzi vona vuphukuphuku byebyo bya vunharhu bya tilo. Ndzi vona misava hinkwayo yi byariwile eka byona; nhova yi ri karhi yi kula hinkwako. Kambe laha U ndzi yisaka kona

sweswi, Hosi, ndzi tava tani hi lava a vari eka Mintirho 19. ‘Kute loko va twa Leswi, va tlhela va khuvuriwa nakambe hi Vito ra Yesu Kreste.’”

...landzela, (“Ndzi fambile xiphemu xa ndlela, Hosi, lexi ringaneleke ku amukela Wena.”)

Sweswi ndzi ta famba na Yena ndlela hinkwayo.

[Makwerhu Branham a sungula ku hama *Laha A Ndzi Yisaka Kona*—Muhleri.]

²⁷⁸ Xikwembu lexi rhandzekaka, ndzi tshembha leswaku sweswo swi huma embilwini ya mina. Ndzi tshembha leswaku swi huma embilwini ya un’wana na un’wana loyi a nga eku yimbeleleni enkarhini lowu, kumbexani votala lava nga ta twa thepi leyi, lava nga riki kona kumbe lava nga riki ku yi tweni sweswi. Ingaku hi ngava hi tiyimiserile, Hosi, ehandle ko tekela hakelo enhlokweni. U teri, “Kukotisa wanuna loyi a yaka kuya hlangana na vuthu rin’wana, socha, hosi; xo sungula u tshama ehansi na ku hlayeleda, xana a nga swikota ku swi endla, xana a nga swi tshika swilo swa misava? Xana u nga swi tshika, u joyina vuthu ra Rito leri tsariweke ra Xikwembu, u macha na masocha ya Xona, u haha na magama ya Xona?” Hi nyike swona, Hosi, hi Vito ra Yesu.

²⁷⁹ Ma pfumela xana? Ma n’wi amukela? Hi swona. Hi ta mi vona lahawani nakambe, vusiku lebyi, loko Hosi yi swi rhandza. Xana ma swi pfumela sweswo kuva swi ri Ntiyiso? [Nhlengeletano yi ku, “Amen.”—Muhleri.] Xana swi le rivaleni ku ringana? [“Amen.”]

Kutani tekani Vito ra Yesu mi va na rona,
N’wana wa mahlomulo na makhombo;
Ri ta mi nyika ntsako na ku chavelela,
Ri tekeni hinkwa- . . .

Sweswi, tlhavulani na loyi a nga ekusuhi na wena sweswi.

Vito ro hlawuleka, O hilaha ri tsokombelaka
hakona!

Ntshembho wa misava, ntshembho wa misava,
ntsako wa le Tilweni;

Vito ro hlawuleka, O hilaha ri tsokombelaka
hakona!

Ntshembho wa misava ni ntsako wa le Tilweni.

Ku nkhinsama eVitweni ra Yesu,

Ku badama emilengeni ya Yena,

Hosi ya tihosi eTilweni hi ta ambexa
xidlodlo . . . (hi Yena Xikwembu, loko swi
ri tano)

Loko rendzo ra hina ri hetisekile.

Vito ro hlawuleka, Vito ro hlawuleka, O
hilaha ri tsokombelaka hakona! O hilaha ri
tsokombelaka hakona!

Ntshembho wa misava ni ntsako wa le Tilweni;
Vito ro hlawuleka, O hilaha ri tsokombelaka
hakona!

Ntshembho wa misava ni ntsako wa le Tilweni.

²⁸⁰ Ndzi tshembha leswaku vaministara hinkwavo va tivisiwile emixweni lowu, va tekeriwile enhlokweni.

Loko wanuna a khongerile vhiki hinkwaro, a hlamala leswaku yini, hi ku vona Matsalwa lawa, wona ya yimile ehandle emahlweni ka wena. “Kutani khombo eka mina,” ku vula Paul, “loko ndzi nga chumayeli Evhangeli.” Emakumu ka patu ra yena, u teri, “A ndzi tshikanga ku mi byela Makungu hinkwawo ya Xikwembu tani hilaha Ya nyikiweke eka mina.”

²⁸¹ Ndza rivala nkarhi wun’wana ku tekela swilo enhlokweni, ku kombisa, ku katekisa vana.

Billy u teri, siku rin’wana, wanuna u tile, a ku, “Ndzi tile lahawani ku ringana malembe ma mbirhi, leswaku n’wana wa mina a ta katekisiwa.”

Billy a ku, “U nga ehleketi ku biha ha swona. Ndzi na n’wana, wa lembe rin’we; a nga se katekisiwa, hambu swi ri tano. Swingaleswi ndzi ta yima kukondza a kula ku ringanela ku tifambela a ya lahaya hi yexe, ndza tshembha.”

²⁸² Swingaleswi hi kuma boti, sesi, a hi—a hi, wa vona, ndzi . . . Nchumu wun’we, hi fanele ku katekisa vana va hina.

Hi fanele ku khuvula un’wana na un’wana. Ku na xidziva; hi lawa mati. Loko u nga khuvuriwanga, i yini lexi ku sivelaka? Hi lawa mati. Tana sweswi. U nga yimi ku fikela na vusiku; tana sweswi. Ku na wanuna loyi a yimeke lahawani a nga ta khuvula un’wana na un’wana loyi a hundzukeke ni ku tivula vudyoho. Loko u khuvuriwile minkarhi yo tala, va ta ku khuvula hi Vito ra Yesu Kreste eku rivaleriweni ka swidyoho. Wa vona? Hi hina sweswo.

²⁸³ Kambe, wa vona, Hungu ri le mbilwini ya mina. Ndzi fanele ku Ri humesela. Xexo i xikongomelo xa mina xi ri xin’we, swi ngari na mhaka leswaku nsati wa mina u ri yini, vana va mina vari yini, mufundhisi wa mina u ri yini, hambu a ngava yini wa mina a vulaka yini. I Hosi ya mina. Ndzi fanele ku humesela Sweswo ehandle. Xexo i xikongomelo xa mina xi ri xoxe.

²⁸⁴ Kutani sweswi, minkarhi yo tala, ndzi rivala ku tekela vaministara enhlokweni. Ndza bvumbha kumbexani. . . boti wa hina, Makwerhu Neville, wanuna wo hlawuleka. Vamakwerhu lavan’wana lahawani, hi tsakile kuva na n’wina.

²⁸⁵ Kungari leswaku a hi yimi na wena, boti, kuva hi hambana. Votala va n’wina mi nga hava mi ri vachumayeri va vunharhu bya

tilo. A hi lavi ku kwatisana na n’wina. Ha mi rhandza. Loko a hi nga, loko a ndzi nga swi pfumeli sweswo, a ndzi nga ta kala ndzi yi sukela kereke leyi kukondza ndzi ba ehansi hi matsolo kutani ndzi ku, “Xikwembu, ndzi endlile loyi a lulameke.”

A ndzi wu lavi lowa vutikukumuxi, moya wo tsonana wu va wu hlangananile na wa mina. Ndzi lava moya wa mina wu va lowu tengeke na ku basa, rirhandzu ra vumakwerhu, ku kwetsima hi Moya lowo Kwetsima. Sweswi, loko un’wana a ndzi hoxela, sweswo swi tava swi lulamile. Nakona hambu loko ndzi nga hava ndzi ri na mfanelo yo tlhelela eka vona, a ndzi swilavi sweswo evuton’wini bya mina. Ee, ndzi—ndzi lava kuva na rirhandzu. Ndzi lava ku tilulamisa ku lulamisa hi rirhandzu, hi rirhandzu leri hlumulaka hi ku hetiseka ehandle eka swona.

²⁸⁶ A ndzi vuli kuva loyi a hambaneke. Mumethodist, Mubaptist, Mukhatholiki, Mupresbyterian, hambu u ngava mani, a ndzi vuli swilo leswi kuva loyi a hambaneke, ku tikukumuxa eka n’wina. Loko ndzi swi endlile, ndzi mukanganyisi nakona ndzi fanele kuva ehansi lahawani eka altari leyi, ndzi ri karhi ndzi khongela eka Xikwembu.

Kambe ndza swivula, hikokwalaho ka rirhandzu, nakona ndzi vona laha mi yaka kona. Sweswi, a ndzi vuli leswi hi vumina, ni ku vula leswaku ndzi le ku bvumbheni. Ndzi mi nyika LESWI HOSI YI SWI VULAKA. Walowo i Ntiyiso. Nakona ndza mi rhandza hikokwalaho ka swilo sweswo. Xikwembu a xi mi katekisi.

²⁸⁷ Sweswi loko ha ha yimbelela ndzimana yin’wana ya risimu leri, a hi, hi nga se famba. Hi lava leswaku mi va kona vusiku lebyi, loko mi swikota. Loko mi nga swikoti, Xikwembu a xive na n’wina kukondza hi hlangana. Ntsena hi khongela leswaku Xikwembu xi—xi ta mi katekisa ni ku mi nyika swo tlurisa swa tiko ra Xona, wa vona.

Tekani Vito ra Yesu . . .



VATOTIWA ENKARHINI WA MAKUMU TSO65-0725M
(The Anointed Ones At The End Time)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Sonto ni mixo, Mawuwani 25, 1965, eTabernakeleni ya Branham eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

XITSONGA

©2017 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Xitiviso Xa Mpfumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangelu ya Yesu Krete. Buku leyi a yi xavisiwi, yi humesiwa hi xikalo lexikulu, yi vakeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkhwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org